

Guijtz Ni Bacuaa Mateo

*Retoxpengoldoo Jesucrist
(Lc. 3:23-38)*

¹ Guijtz ni rusule' laj retoxpengoldoo xten Jesucrist xi'n toDavid, xi'n toAbraham.

² Abraham gujc xtad Isaac, Isaac gujc xtad Jacob, Jacob gujc xtad Judá con rebejtzni. ³ Judá con Tamar gujc xcuzajn Fares con Zara. Fares gujc xtad Esrom, Esrom gujc xtad Aram. ⁴ Aram gujc xtad Aminadab. Aminadab gujc xtad Naasón. Naasón gujc xtad Salmón. ⁵ Salmón con Rahab gujc xcuzajn Booz. Booz con Rut gujc xcuzajn Obed. Obed gujc xtad Isaí. ⁶ Isaí gujc xtad reii David. David con nani gujc chääl Urías gujc xcuzajn Salomón.

⁷ Salomón gujc xtad Roboam. Roboam gujc xtad Abías. Abías gujc xtad Asa. ⁸ Asa gujc xtad Josafat. Josafat gujc xtad Joram. Joram gujc xtad Uzías. ⁹ Uzías gujc xtad Jotam. Jotam gujc xtad Acáz. Acáz gujc xtad Ezequías. ¹⁰ Ezequías gujc xtad Manasés. Manasés gujc xtad Amón. Amón gujc xtad Josías. ¹¹ Josías gujc xtad Jeconías con rebetzni cheni huij reben Israel pres lo guedx Babilonia.

¹² Che gudejd huij rebejnnga pres Babilonia, dxejc guyu' xi'n Jeconías, Salatiel. Salatiel gujc xtad Zorobabel. ¹³ Zorobabel gujc xtad Abiud. Abiud gujc xtad Eliaquim. Eliaquim gujc xtad Azor. ¹⁴ Azor gujc xtad Sadoc. Sadoc gujc xtad Aquim. Aquim gujc xtad Eliud. ¹⁵ Eliud gujc xtad Eleazar.

Eleazar gujc xtad Matán. Matán gujc xtad Jacob. ¹⁶ Jacob gujc xtad José cháäl Marii nani gujc xnan Jesús ni birilaj Crist.

¹⁷ Ni'cni gujc tzudaj xfamil reni agudejd gubi'reni lo guedxliujre che gubajñli toAbram cheni gubajñliza to'reii David. Tzudajza rexagdoo najc reni gudejd cheni gubajñli toDavid cheni huijli reben Israel pres Babilonia. Stzudaj rexagdoo najc reni gudejd cheni biriilireni pres Babilonia che gojlli Crist.

Cheni gojl Jesucrist
(Lc. 2:1-7)

¹⁸ Scree gujc cheni gojl Jesucrist. Abia'n xnanni, Marii, diidx guchñaani José ni gac cháälni. Per ansde xca' sa'reni, Marii agac nuxi'nni sa'csi biääd Sprit Dxi xten Dios lojni. ¹⁹ José com najcni te beñsa'c, di rlajzni nuro'nni Marii nez loj rebejn te niacheereni, ni'c bejnni xhigab Guřonxhiga'tzni Marii. ²⁰ Xhigabga cayujñni cheni baluiloj te xangl Dios lojni, lo bacal räjpni lojni:

—José xajg toDavid, na'c guidxejblu xca'lu Marii gacni cháällu sa'csi xi'nni nani chu najc xten Sprit Dxi xten Dios. ²¹ Che gaal xi'nni cuälajluni Jesús sa'csi laani guslaani rexpejñni lo rextojlreni.

²² Guiraa redee gujc si'c te guzojb diidx ni gunii tej ni bacuaa xtidx Dios. Räjpni:

²³ Suu te dxapxteeb báz, sajl te xingaanni nani guirilaj: Emanuel, (lajni säloj Dios nabajñ con nuure).

²⁴ Che gubajñ José lo bacal, bejnni si'cni räjp xangl Dad lojni. Cua'ni Marii gujc cháälni. ²⁵ Luxh

dini niembeeni si'c chäälni dxejli cheni gudejd gojl xingangalojni ni gulälajni Jesús.

2

Che biädhuii reben nanduxh ni laa remagos lojni

¹ Cheni gojl Jesús neñ guedx Belén xten guedx Judea, najc Herodes reii xten guedx Judea. Dxejc bidzujñ rebenñajñ ni najc remagos, siäädreni neñz cadro rliejñ gubijdx, bidzujñreni guedx Jerusalén.

² Rniabdiidxreni:

—¿Con reii xten reben Israel nani golgaj, ä? Nurnu abihuiinu xpajñni laadxlinu, ni'cni siopdonñuni.

³ Che biejn diajg reii Herodes diidxga, guyuduxhni yärsia' näjza guiraa reben Jerusalén.

⁴ Dxejcti batie'ni guiraa rebixhojzro ni rnibee loj rebixhojz, näjza guiraa renani ruluii xleii Moisés lo rebejñ te gunabdiidxni lojreni:

—¿Caro gaal Crist?

⁵ Laareni räjpreni:

—Neñ guedx Belén xten guedx Judea sa'csi si'c gunii niguii ni bacuaa xtidx Dios che räjpni:

⁶ Luj guedx Belén xten guedx Judea, dilu gajc maazru huin loj reguedxro xten guedx Judea sa'csi neñ guejdxre guirii tej nani guinibee, te ni ga'p rexpenä Israel.

⁷ Dxejcti guredx-xhiga'tz Herodes remagos te gunabdiidxni gucti biricaj bajl nani bahuiireni.

⁸ Dxejcti baxhañnireni guedx Belén, räjpni lojreni:

—Colchäj ro'c, colñabdiidxsa'c xcuent biuuxga te che abidxältuni jiädniitu loä te näjza narä chağanäni.

⁹ Che biejn diajgreni xtidx rei, sä'tireni. Bajl nani bahuiireni lagajc lajdxreni laltis nijdni lojreni. Che bidzujnlireni cadro yu' bázga, dxejcru guzobdx bajlga. ¹⁰ Che bahuii remagos loj bajlga, rbalazduxhrene. ¹¹ Si'c bidzujnrene. Che biu'reni neñ yu', bahuiireni lo bázga con xnanni Marii. Dxejcti bazuxhijbreni, gojnrene bázga, baxhalreni rexcäl'nasa'creni bazalajzreni oor, näjza yaal näjza yalnejh. ¹² Che agojl guibi'reni, gunixcäl'reni, räjp Dios lojreni:

—Na'c guibi'tu nez loj Herodes.

Dxejcti gunaazreni garenca nez yuj, gubi'reni lajdxreni.

Che siini Egipto

¹³ Che sii remagos lajdxreni, biäd te xangl Dios baluilojni lo José lo bacal, räjpni:

—Huistie, cua' biuxe're näjza xnanni, huinäreni Egipto. Ro'c guläjz che guiniäli lojlu. Siguuil Herodes biuxe're sa'csi rlajzni ju'tnini.

¹⁴ Dxejc huistiegajc José, cua'ni biuxe're näjza xnanni, lagajc yäälga biriireni, siireni nez Egipto.

¹⁵ Ro'c guyu'reni cheni gujtli Herodes. Guiraa dee guzajc te guzobj diidx ni bacuaa niguii ni gunii xtidx Dios che räjpni: “Egiptoli guredxä xi'nä.”

Che guinibee Herodes gujt rebiuxbáz

¹⁶ Che guchee Herodes abasguee remagosni, bidxecheduxhni. Gunibeeni guet guiraa rebiuxniguii ni yu' tio'p ijz näjza rebiuxe' ni yu' guxiiru dxej, guideb neñ guedx Belén näjza reguejdx ni re' gabiga, si'cti redxej ni räjp remagos lojni. ¹⁷ Dxejc guzobj diidx ni bacuaa Jeremías ni gunii xtidx Dios che räjpni:

18 Biejn xse' bejn neñ guedx Ramá, te yälhuinduxh, te yälrbedxdij, yälrbedxneñ:

laa Raquel ni roon yejc rexi'nni.

Naaddini jiäjł lajzni sa'csi agujt rexi'nni.

19 Cheni gujt Herodes, dxejc lo te bacal huiluloj xangl Dios loj José neñ Egipto. 20 Räjpnì:

—Huistie, cua' biuxe're nájza xnanni, gubisac nez Israel sa'csi agujt renani rlajz ju't biuxe're.

21 Dxejcti huistie José, cua'ni biuxe' nájza xnanni. Gubi'reni Israel. 22 Luxh che biejn diajgni rnibee Arquelao guejdx Judea lacuaa Herodes, xtadni, bidxejbni nuini ro'c. Dxejc gunisac Dios lojni loj te bacal, ni'c huijni lo reguejdx xten Galilee. 23 Dxejc biädläjzni neñ guejdx ni laa Nazare't te si'c guzobj diidx ni bacuaa niguii ni gunii xtidx Dios cheni räjpnì: “Sirilajni nazareñ.”

3

Juan Bautist basule' xtidx Dios loj rebejn

(Mr. 1:1-8; Lc. 3:1-9, 15-17; Jn. 1:19-28)

1 Neñ redxejga biääd Juan Bautist lo reyubijdz xten guedx Judea, ro'c cagulijdxni, 2 cayäjpnì:

—Colgusiechlajztu rextojłtu sa'csi xcälrnibee Dios abidzungejxhni.

3 Juan najc nani basä't Isaiás, te niguii ni gunii xtidx Dios, cheni bacuaani:

Riejn xse' te ni rbedxa' nez lo reyubijdz:

“Colguslii xnezyuj Dad, colguslii xnezyulajzni.”

4 Najcw Juan xquichlajd cameii. Naliib te duguijd xque'ni. Rajwni guxha't nájza dzujn xten baseerguijxh. 5 Riääd rebeñ guedx Jerusalén náj guiraa rebeñ Judea nájza rebejn ni tre' gajxh nez

ro' gueu Jordán, riädcuadiajgreni xtiidxni. ⁶ Che ruxhobdojlreni xtojlreni, rutiobnis Juanreni ro' gueu Jordán.

⁷ Che bahuiini siääd xhidajl reben guidoo ni najc refarisee näjza ni najc resaducee, rlajzreni gutiobnisnireni, räjpni lojreni:

—La'tu benguidxduxh, najctu si'c bäl. ¿Chu baliidxtu guxuñtu loj xcälrdxe'ch Dios ni siääd?

⁸ Colguibansa'c si'cni nungäjl te fiipac rebejn guliipac abasiechlajztu. ⁹ Na'c litis guntu xhigab naatu: “¡Ni nurnu najcnu rexagdo toAbram!” Rniliä lojtu, saj cxa' Dios reguijre gunni gacreni rexi'n toAbram. ¹⁰ Asojb guibyajg lo xlobaa reyajg, luxh guiraa reyajg nani di ninexhsa'c xcay lojni, sidinni te checni. ¹¹ Narä guliicani rustiobnisä con nis si'c te seen cheni abasiechlajztu, abaxhobdojltu. Niluxh nani siääd detzä sutiobnisni la'tu con Sprit Dxañ xten Dios näjza con guiboo. Rnibeeruni loä. Bensacduxhni. Nicla xcura'chni digacdi chanää. ¹² Aca'ni xhi cojn gusiani triuu xtenni te chuchee triuuga neñ ngodx xtenni. Dxejcti guixhtriuuga, suze'cni guijxhga lo guiboo ni rejç par tejpas.

Che gurobnis Jesús

(Mr. 1:9-11; Lc. 3:21-22)

¹³ Dxejç birii Jesús nez Galilee, bidzujñni ro' gueu Jordán cadro yu' Juan te gutiobnis Juanni.

¹⁴ Niluxh naaddi Juan gutiobnis Jesús. Räjp Juan lojni:

—Luj nanab gutiobnislu narä, niluxh naj alga luj siäädlu loä te gutiobnisälu.

¹⁵ Dxejç räjp Jesús lojni:

—Basaan gacni si'c naj, sa'csi nanab gusoobnu guiraa ni rlanj Dios gac.

Dxejctiru batiobnis Juan Jesús.

¹⁶ Cheni gulujx gurobnis Jesús, birigajcni lo nis. Dxejc bixal xhaguibaa, bahuiini siädyäjt Sprit Dxaan xten Dios si'c te palom, biäjtni lojni. ¹⁷ Dxejc xhaguibaali biejn diajgreni te xse' ni räjp:

—Dee najc xi'nä ni sanälazä. Laani rbanälazä.

4

Che huij Jesús lo reyubijdz

(Mr. 1:12-13; Lc. 4:1-13)

¹ Dxejc bejn Sprit Dxaan xten Dios huij Jesús nez lo reyubijdz te nejzga nuhual beñdxab Jesús.

² Che gulujx bacua'n Jesús tiuu gubijdx, tiuu guxhijn, gulaanni. ³ Sas biääd beñdxab lojni, räjpni:

—Palga guliilu Xi'n Dioslu, gunibee gac reguijre yätxtiil.

⁴ Badzu' Jesús diidxre lojni, räjpni:

—Loj reguijtz xten Dios caj scree: “Xhet ganaxdi yäłxtiil guibajñ rebejn; sibajñzani con guiraa diidx nani rnii Dios.”

⁵ Dxejcti huiinä beñdxab Jesús guedx Jerusalén. Gulä'pnini jiaa yejc xques guidoro. Dxejcru räjp beñdxab lojni:

⁶ —Palga Xi'n Dios luj, bitiäjs lo yujli, sa'csi scree caj loj rexquijtz Dios:

Sinibee Dios rexanglni ga'preni luj;

siliäsreni luj con ñaareni didi gacnaj ni'lu lo reguijga.

⁷ Badzu' Jesús diidxre lojni, räjpni:

—Caj loj rexquijtz Dios: “Na'c fallu Dad ni najc Xtioslu.”

⁸ Stee huält huinä beṇdxab Jesús yejc te danro. Dxejcti baluini lojni guiraa reguejdx, reguedxro ni tre' lo guedxliuj näj guiraa xcäl'nasa'creni.

⁹ Dxejcti räjpni loj Jesús:

—Guiraa redee sunidxä lojlu palga guzuxhijblu nez loä te gaṇlu narä.

¹⁰ Dxejcti räjp Jesús lojni:

—¡Huij nez rec beṇdxab! Scree caj loj rexquijtz Dios: “Dad Xtiostislu gaṇlu; lojtisni chulu.”

¹¹ Dxejcti gubicaj beṇdxab loj Jesús. Dxejc biääd rexangl Dios biädhuiireni Jesús.

Gusloj Jesús cayujn xtzuunni

(Mr. 1:14-15; Lc. 4:14-15)

¹² Che biejn diajg Jesús yu' Juan nen ladzguiib, huijni nez Galilee. ¹³ Dxejcti gudejdni guedx Nasare't, huiläjzni guedx Capernaum ni tre' gajxh nez ro' nis, nez reguejdx Zabulón con Neftalí.

¹⁴ Si'c gujc te guzobj diidx ni bacuaa Isaías ni gunii xtidx Dios:

¹⁵ Lajdx Zabulón, lajdx Neftalí, nezyuj ni rij nez ro' nisdoo, stelaad gueu Jordán, Galilee cadro rbäjz rebejn nani di gac rexpen Israel.

¹⁶ Rebejn nani rbäjz nen te yälcäjy abahuiireni te bajlga, luxh bajlga basanij xcäriejn renani nabajn lo xcälrdxejb, lo xpalaa yälgujt.

¹⁷ Dxejcli gusloj cagulijdx Jesús, räjpni:

—Colgusiejchlajztu, colguxhobdojl te guibaṇsa'ctu sa'csi abidzuṅgajxh xcälrnibee Dios.

Che gurejdx Jesús tajp xpejnni

(Mr. 1:16-20; Lc. 5:1-11)

18 Sasaj Jesús nez ro' nisdoo xten Galilee che bahuiini lo tio'p niguii. Tejni laa Simón, ni laaza Pedr. Steeni najc lagajc bejtzni, ni laa Andrés. Dzuun ni rujnreni najc rniaazreni bājł, ni'c cacuaareni guijxh lo nisdoo. 19 Dxejcti rājł Jesús lojreni:

—Coltanajł narä. Naj riniaaztu bājł, niluxh narä gunä cuedxtu rebejł.

20 Lagajc dxejc basa'nreni xquijxhreni te sanajłreni laani.

21 Che gudejdreni ro'c, bahuiini loj stio'p niguii, Jacob con bejtzni Juan. Yu'reni neñ te barcw con xtadreni, ni laa Zebedeo cayunsa'creni guijxh. Dxejc gurejdx Jesúsreni. 22 Lagajc dxejc basa'nreni barcw nājza xtadreni te sanajłreni Jesús.

Caguluii Jesús xhidajł bejł (Lc. 6:17-19)

23 Sasajti Jesús guideb nez región xten Galilee, caguluiini neñ tejga rexquidooreni. Cagusule'ni redidxcoob xten xcälrnibee Dios. Cagusiajczani guiraa yälracxhuu ni rajc rebejł guejdxga, guiraa yälguijdx. 24 Biejł diajg rebeñ Siria diidx xcuent ni cayujł Jesús. Sas biädnäreni guiraa rebenracxhuu ni cayajc guiraloj yälguijdx, yälñayan; guiraa reni rajc yejcreni, guiraa reni rajc malyälguijdx, reni rajc yälguidxbej, guiraareni abixu'n tiejxhreni. Dxejcti basiajł Jesús rebejłga. 25 Xhidalduxh beñ Galilee huinajłni, nāj rebeñ reguedx Decápolis, nājza rebeñ guedx Jerusalén, nājza rebeñ Judea nājza rebejł ni tre' stelaad gueu Jordán.

5

Yejc te dajn balijdx Jesucrist rebejn

¹ Che bahuii Jesús loj rebejn xhidajl, huä'pni yejc te dajn. Dxejcti gubig rexpejn ni gurejdxni lojni.

² Dxejc gusloj caguluii Jesús reni'c, scree räjpni:

Rebejn ni sibaalajz

(Lc. 6:20-23)

³ —Sibaalajz rebejn nani nanchee rquinduxhrenei xcälracnäjä Dios, sa'csi laareni nungäjreni xcälrnibee Dios.

⁴ 'Sibaalajz rebejn nani rac-huin lajzrenei xcuent rextojreni, sa'csi sudzucaj Dios xtojreni, susiäjlni lajzrenei.

⁵ 'Sibaalajz rebejn nani nadolajz nani rlajz guntis si'cni rnibee Dios, sa'csi sacnäjä Diosrenei lo xcäl'nabajreni lo guedxliujre.

⁶ 'Sibaalajz rebejn ni nastoocanu rliaanrenei, riojlreni, sa'csi rlajzrenei guibaṅsa'ctisrenei nez loj Dios, sa'csi sudeed Dios lojrenei guiraa ni rniabrenei.

⁷ 'Sibaalajz rebejn nani rulaslajz sa'reni, sa'csi sulaslajzza Diosrenei.

⁸ 'Sibaalajz rebejn nani najc nayatis lastooreni rujnrenei rexhigabsa'c xten Dios sa'csi suhuiireni lo Dios.

⁹ 'Sibaalajz rebejn nani ruscuecdxilajz sabejnrenei, sa'csi laareni sirilajrenei rexi'n Dios.

¹⁰ 'Sibaalajz rebejn nani rusutijp lajzrenei che rusacsí bejnrenei sa'csi nabaṅsa'creni nez loj Dios, sa'csi xtenrenei najc xcälrnibee Dios xhaguibaa.

¹¹ 'Colspaalajztu che gusacsí bejntu tilnäjärenei la'tu, guiniireni guiraloj didx-xhii xcuent xtidxä.

¹² Colguibaalajz, colbalajz sa'csi xhaguibaali

sunidxduxh Dios xcuent xtzuumtu. Sigajcza basacsíreni reniguii ni gubajñ galoo ni gunii xtidx Dios.

La'tu najctu si'c sejd lo guedxliujre

(Mr. 9:50; Lc. 14:34-35)

¹³ Räjpzani:

—La'tu najctu si'c sejd lo guedxliujre. Palga di sejd gac nadzujy, ¿xho gacsacni nadzujy? ¿Xhi gun bejñni dxejc? Susälreni sejdga detz yu', suläj bejñ yejñni.

¹⁴ 'La'tu najctu si'c te bianij lo guedxliujre. Te guejdx nani tre' jiaa yejc te dajn, digacdi guiga'tzni. ¹⁵ Digacdi xcaguuj te bajl dxejcti jiauumi neñ te caj. Maazru huen soobni jiaa neñ te gandilieer te gusänijni loj guiraa rebejñ ni tre' neñ yu'. ¹⁶ Xcäl'nabansa'ctu najc si'c te bajl loj reben guedxliuj. Suhuiireni xtzunsa'ctu dxejc siliä'preni xpala'n xtadtu ni yu' xhaguibaa.

Ruluii Jesús xcuent leii

¹⁷ Räjpzani:

—Na'c guntu xhigab siädgudzucaä leii xten to-Moisés, niclaza rediidx ni baluii redad ni gunii xtidx Dios. Xhet siäddzucaädini, narä siälä te gu-luiäpacni si'cni najcni. ¹⁸ Rniliäpac, dxejli che ni nitloj guibaa näjza guedxliuj, nicla tej letr ni caj loj leii di nit. Sajcpac guiralii ni caj lo reguijtzga. ¹⁹ Ni'cni chutis ni rlajz gusaan te diidx nani caj loj leii, mase te didxbäzni, luxh ruluiini gun bejñ si'c, laani guxiduxh sajñni lajdx Dios guibaa. Niluxh renani rucuadaiajg xtidx leii, luxh rujñpacreni si'cni caj lo leii, ruluiizani leii, beñsacduxh gacni lajdx Dios guibaa. ²⁰ Ni'cni rniä lojtu, palga ditu

gunsa'cru xtzun Dios, ditu guibansa'cru loj reni najn xcuent xleii to Moisés, näjza loj reben guidoo ni laa farisee, dipactu jiu' lajdx Dios xhaguibaa.

Rului Jesús xcuent yälrdxe'ch
(Lc. 12:57-59)

²¹ Räjpzani:

—Abiejza diajgtu nani gunii reben goldoo: “Na'c ju'tlu. Chutis te nani ju't sa'ni, sinärenini lo guxhtis te jäuuni neñ latzguiib.” ²² Niluxh narä rniä chutis nani guidxechduxh lo sa'ni sijni lo guxhtis. Chutis ni guinii didxnaj lo sa'ni, sijni lo juejz. Chutis ni gäb lo sa'ni: “bennayällajz” sidejdni loj yälguxhtis xten Dios, sijni gabijl cadro cayejc guiboduxh.

²³ 'Che sanälu gojn guidoo te gusa'nlni lo bacuug, palga guinaj lajzlu yu' chu lo cadxe'chlu, ²⁴ basansijc gojn xtenlu lagajc ro'c, huisiälxgaa diidx con sa'lu, dxejcti guibi'lu te gac gusa'nlun gojn xtenlu.

²⁵ 'Palga yu' chu rdxe'ch lojlu, basquejn basiäjl diidx con laani lagajc cheni sasanäjluni lonezyuj te di gutedni luj lo juejz. Luxh juejz suteedni luj loj reguixhajg te gusäureni luj neñ latzguiib. ²⁶ Rniliäpac lojlu: “Dilu guirii ro'c palga dilu cue'c guirali meel nani guiniabni lojlu.”

Rului Jesús xcuent yälrusquee sa'ni

²⁷ Räjpzani:

—Abiejn diajgtu guniireni galoo: “Na'c guesnäjtun gunaa nani di gac chäältu.” ²⁸ Narä rniä, chutis te nani fii loj te gunaa dxejcti guisia' lajzni gunaaga, abejnni dojl neñ lastooni. ²⁹ Palga balojlu ladbee rujn rujnlu dojl, gulääni basälni te laad sa'csi hueenru gunijtlu te balojlu quela

chää guideb tiejxhlu gabijl. ³⁰ Palga ñaalu ladbee rujn rujnlu dojl, batiu'ni sa'csi hueenru gunijtlu te ñaalu quela chää guideb tiejxhlu gabijl.

Rului Jesús xcuent yälruo'n chää bejn
(Mt. 19:9; Mr. 10:11-12; Lc. 16:18)

³¹ Räjpzani:

—Abiejn diajgtu guniireni galoo: “Chutis niguii ni rlajz guro'n chäälni, nanabtis gudeedni te guiitz nani rniä abaro'nni chäälni.” ³² Narä rniä, niguii nani guro'n chäälni niluxh xhet dojldi bejn chäälni, niguiiga sujn gun chäälni yälgubejxh, niluxh chutis ni guchnaa gunaaga sujnzani yälgubejxh.

Rului Jesús xcuent che ria'n diidx

³³ Räjpzani:

—Abiejnza diajgtu gunii rebengool: “Che ria'nlu diidx lo Dios gunlu xhi gunlu, na'c jial lajzlu; basa'pac xtiidxlu lo Dios.” ³⁴ Narä rniä, na'c gunlu juraar, nicla tej mood, nicla por xhaguibaa, sa'csi ro'c najc lajdx Dios, ³⁵ nicla por loj guedxliuj sa'csi ro'c rsiuj ni'ni; nicla por guedx Jerusalén sa'csi ro'c najc guedxlajdx reiuro, ³⁶ niclaza por lagajc bitiuyejclu, sa'csi digacdi guncheelu te guichyas niclaza te guichnol, nicla tej guijch. ³⁷ Nanab guiniitilu: “Mbaj” o “Ajndi”. Palga yu' xhiru rniilu, beñdxab najc ni rujn rniiluni.

Chanälajzni rebejn ni rdxe'ch lojni
(Lc. 6:29-30)

³⁸ Räjpzani:

—Abiejn diajgtu gunii rebengool galoo: “Te baloj por ste baloj, te läjy por ste läjy, nalajznu bejn lo sa'lu si'ctis ni rujnni lojlu.” ³⁹ Narä rniä, na'c

tilnäjlu te bejn ni bejn te cos guijdx lojlu. Palga chääzni ladbee lojlu badeed stelaad lojlu chääzni. ⁴⁰ Palga yu' chu rlajz tilnäjlu te xca'ni xcamangwlu, badeedza naj xsa'cwlu lojni. ⁴¹ Palga yu' chu guinibee guulu xcargwni te kilómetro, huinäni tio'p kilómetro. ⁴² Nani guiniab xhi guiniabxlia'ni lojlu, badeedni. Nani guiniablaa xhi guinablaani lojlu na'c gudxojnłuni lojni, na'c gäblu: “Xhetini.”

⁴³ 'Abiejn diajgtu gunii rebeᅅgool: “Colchanälajz sa'tu. Colguidxe'ch loj renani rdxe'ch lojtu.” ⁴⁴ Narä rniä lojtu, colchanälajz rebejn ni rdxe'ch lojtu. Benle' yejc reni rgue lojlu. Colyejn dxunsa'c loj renani rdxe'ch lojtu. Colcuejdx, colnab loj Dios xcuent rebejn nani rdxagdijłtu, rusacsireni la'tu, ⁴⁵ te si'c gactu xi'n xtadtu ni yu' xhaguibaa nani rujn rii xcubijdxni lo rebeᅅsa'c sigajcza lo rebeᅅ guijdx. Rujnzani riajb nisguij lo rebeᅅsa'c sigajcza lo rebeᅅguijdx. ⁴⁶ Palga la'tu chanälajztu lagajctis rebejn nani rinälajz la'tu, ¿xhi gaan guntu dxejc? Najctu lagajc si'c najc rebejn ni rutie' meel ni rajx lo gubier. ⁴⁷ Palga guiniitu: “Xchan”, lagajctis loj resa'tu, ¿xhini'c rujntu ni najc hueenru lo chutis bejn? ¿La et sigajcdiza rujn rebejn nani di gumbee Dios? ⁴⁸ Colyajc beᅅsa'c si'c ni najc xtadtu ni yu' xhaguibaa.

6

Ruluii Jesús xho gudeedni gojn

¹ Räjpzani:

—Na'c gusäbdiidx guntu dzunsa'c nez loj rebejn te fiitisreni xhi rujntu. Palga gusäbdiidxtu di xtadtu ni yu' xhaguibaa guniidx xhi xca'tu. ² Che

gudeedlu gojn, na'c güilu diidx xhi badeedlu. Na'c gunlu si'c rujn rebejn nani rusguee neñ reguidoo, näjza lad nezyuj. Rujnsireni si'c te ruhuii rebejn xhi rujnreni te rliä'p rebejn xpala'nreni. Narä rniä acua'reni gaan xtenreni. ³ Luj che gudeedlu gojn xtenlu, na'c gacbee nicla tej xamiigwlu xhi badeedlu, ⁴ te gac gojn xtenlu xhiga'tz. Dxejcti xtdlu ni cahuii nani bejnlu xhiga'tz, sacnäjni luj nez loj rebejn.

*Rului Jesucrist xho cueedx, guiniabni lo Dios
(Lc. 11:2-4)*

⁵ Räjpzani:

—Cheni rbejdx, rniabtu lo Dios, na'c guntu si'c rujn rebenguidoo ni rusguee. Rchagljazreni rniabreni lo Dios rsiuliireni neñ reyu' cadro riel xtidx Dios, näjza guiraa resquiin, näjza nez ronejz te ruhuii rebejn xho rujnreni. Rniliäpac, acua'reni gaan xtenreni. ⁶ Naj luj cheni cueedx, guiniablu lo Dios, biu' neñ xyu'lu. Basäuu ro' yu'ga, dxejcti xhiga'tz gunii loj xtdlu ni yu' xhaguibaa. Dxejcti xtdlu ni cahuii xhi rujnlu xhiga'tz, sacnäjni luj nez loj rebejn.

⁷ 'Cheni caniitu lo Dios, na'c guinisactu balti huält rediidx nani aguniitu. Si'c rujn rebejn nani di gumbee Dios. Naarenı sa'csi sanuutis rniireni xhidajl diidx balti huält, siejn diajg Dios. ⁸ Na'c guntu sigajc ni rujnreni, sa'csi anajn xtdtu xhini'c rquiintu che guiniabtuni lojni. ⁹ Ni'cni scree colguinii lo Dios:

Xtdnu ni yu' xhaguibaa dxan najc lajlu.

¹⁰ Sujiääd xcälrnibeelu;

bejn si'cni rlajzlu lo guedxliujre sigajc rujnlu xh-
aguibaa.

¹¹ Nadxej baniidx xcu'nnu sa' ni rdaunu guira
dxej.

¹² Basiäjĵ lajzlu redoĵĵl xtennu si'c riäjĵĵ lajznu redoĵĵl
xten rebeĵĵn ni rujn doĵĵl loonu.

¹³ Na'c gusaanlu jiaabnu xhigabguijdx,
basĵaa nuure lo doĵĵl,
sa'csi xten guejblu najc yälrnibee, yälĵnadip näjza
yälrdimbicha' par teĵpas.

Sugacni si'c.

¹⁴ Palga la'tu gusiäjĵĵ lajztu redoĵĵl ni rujn rebeĵĵn
loĵtu, xtadtu ni yu' xhaguibaa susiäjĵĵza lajzni rex-
toĵĵlĵtu. ¹⁵ Palga ditu gusiäjĵĵ lajztu redoĵĵl ni rujn
rebeĵĵn loĵtu, sigajcza xtadnu ni yu' xhaguibaa di
lajzni ĵiäjĵĵza rexttoĵĵlĵtu.

Rului Jesús xho gucua'n bejn

¹⁶ Räjpzani:

—Che rucua'ntu na'c guntu si'c rujn rebeĵĵn
nani rusguee; rumbaa loĵreni te fii rebeĵĵn cagu-
cua'nreni. Rniliä acua'reni rexgaanreni. ¹⁷ Niluxh
la'tu, che rucua'ntu, colcuĵ yeĵctu, colquiib loĵtu
¹⁸ te na'c gacbee rebeĵĵn cagucua'ntu, xtadtistu
suhuii cagucuanxhiga'tztu. Xtadtu ni cahuii xhi
cayunxhiga'tztu suniidxni xhi xca'tu nez loĵ re-
beĵĵn.

Yälĵnasa'c ni yu' xhaguibaa

(Lc. 12:33-34)

¹⁹ Räjpzani:

—Na'c gapdajntu yälĵnasa'c lo guedxliujre cadro
rajw reman o rbibtieĵn xhixtentu, niluxh richu'
gubaan rolijz beĵn te rbajnreni. ²⁰ Hueenru ga'ptu

xcäl̄nasa'ctu xhaguibaa cadro di reman gauu, diza rehxixtentu cuibtiejn, diza regubaan jiu' te cuanreni. ²¹ Sa'csi cadro yu' xcäl̄nasa'ctu, ro'cza naga'lastootu.

Bianij xten tiejxhtu

(Lc. 11:34-36)

²² Räj pzani:

—Bianij xten tiejxhni najc balojni, ni'cni palga rhuisa'c balojtu, guideb tiejxhtu yu' lo bianij. ²³ Niluxh palga rebalojtu di fisa'c, guideb tiejxhtu yu' lo nacâjy, ni'cni palga bajl nani yu' tiejxhtu dini gusanij, ĩlinacäiboo najc guidebtu!

²⁴ 'Ni'cni te bejn̄ di gacdi gun dzuun loj tio'p lam̄ tejsi junt, sa'csi sibälazni tejni laga sanälajzni steeni. Digacdi guntu xtzuun Dios palga caguiiltistu xcäl̄nasa'ctu lo guedxliujre.

²⁵ 'Ni'cni rniä lojtu, na'c chutu yärsia' por xcäl̄nabajntu, xhicha gautu, xhicha yätu, niclaza naatu xhicha lajd gajcwtu. Yäl̄nabajn̄ sajcru lo yäl̄rajw, luxh sajcru tiejxhtu lo xhajbtu. ²⁶ Col̄huiu remane' ni rtajt xhaguibaa. Direni cue'c binij, dizareni guilia' gäj̄l, dizareni cuchee xhi gaureni nen̄ yu', luxh xtadtu ni yu' xhaguibaa rudeedni xhi rajwreni. ¿Laa xhet sajcdirutu loj remane'ga, ä?

²⁷ ¿Chu tej la'tu sa'csi ru'tu yärsia' sajctiobrutu ste bo'c jiaaru?

²⁸ ¿Xhicuent runduxhtu xhigab xcuent xhajbtu? ĩCol̄huiu reguii ni tre' nesiät! ¿Xho roobreni? ¿Xho rialreni? Direni gun dzuun, dizareni guzaa xhajbreni. ²⁹ Narä rniä lojtu, nicla reii Salomón guideb najcwni rehxabsa'c xtenni di nisiuchee si'c rsiuchee tej reguiiga. ³⁰ Palga Dios rujn

rajc recuaan ni yu' nesiät ni rial nadxej luxh guixee ahuejcreni, ¿xhixh dini gunduxhru par la'tu, bejn nani guxii rililajz? ³¹ Ni'cni na'c chutu yärsia' guntu xhigab: “¿Xhicha guidaunu, xhicha guidunnu, xhicha gacwnu?” ³² Sa'csi rebejn nani di gumbee Dios xhigabtisga rujnreni, caguilreni guiraa recosga. Niluxh xtadtu ni yu' xhaguibaa anajnni xhini'c rquiintu. ³³ Colquixgaa yälnibee xten Dios näjza yälnabañsa'c si'cni rlajz Dios dxejc sica'tu guiraa ni rquiintu. ³⁴ Ni'cni na'c gunduxhtu xhigab xho tedtu dxej guixee. Combast tedtu trabajw nani riääd dxej con dxej.

7

Na'c cubeetu sa'tu (Lc. 6:37-38, 41-42)

¹ Räjpzani:

—Na'c cubeetu sa'tu te na'cza cubee Dios la'tu. ² Sa'csi sigacni rgubeetu sa'tu, sigajcza sigubee Dios xhi rujntu; niluxh lagajc si'cni rutixhtu lo bejn, si'cza sutiexh Dios lojtu. ³ ¿Xhicuent ruhuiilu loj guijxh ni yu' baloj sa'lu, luxh dilu fii yagro nani yu' lagajc balojlu? ⁴ ¿Xhicuent gäblu lo sa'lu, nädonnu cuää guijxh ni yu' neñ balojlu, luxh dilu fii loj yagro ni yu' neñ balojlu? ⁵ Beñguijdx ni rusguee, guläxgaa yagro ni yu' balojlu te gac fisa'clu te cuäälü guijxh nani yu' baloj sa'lu.

⁶ 'Na'c guluiitu guiraa rextidx Dios loj chutis bejn sa'csi yu'reni najc si'c bä'cw, xlia'si rca'renini; sibi'reni, sauya'reni luj. Sigajcza recos sa'cru, na'c gudeedtuni loj chutis bejn, sa'csi yu'reni najc si'c cuch rbälazreni cossa'c najcreni si'c cuch ni ruläj yejc xhitis xhi cos.

Colnab, colquuil, colgusejz rolä'
(Lc. 11:9-13; 6:31)

⁷ Räj pzani:

—Colnab lo Dios te guniidxni nani rniabtu. Colquuilni te guidxäjltuni. Colnii rolä', te guixalni jiu'tu. ⁸ Chutis ni rniab lo Dios sica'ni nani rniabni, nani rguuil xhi cos nez loj Dios rdxälzani nani rguuilni; nani rusejz rolä', suxhalzareni lojni.

⁹ '¿La yu' chu tejtü che guiniab xi'nni te yätxtiil, alga gudeedni te guij, ä? ¹⁰ O palga guiniabni te la' bäl, ¿la sudeedni te bäl? ¹¹ Palga la'tu ni najc beñ guijdx rajc rudeedtu cossa'c loj xi'ntu, aticaxh xtadtu ni yu' xhaguibaa. Laani suniidxni cossa'c loj renani guiniabni lojni.

¹² 'Ni'cni guira'ti cos ni rlanjtu gunnäj beñ la'tu, sigajcza colyennäjreni, sa'csi si'c caj lo leii xten toMoisés, näjza lo diidx ni bacuaa redad ni gunii xtidx Dios.

Rolä' xten yäl nabajñ najc dää
(Lc. 13:24)

¹³ 'Coljiu' nez rolä' nani najc dää, sa'csi gulajg najc rolä', gulajg najcza nezyuj nani rinä beñ lo yälrunijt, luxh xhidajlreni riu' nejzga. ¹⁴ Sa'csi dää najc rolä', dääza najc nezyuj nani rinä beñ nez loj yäl nabajñ, niluxh guxii najc renani rdxäl nezyujga.

Ninexhsa'c ni rcaj loj te yajg rujñ gumbeeni yajgga

(Lc. 6:43-44)

¹⁵ Räj pzani:

—Colnatiro rebeñ nani rlanj gusguee la'tu. Rniisireni rusule'reni xtidx Dios. Rluisi nadolajzreni

si'c te xiil, niluxh direni gac. Alga si'c loob najceni, rutie'chreni bejn si'c re'ch xiil che riädchu' loob lojreni. ¹⁶ Dzuun nani rujnreni sujn gumbeetureni. Anajntu di uub xcaj lo reyaguejch, diza iigw xcaj lo guechbiojb. ¹⁷ Ni'cni lo guiraa reyagsa'c rcaj ninexhsa'c lojni, per lo guiraa reyajg ni xhet yagsa'c di, ganax ninejxh ni di ganaxsa'c rcaj lojni. ¹⁸ Digacdi xcaj ninexhdxuudx loj te yajg ninexhsa'c. Di gacdiza xcaj te ninexhsa'c loj te yajg ni di gac yagsa'c. ¹⁹ Guiraa reyajg nani di ninexhsa'c xcaj lojni, nanab guidinni te checni. ²⁰ Sigajcza sajc gumbeetu beñsa'c sa'csi rujnreni dzunsa'c.

Xhet guiraadi bejn jiu' lo xcälrmibee Dios

(Lc. 13:25-27)

²¹ Räjpzani:

—Xhet guiraadi renani rnii, “Dad, Dad”, jiu' lo xcälrmibee Dios xhaguibaa. Ganaxtis renani rujn si'cni rlanj Xtadä ni yu' xhaguibaa. ²² Sidzujn dxej sinii xhidajl bejn loä: “Dad, Dad, con lajlu basule'nu xtiidxlu, con lajzalu biläanu rebeñdxab, con lajzalu biennu remilagwr.” ²³ Dxejc säpä lojreni: “Dina gumbeä la'tu. Colbicaj loä beñlatsiaj.”

Tio'p cimient

(Lc. 6:47-49; Mr. 1:22)

²⁴ Räjpzani:

—Chutis nani rucuardiajg diidx nani cania, luxh ruzoob xtidxä, laani najc si'c te beñsin nani basoob rolizni yejc te guilaj. ²⁵ Che biajb nisguij, biäjt nis gueuu, gubi' bej, bidinreni yejc yu'ga sas di yu'ga niajb sa'csi sojbni yejc guilajga. ²⁶ Nani riejn diajgni xtidxä, luxh dini guzoob xtidxä najc

si'c te beṅ gualajz nani basoob rolizni lo yujxh.
²⁷ Che biajb nisguuj, biäjt nis gueuu, gubi' beduxh bidinreni yec yu'ga. Dxejc ligurebä'n yu'ga. Lacti xhiroob banijt bejṅga.

²⁸ Che gulujx gunii Jesús rediidxga, lacti bidxeloj rebejṅ rediidx ni baluiini, ²⁹ sa'csi baluiini rebejṅ si'cpac te nani rnibee, xhet si'c ruluiidi rebejṅ ni najn leii.

8

Rusiajc Jesús te bejṅ ni raḷ tiejxhni

(Mr. 1:40-45; Lc. 5:12-16)

¹ Che biäjt Jesús yec dajn, xhidajl bejṅ huinajlni.

² Dxejcti biääd te beṅracxhuu ni raḷ tiejxhni nez loj Jesús. Bazuxhijbni, räjpni:

—Dad, palga rlajzlu, sajc gusiajclu narä.

³ Dxejcti basгаа Jesús ṅaani, gudajnni dade'ga con ṅaani, räjpni:

—Rlazä jiajclu. Siajc tiejxhlu.

Lagajc dxejc gubicaj guejdx ni raḷ tiejxhni.

⁴ Dxejcti räjp Jesús lojni:

—Arniä, rut lojdi gäblu xhi guzajclu. Huijtis lo rebixhojz te badeed gojn ni gunii toMoisés gudeed bejṅ ni riajc, te fii rebixhojzga abiajclu.

Rusiajc Jesús te xmos capitán roman

(Lc. 7:1-10)

⁵ Che biu' Jesús guedx Capernaum, bidzujṅ te capitán roman nani rnibee te gayuu soldaad. Gun-abduxhni lo Jesús, ⁶ räjpni:

—Dad, xmosä naga' rolizä. Di gacdi guiniibni luxh cayanduxhni.

⁷ Räjp Jesús:

—Do'o te gusiacäni.

⁸ Dxejcti räjp capitán lojni:

—Dad, xhet sacädi; di nungäjl jiu' guejblu rolizä. Guiniitis te diidx, siacgajc xmosä. ⁹ Narä nacäza xmos rebejn ni rnibee, niluxh rnibeäza te gayuu soldaad. Che rniä lo tejni: “Huij”, rijni. Che gäpä loj steeni: “Gudaa”, riädgajcni. Che gäpä loj xmosä: “Bejn dee”, rungajcni.

¹⁰ Che biejn diajg Jesús si'c, bidxeloduxhni, räjpni loj renani siädnejlni:

—Rniliäpac lojtu, nicla neñ guideb reguedx Israel dina nidxälä te bejn ni rililajz si'c rililajz dade're. ¹¹ Niluxh rniä, sirii xhidajl benzijt nez ladjiaa, nez ladjiat, te jädcuenäjreni Abram, Isaac, Jacob lajdx Dios xhaguibaa. ¹² Luxh rebeñ Israel nani niajc xi'n Dios sijreni te laad lo yälçäjy cadre soonreni, sauya'reni läjyreni, sidejdtisreni trabajw par tejpas.

¹³ Dxejcti räjp Jesús loj capitán:

—Gubi' rolijzlu. Sigajcni huililajzlu, sigajcza gacni.

Dxejc lagajc orga biajc xmosni.

Rusiajc Jesús xnansuegr Pedr

(Mr. 1:29-31; Lc. 4:38-39)

¹⁴ Che bidzujñ Jesús rolijz Pedr, bahuiini naga' xnansuegr Pedr, cayacxhuuni, yu'ni xliaa.

¹⁵ Dxejc gudajntis Jesús naani, birigajcni xliaaga. Dxejcti huistie nane'ga, gusloj cagudeedni xhi gau Jesús.

Rusiajc Jesús xhidajl beñ racxhuu

(Mr. 1:32-34; Lc. 4:40-41)

16 Che biu' guxhijñ, biädnäreni loj Jesús xhidajl bejn ni yu' rebeñxab lotooreni; con xtiidxni gunibeeni birii guiraa rebeñxabga. Basiajczani guiraa rebeñ racxhuu. 17 Si'c bejn ni te guzojb diidx ni bacuaa todad Isaías, ni gunii xtidx Dios, che räjpni:

Lagajc laani cua'ni rexcälracxhuunu, sanäzani rexcälñayannu.

Reni rlajz ninajl Jesús

(Lc. 9:57-62)

18 Che bahuii Jesús tre' xhidalduxh rebejn guideb gabi cadre suga'ni, gunibeeni tednäjni rexpejn pacni stelaad ro' nis. 19 Dxejcti biääd te beñnajn loj Jesús, räjpni:

—Mastr, sisiaäza cadrotis chäálu.

20 Räjp Jesús lojni:

—Rebäjz rajpreni xpiliääreni, remane' ni rutajt xhaguibaa rajpreni xpitiääzreni, niluxh narä Xi'n Dios ni gujc Niguii dina gapä cadre gaa yecä.

21 Stee rexpejn pacni räjp lojni:

—Dad, basaan chaxgää ladxä te chacuatzä xtadä.

22 Räjp Jesús lojni:

—Gudanajl narä. Basaan sugucua'tz resabeñgutreni rebejn nani najc si'c beñgut sa'csi najcreni beñdojl.

Basiacdxi Jesús te beduxh

(Mr. 4:35-41; Lc. 8:22-25)

²³ Che biu' Jesús neñ barcw, biu'za rexpejn̄pacni lagajc neñga. ²⁴ Dxejc huäjs te bedonduxh lo nisdoo. Lirusiääzni barcw neñ nisdoo. Luxh Jesús nageysni. ²⁵ Dxejcti huij rexpejn̄pacni huicuäänni, räjpreni:

—Dad, gucnäj nuure te di guetnu.

²⁶ Dxejc räjp Jesús:

—¿Xhicuent rdxejbtu, bejn̄ ni guxii rililajz?

Dxejcti huistieni, gudidxa'ni lo bej näjza lo nisdoo, te biacdxireni. ²⁷ Dxejc bidxeloduxh rexpejn̄pacni, räjpreni:

—¿Chuni'c najc niguiire? ¡Ahuilaa xho rucuadiajg bej näjza nisdoo xtiidxni!

Rebendxab ni yu' lajdx regadarenos

(Mr. 5:1-20; Lc. 8:26-39)

²⁸ Che bidzujn̄ Jesús stelaad nisdoo cadro najc lajdx regadarenos, tio'p bejn̄ ni yu' bendxab lastooreni biädchaglojreni Jesús. Rebejn̄ga riireni neñ rebaa, nialazduxhrene, ni'cni rut rajcdi rdejđ nezyujga. ²⁹ Guredxa'reni räjpreni:

—¿Xhicuent siädchu'lu loonu luj ni najc Jesús Xi'n Dios? ¿La siäädlu ree te gusacsílu nuure luxh gad gald̄i xor̄nu, ä?

³⁰ Nez te laad, zijte' cadro suga'reni, cayajp bejn̄ xhidalro cuch. ³¹ Dxejcti gunab rebendxabga loj Jesús, räjpreni:

—Palga cuääl̄u nuure, basaan jiu'nu neñ recuchre.

³² Dxejcti räjp Jesús:

—Colchäj.

Dxejcti biriireni neñ lastoo redade'ga, huichu'reni neñ recuchga. Dxejcti guiragajc

recuchga caguxunreni, huitejbreni ro' te guilaj, biääzreni nen nisdoo, gujttireni nen nis.

³³ Rebejn ni cayajp recuchga, baxunreni, huijreni lajdxreni, huiyeireni diidx guiraa ni guzajczeni näjza ni guzajc redade' ni guyu' reben_udxab lastooreni. ³⁴ Dxejcti guiraa reben_uguejdxga huichaglojreni Jesús. Che bahuiireni lojni, gunabduxhreni lojni, jiunejzni lajdxreni.

9

Basiajc Jesús te bejn nani abixu'ñ tiejxhni (Mr. 2:1-12; Lc. 5:17-26)

¹ Dxejcti biu' Jesús nen barcw. Gudejdni stelaad ro' nis te bidzuj_ñni lajdxni. ² Ro'c biädnäreni lojni te bejn nani abixu'ñ ñaani, ni'ni. Naga'ni lo te da'. Che bahuii Jesús lacti rililajzreni, räjpni loj be_ñracxhuuga:

—¡Baspaa lajzlu xi'nä! Agubica_ñ rextojllu.

³ Dxejcti gaii be_ñnajn ni ruluii xleii Moisés cayujnreni xhigab ensilaareni, caniyaj dee Dios con rextiidxni. ⁴ Dxejc gucbegajc Jesús xhi xhigab cayujnreni, dxejc räjpni lojreni:

—¿Xhicuent cayujntu xhigabguijdx nen lastootu? ⁵ ¿Con ni najc guyasiru? Guiniä lo te bejn: “Agubica_ñ rextojllu”, o guiniä lo te bejn: “Huistie, guzaj.” ⁶ Dec gunä te gacheetu Xi'n Dios ni gujc Niguii rajp yäl_ñnibee lo guedxliujre te gudzucajni dojl.

Dxejcti räjpni loj be_ñracxhuuga:

—Huistie, cua' xta'lu, huij rolijzlu.

⁷ Dxejcti huistie be_ñracxhuuga, siini rolijzni.

⁸ Che bahuii rebejn lojni, bidxeloduxhreni,

gulä'preni xpala'n Dios, ni badeed yälrnibeega loj rebejn.

Che gurejdx Jesús Mateo
(Mr. 2:13-17; Lc. 5:27-32)

⁹ Dxejcti birii Jesús cadro basiajcní benracxhúu, sä'tini. Dxejc bahuiini loj te dade' ni laa Mateo. Sobga'ni loj te yagxhiil cadro rbej reni ruquiix xcuent guiraloj. Dxejc räjp Jesús lojni:

—Gudanajl narä.

Dxejcti huisuni, sanajlni Jesús.

¹⁰ Cheni sobga' Jesús lo mex cayajwreni rolijz Mateo, biädza xhidajl rebejn nani ruquiix xcuent guiraloj, ni najc rebejn ni di gac xpen Israel, gurejzarení lo mex näj Jesús näjza reni najc rexpejnpacni. ¹¹ Che bahuii reben guidoo, ni laa refarisee, xhi cayujn Jesús, räjpreni loj rexpejnpac Jesús:

—¿Xhicuent raunäj xmastrtu rebejn nani ruquiix xcuent reyuj näjza rebejn ni di gac xpen Israel?

¹² Che biejn diajg Jesús xhi guniireni, räjpni lojreni:

—Rebejn nani nadaan dini guiquiin chu gusiajcní, niluxh rebejn racxhúu ni'c rquiinreni chu gusiajcreni. ¹³ Colchäj te colchaseed xhi säloj diidre ni caj loj reguijtz: “Yälrlulaslajz rlazä, dina rlazä guniidxtu guidxaa loä.” Sa'csi narä dina niädtedxä reben'sa'c, narä siädtedxä rebeñdojl te gusiechlajzreni.

Gunabdiidxreni xcuent yälrucua'n
(Mr. 2:18-22; Lc. 5:33-39)

¹⁴ Dxejcti biäd rexpejnpac Juan loj Jesús räjpreni:

—Nuure con reфарisee rcua'nnu xhidal huält, ¿xhicuent di rexpejn̄paclu gucua'n, ä?

¹⁵ Räj̄p Jesús lojreni:

—Che ruch̄naa te bi'n, ¿xhixh rac-huin lajz regol-nejdx laga suga' bi'n con laareni? Palga yu' xhi sac bi'nga, dxejc sii soonreni, sucua'nreni.

¹⁶ 'Rut gundi remiend te ladbiejw con te la' ladcoob sa'csi sixu'n ladcoobga, sutiäjsruni lad-biejwga, sajc xhiroobru cadre biräjsga. ¹⁷ Niclaza gac guida' bincoob neñ reguidbiejw, sa'csi reguid-biejw siräjsni dxejc sixe' bin, siniytza reguijdgä. Ni'cni nanab guida' bincoob neñ reguidcoobza, te si'c nicla tejreni di nit.

Xindxa'p Jairo näjza gunaa nani gudajñ xhajb Jesús

(Mr. 5:21-43; Lc. 8:40-56)

¹⁸ Lal ni caniini rediidxga, biääd te dade' ni rnibee neñ guidoo xten rexpejn̄ Israel. Bazuxhi-jbni nez loj Jesús räjpni:

—Entis gujt xindxa'pä. Gudaa, badzuub ñaalu yejçni te guiban̄sacni.

¹⁹ Dxejcti huisu Jesús, sanäni Jairo. Näj rex-pejn̄pacni sanajlrenini. ²⁰ Luxh guyu' te gunaracx-huu nani agujc tzubitio'p ijz cayajçni yälguidxbäii. Bidzujñni nez dejtz Jesús, gudajñni ro' xhajbni, ²¹ sa'csi bejñni xhigab neñ lastooni: “Palga sajc canätis ro' xhajbni, siacä.” ²² Dxejc gubiré Jesús bahuiini loj gunaaga, dxejc räjpni:

—Gulecdxilajzlu xindxa'pä. Yäl̄rililajz xtenlu abasajçlu.

Luxh lagajc dxejc biajc gunaaga.

²³ Cheni biu' Jesús rolijz dade' nani rnibee neñ xquidoo rexpen Israel, bahuiini rebejn ni rol bizej nájza xhidajl rebejn ni cabedxa' cayoon, li te bieje cayajc, dxejc ²⁴ rájpní loj rebejnga:

— Colguibicaj. Nagayejtis dxa'pga, gajdni guet.

Dxejc rebejnga alga ruxhiznäjreni Jesús. ²⁵ Cheni abirii rebejn neñ yu', biu' Jesús, gunaazni naa dxape', dxejc huistie dxape'ga. ²⁶ Dxejcti bire'ch diidxga guiraa neñ reguejdx ni tre' nejzga.

Basiajc Jesús tio'p lotiä'p

²⁷ Che birii Jesús ro'c, huinajl tio'p bejn ni nani di fii. Rbedxa'reni roonreni rájpreni:

— Balaslajz nuure, Xi'n to David.

²⁸ Che bidzujn Jesús cadre caya'nni, gubigreni lojni. Dxejcti gunabdiidx Jesús lojreni, rájpní:

— ¿La rililajztu sajgunä ni rniabtu?

Redade'ga basejc diidx, rájpreni:

— Sajgunluni, Dad.

²⁹ Dxejcti gudajnni balojreni, rájpní:

— Sugacni si'cpacni rililajztu.

³⁰ Lagajc dxejc bixal balojreni. Sas rájppac Jesús lojreni:

— Arniä, na'c chayeitu diidxre, te rut gacbeedi xhi guzajctu.

³¹ Cuantsi biriireni ro'c guslojreni cagutie'chreni diidx xcuent Jesús guideb gabi neñ reguejdxga.

Basnii Jesús te gop

³² Che biriireni cadre biajc baloj rebejnga, biäd sgaii bejn biädnäreni te gop loj Jesús. Yu' xpriit beñdxab neñ lastoo bejnga. ³³ Che barilaagw Jesús

xpr̄it beṇḁxab neṇ lastoo beṇḁgopga, guslogajcni caniini. Rdxeloduxh rebejṇ rājpreni:

—Gajdpacnu guihuii sa' redzuunre lajdx rexpejṇ Israel.

³⁴ Dxejc rebeṇ guidoo ni najc refarisee, rājpreni:

—Rbääni rexpr̄it beṇḁxab con yälṛnibee xten beṇḁxabro.

Rulaslajz Jesús rebejṇ

³⁵ Gudejd Jesús guiraa reguedxro nājza reguedxbāz, basule'ni xtidx Dios neṇ reguidoo xten rexpejṇ Israel. Basääbni diidx xten xcälṛnibee Dios. Basiajczani guiraloj yälṛacxhuu, guiraloj yälḡuijdx ni rajc bejṇ neṇ reguejdxga. ³⁶ Che bahuiini loj rebeṇ xhidajl biaduxhni rebejṇga sa'csi rdebya' lajzreni, rac-huin lajzreni, najczeni si'c najc rexiil nani di ga'p baxtoor. ³⁷ Dxejcti rājpreni loj rexpejṇpacni:

—Guliipac xhidalduxh beṇ guedxliuj di gan xtidxä, luxh guxii najc reni guluiireni; najcni si'c gäj̄l ni agojl guilia', niluxh ruti mos ni guilia'ni.

³⁸ Colṇab lo Dad nani najc xtenni guedxliujre te guxhalṇi rebejṇ ni sajc guluii rebeṇ guedxliujre, gacreni si'c mos ni rlia' gäj̄l.

10

Gule Jesús guitzubitio'p rexpejṇpacni (Mr. 3:13-19; Lc. 6:12-16)

¹ Dxejcti gurejdxni guitzubitio'p rexpejṇpacni, badeedni yälṛnibee lojreni te gurilaagwreni rexpr̄it beṇḁxab lastoo bejṇ nājza te gusiajcreni guiraloj yälḡuijdx nājza yälṛacxhuu.

² Laj reguitzubitio'p rexpejñni ni guleni najc: Simón, ni laaza Pedr; Andrés bejtz Simón; Jacoob xi'n Zebedeo; Juan bejtz Jacoob; ³ Felipe; Bartolomé; Tomás; Mateo, ni najc colectoor; Jacoob, xi'n Alfeo; Lebeo ni rniireni Tadeo; ⁴ Simón, te bejn ni yu' loj recananita; Judas Iscariote, nani bateed Jesús ladzñaa rebejn nani rdxe'ch lojni.

*Baxhal Jesús rexpejñpacni gutie'chreni diidx
(Mr. 6:7-13; Lc. 9:1-6)*

⁵ Guitzubitio'p rebejnre baxhal Jesús. Bali-jdxnireni räjpni:

—Na'c chäätu nez cad yu' rebejn ni di gum-bee Dios. Na'c jiu'tu lajdx reben samaritan. ⁶ Colchäxgaa lo rexpejn Israel nani agunijt nen dojl. ⁷ Colchäj, colzäbdiidx lo rebejn, colye'tz lojreni xcälrnibee Dios abidzungajxh. ⁸ Colgusiajc ben racxhuu, colgusiajc tiejxh rebejn ni ral guejch tiejxhreni, colguspajn bengut. Colgurilaagw xprit bendxab lastoo rebejn. Ligaj cua'tu yälrnibee, ligajza colyejn dzuun.

⁹ Räjpzani:

—Na'c chanätu oor, niclaza pla't, niclaza coobr nen xdobdäjltu, ¹⁰ niclaza guiexh na'c chanätu lo nejz. Na'cza chanätu tio'p xhajbtu, nicla gura'ch, nicla baston sa'csi bejn ni rujn dzuun nungäjlxca'ni xhi gauni.

¹¹ Räjpzani:

—Che guidzujntu xhitis te guedxro, xhitis te guedxbäz, colquiiil te beñsa'c. Rolijztisni coljia'n dxejli ni jiunejztu guejdxga. ¹² Cheni jiu'tu nen yu', colñii xtidx Dios lo rebejnğa. ¹³ Palga najcreni

bejn ni numbee Dios, sujia'n yälrbedxilajz loj rebejn̄ga. Niluxh palga direni gac beṅsa'c, naaddireni xca'reni xtidx Dios, suguibi' yälrbedxilajzga lojtu, coljiunejz ro'c. ¹⁴Palga direni gusaan jiu'tu rolijzreni, palga di rlajzreni gucuadiajgreni xtiidxtu, dxejc coljiunejz rolijz bejn̄ga, o coljiunejz guejdxga, dxejc colcuijb guxhuj ni'tu si'c te seen gulälazreni xtidx Dios. ¹⁵Rniliäpac lojtu, dxej ni gun Dios xcäl̄guxhtisni, te yäl̄guxhtisoru gun Dios rebejn̄ga, quela yäl̄guxhtis ni gujc rebeṅ guedx Sodoma näj Gomorra.

Yäl̄rusacsí ni siääd

¹⁶ Räjpzani:

—¡Colhuiire! Narä suxhalä la'tu si'c xile' nez loj reloob, ni'cni colgacnasiṅduxh si'c najc te bäl̄, colyajza nadolajz si'c te palom. ¹⁷Colnatiro rebejn̄ sa'csi suteedreni la'tu ladzṅaa rexcuxhtisreni, siguijnzarenı la'tu neṅ xquidooreni. ¹⁸Sinäzarenı la'tu nez loj regubier, nez loj rereii xcuent rextidxä, te gusule'tu xtidxä nez lojreni näjza nez loj rebejn̄ nani di gumbee Dios. ¹⁹Cheni chanärenı la'tu nez loj reguxhtis, na'c guntu xhigab xho guiniitu, niclaza guntu xhigab xhicha ni'c guiniitu, sa'csi lagajc Dios suniidx diidx guiniitu orga. ²⁰Sa'csi et la'ditu ni guinii dxejc, Sprit xten Xtadtu Dios ni yu' neṅ lastootu, laani guinii neṅ lastootu.

²¹'Luxh rebejn̄ suteedrenı lagajc bejtzrenı ladzṅaa renı ju'trenı. Redad suteedrenı lagajc xi'nrenı, rexi'n bejn̄ sidxe'chzarenı lo xcuzajnrenı te ju't bejn̄ xcuzajnrenı. ²²Guiraa rebejn̄ guedxliuj sidxe'chrenı lojtu xcuent xtidxä. Nani chanuu lo xtidxä dxej lultli, ni'c sujn gaan yäl̄nabajn̄ par

tejpas. ²³ Che guirinajlreni la'tu te gusacsíreni la'tu neñ te guejdx, colguxuñ ro'c, colchäj stee guejdx. Rniliä lojtu, ditu gun gaan tedtu guiraa reguejdx xten rexpejn Israel ansde jiääd Xi'n Dios ni gujc Niguii.

²⁴ 'Di te bejn ni casieedgaj beñroru lo xmastrni, diza te mos gac beñroru lo xlamni. ²⁵ Te bejn ni casieed, rsieedruni te gacni si'c najc xmastrni, sigajcza rujn mos, riuni xtidx xlamni te gacni si'c najc xlamni. Palga rbälajreni Beelzebú nani rnibee beñdxab, ¿xho direni cuälajza Beelzebú rexi'nni, ä?

Chuni'c nanab guidxejbni

(Lc. 12:2-9)

²⁶ Räjpzani:

—Ni'cni na'c guidxejbtu rebejn, sa'csi anajntu xheti te cos ni niäuu lojni ni di guidzujñ dxej guixal lojni, te fii chutis bejn lojni. Xhetiza te cos xhiga'tzdi ni di guidzujñ dxej siejn diajg bejn xcuentni. ²⁷ Diidx nani rniä lojtu guxhijñ, colguiniini che nianij lo guedxliuj. Rediidx nani rniä chigaj rodiajgtu, colguiniini dip, jiaali colzuj, guredxa' te jiejni. ²⁸ Na'c guidxejbtu renani rugu't bejn, sa'csi direni gun gaan ju'treni xaim bejn. Colguidxejbru nani rugu't tiexh bejn näjza xaim bejn neñ gabijl.

²⁹ '¿La di bejn guto' tio'p manbäz ni rutajt por te centaab, ä? Luxh racbee Xtadnu ni yu' xhaguibaa che riajb tejni lo yuj. ³⁰ Näjza rexquidxejclu nagab tebgajreni. ³¹ Ni'cni rniä na'c guidxejbtu; sajcrutu lo te chinaa manbäz ni rutajt.

Renani rusule' xtidx Jesucrist nez loj rebejn

(Lc. 12:8-9)

³² Räj pzani:

—Chutis renani rusule' xtidxä nez loj rebejn, narä siniäza xcuentni nez loj xtaďä ni yu' xhaguibaa. ³³ Guiraa renani di gusule' xtidxä nez loj rebejn, sigajcza narä dina guiniä xcuentni nez loj xtaďä ni yu' xhaguibaa.

Rlia' Jesús sa' bejn

(Lc. 12:51-53; 14:26-27)

³⁴ Räj pzani:

—Na'c guntu xhigab siädnää yälrbedxilajz lo reben guedxliujre, xhet yälcedxidi ni siädnää, yälrdxagdijl siädnää. ³⁵ Narä siädnää yälrdxagdijl te bi'n con xtaďni; te dxa'p con xnanni; te gulijzni con xnansuegrni. ³⁶ Ni'cni lagajc resa'tu ni yu' rolijztu sidxe'chreni lojtu.

³⁷ 'Nani sanälajzru xtaďni, xnanni, luxh narä dini chanälajz, digacdi gacni xpeňä; nani sanälajzru xingaanni o xindxa'pni, di gac diza gacni xpeňä. ³⁸ Nani di guu xcruzni, nalajznu tedni trabajw, jiädnajlni narä, di gacdi gacni xpeňä. ³⁹ Nani guidxäl xcäl nabajñni lo guedxliujre, sunitni yäl nabajñ xhaguibaa. Luxh nani gunijt xcäl nabajñni lo guedxliujre xcuent rextidxä, sidxälni yäl nabañsa'c xhaguibaa.

Gaan nani xca'ni

(Mr. 9:41)

⁴⁰ Räj pzani:

—Nani guniidx rolijzni jia'ntu, runiidxzani rolijzni jia'nä; luxh nani ruscuääz narä rolijzni, rolijzni ruscuääzzani Gueb Dios nani baxhal narä. ⁴¹ Nani guscuääz te niguii ni rnii xtidx Dios rolijzni sa'csi baxhal Dios niguiiga, sica'za bejn ga lagajc

gaan ni xca' niguii ni rnii xtidx Dios. Nani guscuääz te be_nsa'c rolijzni sa'csi be_nsa'cni, sica'zani lagajc gaan ni xca' be_nsa'cga. ⁴² Chutis nani gudeed mase te xhijgtis nis niäliuj xcuentä lo rebiuxe're, rniliäpac lojtu, direni gunijt, sica'pacreni nani nungäjl xca'reni.

11

Renani baxhal Juan Bautist loj Jesús (Lc. 7:18-35)

¹ Che gulujx baluii Jesús rexpejn_npacni xho gunreni dzuun, dxejcti biriini ro'c te saluiini, chasule'ni diidx lajdx rexpejn_npacni.

² Juan yu' ne_n latzguiib. Che biejn diajgni xhi cayujn Jesús, baxhal_ni tio'p xpejn_npacni ³ te huinabdiidxreni:

—¿La luj ni najc Crist ni jiaäd, ä?, o ¿la silääznu chu stee bejn?

⁴ Dxejcti badzu' Jesús diidxre räjpni:

—Co_lchäj, co_lye'tz loj Juan recos nani riejn diajgtu, näjza recos nani ruhuiitu. ⁵ Reni di fii, ruhuiireni; reni di sa, arsiajreni, reni ra_l tiejxhni, abiajc tiejxhreni; reni di jien diajg, ariejn diajgreni; rebe_ngut, ahuäjzreni, guba_nsacreni. Dxejcti loj rebejn proob nani cabäjz xcäl_rracnäj Dios cagusule'reni xtidx Dios ni rus_laa bejn ne_n dojl. ⁶ Chicbaa renani di jieed narä.

⁷ Cheni sii rebejn_nga gusloj Jesús canii loj rebejn xcuent Juan:

—¿Chuni'c huihuiitu nez loj reyubijdz? ¿La te biquii ni rusniib bej, ä? ⁸ ¿Xhini'c huihuiitu? ¿Te bejn ni sucheduxh, ä? Ni najntu rebejn_n nani sucheduxh rbäjzreni rolijz re_rei. ⁹ La'tu ¿xhicuent

huijtu ro'c? ¿Te fiitu te niguii ni rnii xtidx Dios, ä? O'n. Rniliä lojtu, luxh dini gac bejn̄tis ni rnii xtidx Dios; beñroruni. ¹⁰ Laa Juan nani rusä't ni bacuaa lo reguijtz cadre caj scree:

Narä suxhalä te niguii nani guinii xtidxä nez lojlu; laani susucheeni nezyuj nezlojlu.

¹¹ Guliipac rniä, loj guiraa rexingaan xten gunaa, nicla tejni gajd guiricaj ni najc te beñsacduxh loj Dios si'c ni najc Juan Bautist. Niluxh bejn̄ nani najc beñ huinru lo xcäl̄rnibee Dios xhaguibaa, bejn̄ga maazru sajcn̄i loj Juan.

¹² 'Cheni gucli dxej ni gusloj rusule' Juan Bautist diidx najli, yu'duxh reni rlajzpac jiu'reni lo xcäl̄rnibee Dios ni yu' xhaguibaa con yäl̄rdxe'ch, sas reni nadxecha' rlajzreni cuäxuuni xcäl̄rnibee Dios. ¹³ Guiraa reniguii ni gunni xtidx Dios näjza xleii Moisés, gunixgaaren̄i recos ni churu gac, galooli hasta che biäädli Juan Bautist. ¹⁴ Palga rlajztu chalilajztu, lagajc Juan najc Elías, niguii xten Dios nani bia'n diidx jääd. ¹⁵ Nani sobdiajg diidx, gucudiajgni.

¹⁶ ¿Xhicojn guntebloä rebejn̄ nani tre' naj, ä? Najceni si'c najc rebuuux nani rguijt nez lo guii cadre rdo', rbejdxreni lo sa'reni, ¹⁷ rniireni: "Biel̄nu bizej te guya'tu luxh ditu nuya'. Dxejcti biel̄nu redij ni nabaduxh luxh dizatu nioon." ¹⁸ Sa'csi che biääd Juan dini niajw dizani niä', luxh räjp rebejn̄ najcni te xpejn̄ bendx̄ab. ¹⁹ Dxejcti biäl̄ä narä, Xi'n Dios ni gujc Niguii, rauä, rä'ä dxejcti räjp rebejn̄: "Niguiire rauxha't, rätejzani bin, najcni xamigw rebendoj̄l näjza reniguii ni ruquijx xcuent reyuj ni rajx lo gubier." Luxh loj rebejn̄ ni najc xpejn̄ Dios yuduxh xcäl̄najn Dios, ni'cni baxhal̄ni guiro'p rebejn̄re.

Reguejdx guyalajz
(Lc. 10:13-15)

²⁰ Dxejcti gusloj Jesús gudilnäjni rebenguejdx cadro benduxhni remilaagwr, sa'csi naaddireni gusiechlajzreni xtojłreni, sanuutis nabajłreni nen dojl. Dxejcti räjpni:

²¹ —;Gunatiru guedx Corazín! ;Gunatiro guedx Betsaida! Paru nen guedx Tiro näjza guedx Sidón niajc remilaagwr nani gujc guedx lajdxtu, cadxejli nusiejch lajzreni xtojłreni, cadxejli niajcwreni nen godx, nidäab cobdäj yejcreni. ²² Luxh rniä lojtu: che guidzujł dxej ni gun Dios xcälğuxhtisni, sidejdrutu castiigw loj rebejł ni guläjz guedx Tiro näjza guedx Sidón. ²³ Luj guedx Capernaum di gunlu xhigab chäslu xhaguibaa; jiäjt nen baa jiajblu, sa'csi paru nen guedx Sodoma niajc sa' remilaagwr nani gujc guedxlajdxlu, pet najli tresijc guejdxga. ²⁴ Luxh rniä lojtu, dxej ni gun Dios xcälğuxhtisni, trabajwduxhru tedtu loj rebejł Sodoma.

Coltaa loä, te gusilajztu
(Lc. 10:21-22)

²⁵ Laa dxejcni räjp Jesús:

—Rliä'pä xpala'nlu Xtadä, Dad xten xhaguibaa näjza guedxliuj, sa'csi bacua'tzlu recosre lo rebennajł, lo rebejł ni racbee, te baluiiluni loj rebennadolajz ni najc si'c biuxbäz. ²⁶ O'n. Guliini, Xtadä, sa'csi rujnlu xhigab si'c najc hueen gacni.

²⁷ 'Guiraa recosre abaniidx Xtadä loä, rutru numbeedi xingaanni; xtadtisni rumbeeni. Rutruza numbeedi xtadni, xtebtis xingaanni, näjza loj renani gudeed xingaanni gumbee xtadni.

²⁸ Col_ltaa loä guiraatu nani abadxajg, nani rsina', narä sunidxä yäl_rusilajz lojtu. ²⁹ Col_guisieed guntu dzuun si'cni ruluiätu. Col_huii xho runä, xho nacä nadolajz, dizana gacä be_nnayedxlajz ne_n lastoä, ni'cni sidxäl xaimtu yäl_rusilajz. ³⁰ Sa'csi guyasi najc xtzunä ni ruluiätu, dizani gac naganduxh.

12

Rutie' rexpejn Jesús triuu dxej ni rusilajzreni (Mr. 2:23-28; Lc. 6:1-5)

¹ Che sasaj Jesús nez loj reyuj cadre naga' triuu, luxh dxejga najc dxej ni rusilajz rexpejn Israel, calaan rexpejn_{pac}ni, guslojreni calädxa'reni doj lo triuu te cayajwrenini. ² Che bahuii rebe_n guidoo ni laa farisee, räjpreni loj Jesús:

—Ahuii xho rujn rexpejn_{pac}lu dzuun nani di nungäj_l gunreni dxej nani rusilajz bejn.

³ Luxh laani räjpni lojreni:

—¿La gajdtu go_l xhi caj loj reguijtz xcuent ni bejn toDavid che gulannäjni rexpejn_{ni}, ä? ⁴ Biu'reni xquidoo Dios, gudajwreni yätxtiil nani di nungäj_l gauni, nicla laani, niclaza rebejn nani sanäni, sa'csi yätxtiilga rebixhojztis rajwni. ⁵ O ¿la gajdtu go_l lo reguijtz xten leii cadre caj xcuent rebixhojz, ä? Laareni riu'reni ne_n reguidoo dxej ni rusilajz bejn, rujnreni xtzunreni niluxh xhet dojd_idi rujnreni. ⁶ Narä rniä lojtu, ree suga' tej nani saj_{cru} loj guideoga. ⁷ Paru niacbeetu xhi säloj dee: “Yäl_rulaslajz rlazä, xhet yäl_rejtdi guidxaa”, ditu nucuaquij redee ni xhet bejn_{di}. ⁸ Sa'csi narä Xi'n Dios ni gujc Niguui rnibeä dxej ni rusilajz rebejn.

Niguii ni rxu'n naani
(Mr. 3:1-6; Lc. 6:6-11)

⁹ Che birii Jesús ro'c, biu'ni te xquidobäzreni.
¹⁰ Ro'c suga' te bejn ni gubijdz te naani. Luxh sa'csi caguilreni xho gucuaquijreni Jesús, gusloj canabdiidxreni lojni, räjpreni:

—¿La rusaan leii gusiajcní beñracxhuu dxej ni rusilajz bejn, ä?

¹¹ Badzu' Jesús diidxre lojreni, räjpni:

—Chutejtu ni rajp te xiil niluxh palga guitejbni neñ bisie che gal dxej ni rusilajz bejn, ¿xhixh dini cuää xiilga neñ bisie, ä? ¹² Sacduxhru te bejn loj te xiil, ni'cni susaan leii gun bejn dzunsa'c dxej nani rusilajz bejn.

¹³ Dxejcti räjpni loj dade'ga:

—Baslii naalu.

Che basliinini, dxejc biajc naani, gujcní tebloj si'c najc stelaad naani. ¹⁴ Dxejcti birii rebeñ guidoo ni laa farisee, bachagsa'zarení te bia'nrení diidx ju'trení Jesús.

Diidx ni guniireni xcuent Jesús

¹⁵ Che gucbee Jesús xhi xhigab cayujnreni, biriini ro'c. Xhidajl bejn sanajlní, dxejc basiajc Jesús guiraa rebeñracxhuu. ¹⁶ Dxejc räjpni lojreni:

—Na'cpac gäbrení chu najcni.

¹⁷ Si'c gujc te gusojb diidx ni gunii Isaías ni gunii xtidx Dios che räjpni:

¹⁸ Deeni najc xmosä nani aguleä, laani sanälazä, laani rbanälazä, sudedä sprit xtenä lojni te gusule'ni yälguxhtis xtenä lo guedxliuj.

¹⁹ Dini tilnä j bejn, dizani cuedxa'; rudza jiejn di diajgni xse'ni lad nezyuj.

20 Dini qui'ch nicla te nijt ni cabiejc,
dizani gusuii te duxiil ni cayujn guxh,
dxejli che gunni gaan guinibeeni yäl̄guxhtis.

21 Lajtisni sustioob lastoo reben̄ ni digac xpejn̄
Israel.

*Rucuaquijreni Jesús rajpni yäl̄rnibee xten ben̄dxab
(Mr. 3:19-30; Lc. 11:14-23; 12:10)*

22 Dxejcti biädnäreni loj Jesús te bejn̄ ni di fii,
dizani guinii, yu' te ben̄dxab lastooni. Dxejcti
basiajc Jesúsni, te gujc guniini, te gujca bahuiini.

23 Guiraa rebejn̄ bidxelojreni, räjpreni:

—¿Xhaa laa Xi'n toDavidni, ä?

24 Che biejn̄ diajg reben̄ guidoo ni laa farisee
rediidxga, räjpreni:

—Bejn̄re rbää reben̄dxab con yäl̄rnibee xten
Beelzebú ni rnibee loj reben̄dxab.

25 Che gucbee Jesús xhi xhigab cayujnreni, dxejc
räjpni:

—Guiraa yäl̄rnibee nani rlia' sa'ni sinitloj; te
guedxro sigajc te famil nani rlia' sa'reni, nani
ridil̄näj sa'reni, sinitlojreni. 26 Sigajcza palga

ben̄dxab rbää saben̄dxabni, silia' sa'reni, dxejc
¿xho gac chanuu xcäl̄rnibeereni? 27 Palga narä

rbää reben̄dxab con yäl̄rnibee xten Beelzebú, ¿chu
xcäl̄rnibee rajc rbää rexejntu ben̄dxab, ä? Ni'cni
lagajc laareni suluiireni xhet laadi rujntu xhigab.

28 Palga narä rbää reben̄dxab con Xp̄rit xten Dios,
guliipacni abidzujn̄ xcäl̄rnibee Dios lojtu.

29 'Bahuilaare. ¿Xho gac jiu' te bejn̄ cuan rolijz
te ben̄daan, xho gac cuanni xhixten bejn̄ga, palga
dini gulibxgaani ben̄daanga? Che abiliib bejn̄ga,
sajc cuanni rexhixten bejn̄ga.

³⁰ 'Nani xhet yu'di xladä, rdxe'chni loä. Nani di jiädnajl narä, rutie'chni reni siädnajl narä.

³¹ 'Ni'cni rniä guira'ti dojl, guira'ti yälrusguee xte bejn sajc gusiäjł lajzni xtebtis yälrniyaj Sprit Dxiän xten Dios di Dios gusiäjł lajzni. ³² Chutis ni guinii xhi te diidx yälrniyaj Xi'n Dios ni gujc Niguii sajc gusiäjł lajzni, luxh chutis ni guiniyaj Sprit Dxiän xten Dios, di Dios gusiäjł lajzni, nicla lo guedxliujre, niclaza xhaguibaa.

Sajc gumbeetu bejn xcuent diidx ni rniireni
(Lc. 6:43-45)

³³ 'Palga nasa'c te yajg sicaj ninexhsa'c lojni, per che di yajg gac yagsa'c, xho xcaj ninexhsa'c lojni. Ni'cni huenliisi siembeetu te yajg che fiitu xho najc ninejxh ni rcaj lojni. ³⁴ Sa' la'tu benguijdx ni najc si'c te bäl niälasduxh, ¿xho gac guiniitu te didxsa'c?, ni ro' bejn rniitis rexhigab ni yu' neñ lastoo bejn. ³⁵ Te beñsa'c rniini didxsa'c, sa'csi ganax xhigabsa'c yu' neñ lastooni, te benguijdx rniitisni cosguijdx sa'csi ganax xhigabguijdx yu' neñ lastooni. ³⁶ Narä rniäza, guiraa redidxguijdx nani rni bejn sudeedreni cuent lo Dios cheni gunni yälguxhtis, ³⁷ sa'csi lagajc rextiidxlu sujn guinii Dios najclu beñsa'c, lagajc rextiidxlu sujn gunijtlu lo Dios.

Rebenguijdx rniab te milagwr si'c te seen
(Mr. 8:12; Lc. 11:29-32)

³⁸ Dxejcti rebejn ni ruluii xleii toMoisés näjza reben guidoo ni laa farisee, räjpreni loj Jesús:

—Mastr, nuurnu rlanjnu guihuiinu te seen; bejn te milagwr te fiinuni.

³⁹ Badzu' Jesús diidxre, räjpni:

—Rebenguijdx ni rusguee rniab te seen, niluxh xhetru seendi fiireni xseentis Jonás, dade' ni gu-nii xtidx Dios. ⁴⁰ Sa'csi lagajc si'cni guyu' Jonás xque' te bälro choñ dxej, choñ yääl, si'cza chu Xi'n Dios ni gujc Niguii neñ lastoo guedxliuj choñ dxej, choñza yääl. ⁴¹ Cheni gac yälguxhtis xten Dios pet sistie rebejn ni siääd Nínive te fiireni gac yälguxhtis rebejn ni tre' lo guedxliuj naj, niluxh säjb rebejn Nínive abanijt rebejnre sa'csi rebeñ Nínive basiejch lajzreni, bia xtojlneni che basule' Jonás xtidx Dios lojreni. Luxh nani yu' lojtu naj, sacduxhruni loj Jonás. ⁴² Näjza reiñ xten rebeñ sur sistieni te fiini gac yälguxhtis rebejn ni tre' lo guedxliujre naj, niluxh näjzani säjbni abanijtreni. Sa'csi laani zitduxh biriini te biädcuadiajgni reyälñajn xten Salomón, luxh nani yu' lojtu naj nanduxhruni loj Salomón.

Te spritdxuudx ni rbisac

(Lc. 11:24-26)

⁴³ Räjpzani:

—Cheni rii te spritdxab neñ lastoo te bejn, ricanzajni nez lo reyubijdz, ritiilni cadro gusilajzni, per cad rdxäldini. ⁴⁴ Dxejcti rujnni xhigab, naani, guibisacä cadro biriä. Cheni rbisacni ro'c, rdzujnni si'c rdzujñ te bejn neñ te yu' ni naya neñni, naliobsa'cni, sucheeni, luxh rut rbäjzdi ro'c. ⁴⁵ Dxejcti rijni, rixiini sgajdz sprit nani najc nadx-uudxru lojni te jiädlänäjrenini neñ lastoo bejnga. Dxejcti rxhiñduxhru bejnga lojni gujcn galoo. Sigajcza gac rebejn ni tre' lo guedxliujre naj.

Xnan Jesús con rebejtzni

(Mr. 3:31-35; Lc. 8:19-21)

⁴⁶ La_l ni caninäjni rebejn, bidzujn xnanni con rebejtzni, suga'reni rolä' r_lajzreni guiniireni lojni.

⁴⁷ Dxejcti biääd tej ni räjp loj Jesús:

—Xnanlu näjza rebejtzlu suga' rolä' r_lajzreni guininäjreni luj.

⁴⁸ Laani badzu'ni diidx lo bejn_ga räjpni:

—¿Chuni'c najc xnanä? ¿Chuni'c najc rebetzä?

⁴⁹ Dxejcti basgaani naani nez loj rexpejn_pacni, räjpni:

—¡Redee najc xnanä redeeza najc rebetzä!

⁵⁰ Chutis nani rujn si'cni rnibee X_tadä ni yu' xhaguibaa ni'c najc betzä, ni'c najc bisianä, ni'cza najc xnanä.

13

Xcuent bejn nani rbe'c binij

(Mr. 4:1-9; Lc. 8:4-8)

¹ Lagajc dxejga birii Jesús royu'ga, huicueni nez ro' nisdoo. ² Xhidalduxh bejn bire' cadro suga'ni, sas biu'ni neñ te barcw, ro'c gurejni. Dxejcti rebejn gurej nez lo plaii. ³ Dxejc gusloj caguluii Jesús con recuent, räjpni:

—Co_lcuadiajg. Birii te dade' ni rbe'c binij te cue'cni binij. ⁴ La_l ni cabe'cni binij yu' binij ni bitejb gajxh nez ro' nesiuj, biääd remane' ni rutajt, sas gudajwreni binijga. ⁵ Yu' binij ni bitejb nez neñ reguij cadro guxii yu' yuj. Gulengajc binijga sa'csi direni nibej jiät neñ yuj. ⁶ Che birii gubijdx, bigolreni sa'csi xhetiza xlobaani, dxejc gubijdzni. ⁷ Yu'za binij ni bitejb neñ reguejch. Che guroob reguejchga, dini nusaan niroob regäjlé', gubijdzitireni. ⁸ Guyu' binij ni gurej lo reyusa'c,

ro'c gucduxhni. Yu' binij cuaj te gayuu, yu'za binij cuaj gayojñni, yu'za ni cuaj galbitzuuni loj cade tej binij ni gurej. ⁹ Nani rsobdiajg diidx gucuadiajgni diidxre.

Xhi pajr najc recuent xten Jesús

(Mr. 4:10-12; Lc. 8:9-10)

¹⁰ Dxejcti gubig rexpejn̄pacni, gunabdiidx lojni, räjpreni:

—¿Xhicuent rusule'lu diidx loj rebejn̄ con recuent?

¹¹ Dxejcti badzu' Jesús diidx rajpni lojreni:

—Sacnäj Dios la'tu te gacbeetu recos xhiga'tz xten xcäl̄rnibee Dios xhaguibaa, luxh laareni digacdi gacbeerenini. ¹² Chutis ni arajp yäl̄racbee, sica'runi te gapruni yäl̄racbee. Sas nani guxii rajp yäl̄racbee, guiraa yäl̄racbee ni rajpni sibicaj. ¹³ Ni'cni rniä lojreni con recuent sa'csi mase cadx-elojreni, direni fii, mase cacuadiajgreni di diajgreni jiejn, xhet racbeedireni. ¹⁴ Laareni najcreni si'c te soob diidx ni gunii Isaías, dade' ni gunii xtidx Dios, che räjpni:

Siejn diajgpactu, niluxh xhetliidi gacbeetu, sidxelojpacu, niluxh ditu fii.

¹⁵ Sa'csi guyalajz rebejn̄re, lastooreni najc si'c te guij,

di diajgreni jiejn,
luxh niä'uzä balojreni, didi fisa'creni con balojreni,
didi jiejnza diajgreni, didi gacbeezä lastooreni,
didi gusiejch lajzreni guibi'reni loä te gusiacä lastooreni.

¹⁶ 'La'tu col̄guibalaznäj balojtu sa'csi rhuisa'ctu, riensa'cza diajgtu. ¹⁷ Rniliäpac, xhidajl redade' ni gunii xtidx Dios, näjza xhidajl beñsa'c rlazduxh

nuhuii sa' recos ni cahuiitu, luxh direni nuhuiini, rlanjreni niejn diajgreni sa' rediidx nani cayejn diajgtu, luxh di diajgreni niejnni.

Rusule' Jesús xcuent bejn ni rbe'c binij

(Mr. 4:13-20; Lc. 8:11-15)

¹⁸ 'Colcuadiajg xhi säloj xcuent bejn nani rbe'c binij. ¹⁹ Rebejn nani rucuardiajg diidx xten xcälrnibee Dios, niluxh direni gacbeeni, najczeni si'c najc binij nani bitejb nez ro' nesuyj; riääd beñdxab rudzucajni rediidx nani biu' neñ lastooni. ²⁰ Rebinij nani bitejb nez neñ reguij, najc si'c rebejn nani rucuardiajg diidx, gustli rca'reni diidxga, ²¹ luxh guxii yu' xlobaani, direni sutijp. Che rdej-dreni trabajw, che rdxe'ch bejn lojreni, sa'csi rucuardiajgreni xtidx Dios, rusiejch lajzreni, rbälazni diidxga. ²² Rebinij nani gurej neñ reyaguejch säloj rebejn nani rucuardiajg rextidx Dios rujnrureni te gunreni dzuun te ga'preni yäl'nasa'c ni yu' lo guedxliujre. Dxejcti rexcäl'nasa'c xten guedxliujre rusgueereni. Guiraa recosre rutau lo xtidx Dios neñ lastoo rebejnre, dini gusaan gac te cosechsa'c neñ lastoo rebejnre. ²³ Dxejc rebinij nani rtejb lo reyusa'c, ni'c najc si'c rebejn nani rucuardiajg xtidx Dios, nani racbee diidxga, nani rutie'ru sa'reni te racxhidajlreni. Yu' bejn ni najc si'c binij ni gujc te gayuu; yu' bejn ni najc si'c binij ni gujc gayojn; yu'za bejn ni najc si'c binij ni gujc galbitzuu.

Xcuent triuu cadre guyu' cuanguejch

²⁴ Dxejc bij Jesús stee cuent, räjpni:

—Xcälrnibee Dios xhaguibaa najc si'c te bejn nani gule'c ganax triusa'c lo xyujni. ²⁵ Lal na-gaguejs bejnnga, biääd te bejn nani rdxe'ch lajz

loj xpaxhuaan binijga, biädle'cni bedz cuanguejch lo xtriuu bejn̄ga, dxejcti sääni. ²⁶ Cheni gulejn triuuga, birii doj lojni, dxejc biricaj näjza cuanguejch ro'c. ²⁷ Dxejcti räjp remos lo xlamreni; “Dad, ¿la et ganax triusa'c di gule'clu, ä? ¿Caxh bazaj cuanguejchre?” ²⁸ Räjp xlamreni: “Te bejn̄ ni rdxechlajz loä biädle'cchani.” Dxejcti gunabdiidx rexmosni räjpreni: “¿La rlajz guejblu cholädxa'nu recuanguejchga, ä?” ²⁹ Dxejc räjp xlamreni: “Na'c, sa'csi che guiliäädxtu cuanguejchga, nägajcza triuu guiliäädxtu. ³⁰ Colsaan tioobreni tebloj. Che guire' cose'ch, dxejc guinibeä remos gutiexgaareni cuanguejch, guliibrenini gacni ters, dxejcti checni. Dxejcti sajc gutie'reni triuu chucheeni nen̄ yu'.”

Xcuent bedz muxhtas
(Mr. 4:30-32; Lc. 13:18-19)

³¹ Bijza Jesús stee cuent räjpni:

—Xcäl̄rnibee Dios xhaguibaa najcni si'c te bedz muxhtas nani cue'c te bejn̄ lo xyujni. ³² Gulii bejdzga najc bäze'ru loj guiraa rebejdz, per che roob yajgga, rajcni guroobru loj guiralii recuaan, rajcni te yagro, luxh riääd remane' ni rutajt riädyujn xpitiäözreni lo xajcw yajgga.

Xcuent levaduur
(Lc. 13:20-21)

³³ Bijzani stee cuentre, räjpni:

—Xcäl̄rnibee Dios xhaguibaa najc si'c levaduur nani rugu'ch te gunaa lo choñ mediid arin̄, dxejc ni'c rusaguijni guideb cojbga.

Xhicuent baluii Jesús ganaxtis con cuent
(Mr. 4:33-34)

³⁴ Baluui Jesús guiraa rebejn ganaxtis con recuent, xhetiru stee mood nuluiini, ganaxtis con cuent guniini lojreni. ³⁵ Si'c bejn ni te guzojb xtidx dade' ni gunii xtidx Dios che bacuaani lo reguijtz, räjpni:

Suiyä diidx con recuent,
suiyä diidx xcuent recos ni naga'tz che bencheeli
Dios guedxliuj.

Rusule' Jesús xcuent cuanguejch nen triuu

³⁶ Dxejcti basadiidx Jesús rebejn, biu'tini nen yu' cadro bire' rexpejn pacni lojni, räjpreni lojni:

—Basule' loonu xcuent cuanguejch ni guyu' loniaa.

³⁷ Räjp Jesús lojreni:

—Bejn nani rbe'c retriusa'c, najc Xi'n Dios ni gujc Niguii; ³⁸ loniaaga najc guedxliuj; retriusa'c najc rebejn nani najc xpejn Dios, nani rucuaadi-ajg xtiidxni; recuanguejchga najc rebejn ni najc xpejn bendxab. ³⁹ Bejn nani rdxe'ch lajz najc lagajc bendxab. Cose'ch säloj che nitloj guedxliuj; reni gutie' cose'ch najc rexangl Dios. ⁴⁰ Sigacni guire' recuanguejch te chääni lo guiboo te checni, sigajcza gac che gac fis guedxliuj. ⁴¹ Xi'n Dios ni gujc Niguii suxhal rexanglni te jäädgutie'reni, te jäädlääreni lo xcälrnibeeni guiraa renani rujn riajb bejn nen dojl, näjza reni rujn cosguijdx. ⁴² Susälreni rebejnga nen te or cadro cayecduxh. Ro'c sonduxhreni, sauya'reni läijyreni. ⁴³ Dxejcti rebensa'c sidimbicha'reni si'c gubijdx lo xcälrnibee Xtadreni. Palga sobdiajgtu, colgucuaadiagsa'c.

Te cossacduxh ni naga'tz

⁴⁴ Räjzpzeni:

—Si'cza xcäl̄rnibee Dios xhaguibaa najc si'c te cossacduxh ni naga'tz lo te yuj loniaa. Bidxäl te dade'ni, luxh bacuatzsacnini. Dxejcti rbalajzni, huijni, huito'ni guiraa xhixtenni te rajpni meel siini yujga.

Perl nani sacduxh

⁴⁵ Räjpzani:

—Xcäl̄rnibee Dios xhaguibaa najcza si'c najc te dad rapduxh nani caguil perlsa'c te siini. ⁴⁶ Che bidxäl̄ni te perlsa'c, tejni sacduxh, bato'ni guiraa xhixtenni te gusiini perlga.

Guijxh ni rniaaz bäj̄l

⁴⁷ Räjpzani:

—Xcäl̄rnibee Dios xhaguibaa najcza si'c te gui-jxh ni rusäl̄ bejn̄ lo nis te rniaazreni guiraloj cuaa bäj̄l. ⁴⁸ Cheni agudxajni, rbäärenini nez ro' nisdoo, te ro'c rbereni loj rebäj̄l. Rebäj̄l ni najc hueen ruceeni nen̄ te dxijm̄; nani di gac hueen rusäl̄renini te laad. ⁴⁹ Si'cza gac che gac fis guedxliuj; sirii rexangl Dios te sudzucajreni rebeṅguijdx lo rebeṅsa'c. ⁵⁰ Dxejcti susäl̄reni rebeṅguijdx nen̄ te oṛ cadro cayecduxh; ro'c son-duxhreni, sauja'reni läjyreni.

Te beṅ rajp

⁵¹ Dxejcti gunabdiidx Jesús lojreni, räj̄pni:

—¿La racbeetu guiraa ni caniä lojtu, ä?

Dxejcti räj̄preni:

—O', racbeenuni Dad.

⁵² Dxejcti räj̄pni lojreni:

—Cheni rsieed te bejn̄ nani najn leii xcuent yäl̄rnibee xten Dios xhaguibaa, najcni si'c te lam̄

nani rajc rbää lo rexcäl_nasa'cni recos ni nacoob, näjza recos bieju.

Jesús lo guedx Nazare't

(Mr. 6:1-6; Lc. 4:16-30)

⁵³ Che gulujx basule'ni recuentre, biriini ro'c, sääni. ⁵⁴ Huijni lagajc lajdxni. Ro'c gusloj caguluiini neṅ xquidobäzreni ro'c. Dxejcti rdxeloduxh rebeṅ ro'c, räjpreni:

—¿Caro bisieedni reyäl_najnre? ¿Xho rajc rujnni remilagwr? ⁵⁵ ¿La et laadi dee ni najc xi'n carpin-teer, ä? ¿La et Mariidi najc xnanni? Dee ni najc bejtz Jacob, José, Simón con Judas. ⁵⁶ Luxh rebisiajnni rbäjzreni lo guejdxre. ¿Cacharo bisieedni guiraa nani caguluiini?

⁵⁷ Dxejcti cayujnreni xhigab chugan la guliini, dxejc räjp Jesús lojreni:

—Guiraa rebejṅ rinälajz te niguii nani rnii xtiidx Dios, biädla rebeṅ lajdxpacni direni jiu xtiidxni.

⁵⁸ Ni'c dini niujn xhidal milagwr ro'c sa'csi direni chalilajz xtiidxni.

14

Che gujt Juan Bautist

(Mr. 6:14-29; Lc. 9:7-9)

¹ Lagajc neṅ redxejga Herodes, ni laaza tetrarca, biejn diajgni diidx xcuent ni cayujn Jesús. ² Dxejc räjpni lo rexmosni:

—Dee najc Juan Bautist. Pet agubaṅsacni lo rebeṅgut, ni'cni rajpni yäl_rnibee te rujnni remilagwr.

³ Si'c gunii Herodes sa'csi laani basäuuni Juan neṅ latzguiib. Niluxh gunibeeni biliibni con caden neṅ latzguiib xcuent Herodías, ni gujc chää

bejtzni Felipe. ⁴ Bidxe'chni sa'csi räjp Juan lo Herodes:

—Et laadi rujnlu rbäznäjlu chääl bejtzlu.

⁵ Rlajz Herodes nugu'tni Juan, luxh rdxejbni rebeñguejdx, sa'csi guiraareni rniireni Juan najc te niguii ni rnii xtidx Dios. ⁶ Dxejc che gojl laj Herodes gujc lanij, birii xindxa'p Herodías te baya'ni nez loj regolnejdx. Luxh sa'csi bidxaglaz-duxh Herodes baya'ni, ⁷ räjpni loj gunaaga:

—Gunab xhitis ni rlajzlu, sa'csi gudix lazä gu-nidxä ni guiniabtislu.

⁸ Dxejcti gunaaga, abalijdx xnannini, räjpni lo Herodes:

—Loj te platón baniidx bitiuvej Juan Bautist.

⁹ Diidxga benhuin lastoo reii Herodes, per sa'csi abia'n diidx, niluxh abiejn diajg rebejn, gunibeeni gudeedreni nani guiniab gunaaga. ¹⁰ Dxejcti gunibeeni biru' yejc Juan Bautist neñ latzguiib. ¹¹ Sas biädnäreni yejcni lo te platón, badeedrenini loj gunaaga. Dxejcti gunaaga badeednini lo xnanni.

¹² Dxejcti bidzujñ rexpejn Juan sanäreni to-goolga te huicua'tzrenini. Dxejcru huisa'nreni diidx loj Jesús.

Bayaan Jesús gaii mil bejn

(Mr. 6:30-44; Lc. 9:10-17; Jn. 6:1-14)

¹³ Che biejn diajg Jesús xhi guzajc Juan, xtebni huä'pni neñ te barcw huijni stee laad nez lo reyu-bijdz. Che gucbee rebejn caro sääni, huinajlreni Jesús lo yuj. Guiraa neñ reguejdxga biriireni.

¹⁴ Che birii Jesús neñ barcw, bahuiini loj xhidalduxh bejn, dxejc balazlajznireni, basiajcnii rebejn

nani racxhuu. ¹⁵ Cheni acayu' guxhijñ, gubig rexpejn̄pacni lojni räjpreni:

—Rut rbäjzdi nez lo reyubijdzre, niluxh agudxej naj. Basadiidx rebejn̄ te jiireni nez rerench te chasiireni xhi gaureni.

¹⁶ Räj̄p Jesús:

—Xhicuent jiireni. La'tu colgudeed xhi gaureni.

¹⁷ Dxejcti räjpreni:

—Xhetru rajpdinu ree. Gaiitis yätxtiil näjza tio'p bäj̄l rajpnu.

¹⁸ Laani räjpni:

—Coltanäni ree.

¹⁹ Dxejcti gunibeeni gurej rebejn̄ lo guixa'. Dxejcti cua'ni guigaii yätxtiil näjza guiro'p bäj̄l, guläsni lojni xhaguibaa, badeedni xquixhtios lo Dios, dxejcti gula'ni reyätxtiil. Badeednini loj rexpejn̄pacni. Dxejcti rexpejn̄pacni gudisrenini loj reben̄ xhidajl.

²⁰ Guiraareni gudajw, gudxaj xque'reni. Dxejcti batie'reni yätxtilbiujy nani bia'n. Si'cti tzubitio'p dxijm̄ gudxajni. ²¹ Renani gudajw najcreni si'cti gaii mił niguii, xhet näjdi regunaa niclaza rebiuux bigab.

Gusaj Jesús lo nisdoo

(Mr. 6:45-52; Jn. 6:16-21)

²² Sas gunibee Jesús biu' rexpejn̄pacni nen̄ barcw te ganidreni tedreni stee lad nis lałni casadiidxni rebejn̄. ²³ Che gulujx basadiidxni rebejn̄, huä'p Jesús yecdajn te xtebni guninäjni Dios Xtadni. Che gojl guxhijñ, ro'c sugaxteb Jesús. ²⁴ Luxh barcw galäi lo nis sasaj. Cagusnibduxh reol̄ barcw, liriääzni lo nis sa'csi cabi' beduxh cadre sääreni. ²⁵ Rsildooru gubig Jesús, bidzujñni lojreni, siädsajni

lo nisdoo. ²⁶ Che bahuii rexpejn_{pacni} siädsajni lo nisdoo, bidxejbreni, räjpreni:

—Colh_huii te fantasmni —guredxa'reni sa'csi bidxebduxh_hreni.

²⁷ Dxejc gunii Jesús lojreni, räjpni:

—Na'c guidxejbtu, laa naräni; col_sutijp lastootu.

²⁸ Dxejcti gunii Pedr lojni, räjpni:

—Dad, palga lujni, gunibee j_jälä lojlu nez lo nisre.

²⁹ Räjp Jesús:

—Gudaa pues.

Dxejcti birii Pedr ne_n barcw gusajni lo nis te sääni nez loj Jesús. ³⁰ Che bahuii Pedr beduxh ni cabi', bidxejbni, dxejc gusloj cayääzni ne_n nisdoo. Guredxa'ni, räjpni:

—Dad, j_jgulää narä!

³¹ Lagajc dxejc gunaaz Jesús _naani, räjpni loj Pedr:

—Guxii rajplu yäl_rirililajz. ¿Xhicuent guctio'p lajzlu?

³² Che huä'preni ne_n barcw, guläzgjajc bej.

³³ Dxejcti renani sää ne_n barcw bazuxhijbreni nez loj Jesús räjpreni:

—Guliipacni najclu Xi'n Dios.

*Basiajc Jesús reben_n racxhuu guedx Genesare't
(Mr. 6:53-56)*

³⁴ Che gudejdreni lo nis, bidzuj_nreni nez lo reyuj xten Genesare't. ³⁵ Che biembee reben_n ro'cni, batie'chreni diidx guideb gabi lajdxreni. Dxejcti biäd_näreni guiraa reben_n racxhuu lojni. ³⁶ Gunabduxh_hreni gusaanni ca_nreni ro' xhajbtisni. Dxejcti guiraa renani gudaj_n xhajbni, biajcreni.

15

Nani ruxhiṅ bejṅ

(Mr. 7:1-23)

¹ Dxejcti gubig gaii rebejṅ nani ruluii leii nājza rebejṅ guidoo ni laa farisee. Siädreni guedx Jerusalén, räjpreni loj Jesús:

² —¿Xhicuent di rexpejṅpaclu jiu xcostrumbr rebeṅgool? ¿Xhicuent direni gusoob yälrdiib ṅaareni che rajwreni?

³ Badzu'ni diidx, räjpreni:

—¿Xhicuent di la'tu gusoobzatu xtidx Dios? Dee alga riurutu rexcostumbrtu. ⁴ Dios gunibeeni xho guntu che räjpreni: “Gojp xpala'n xtadlu, xnanlu”, nājza “Nani guiniyaj lo xtadni o loj xnanni, suguetni.” ⁵ Luxh la'tu rniitu sajc gāb chutis bejṅ loj xtadni o loj xnanni: “Digacdi gacnāātu sa'csi guiraa ni rapā abadedāni lo Dios.” ⁶ Luxh chutis ni guinii si'c, xhetru nanabdi gacnājni xtadni o xnani. Si'c ni cabälaztu rextidx Dios te gac chanuutu rexcostumbrtu. ⁷ ¡Bejṅ ni rusguee najctu! Laaca gunii Isaías, bejṅ nani gunii xtidx Dios xcuenttu cheni räjpreni:

⁸ Rebeṅguejdxre con ro'reni rliä'preni xpala'nä niluxh lastooreni zijt suga' nez loä.

⁹ Xlia'si rajpreni narä, sa'csi ruluiireni si'c xtidxä reyälrnibee xten rebeṅ guedxliuj.

¹⁰ Dxejcti gurejdxni rebejṅ, räjpreni lojreni:

—Colcuadiajg, colyacbee. ¹¹ Nani riu' ro' bejṅ di guxhiṅ bejṅga, sanga nani rii ro' bejṅga ni'cni ruxhiṅ bejṅga.

¹² Dxejcti rexpejṅpacni gubig lojni, räjpreni:

—¿La najnlu bidxe'ch rebejn farisee che biejn diajgreni diidx ni guniilu?

¹³ Dxejc laani räjpni:

—Xhitis yajg nani di Xtaä ni yu' xhaguibaa nusuj siliädx'a'ni guideb xlobaani. ¹⁴ Colgusaanreni; lotiä'preni, ruluiireni nezyuj lo salotiä'preni. Luxh palga te beñ lotiä'p guluii canejz chää stee lotiä'p, guiro'preni sitejbreni neñ te gueed.

¹⁵ Räjp Pedr loj Jesús:

—Basule' cuentre loonu.

¹⁶ Räjp Jesús:

—¿La näjza la'tu ditu gacbee, ä? ¹⁷ ¿La ditu gacbee guiraa ni rajw bejn ru' xque'ni, dxejcti che rdejdni xque'ni, abigo'n'ni? ¹⁸ Niluxh diidx nani rii ro' bejn, neñ lastoo bejn riini; dee ni ruxhiñ bejn. ¹⁹ Sa'csi neñ lastoo bejn rii rexhigabguijdx xten rebejn ni rugu't sa'ni; xten rebejn ni rusguee gunaa; xten rebejn ni rusguee chää'l sa'ni; xten rebejn ni rbajn; xten rebejn ni rnii didxxhii lo sa'ni; xtenza rebejn ni rutijl sa'ni. ²⁰ Laa sa' recosre ni ruxhiñ bejn. Che dini gusoob recostumbr xte yälrdiib ñaani, di ni'c guxhiñ bejn.

Te gunazit nani huililajz xtidx Jesús

(Mr. 7:24-30)

²¹ Biriiti Jesús ro'c, sääni nez región xten Tiro näjza Sidón. ²² Nejzga rbäjz te gunaa cananee, cabedxa'ni biäädni lo Jesús, räjpni:

—Dad, xi'n toDavid, balaslajz narä. Xindxa'pä yu' xpej beñdxab lastooni, niluxh cagusacsíduxhnini.

²³ Xhet räjpdi Jesús lojni. Dxejcti biädnaðduxh rexpejn pacni lojni, räjpreni:

—Barilaagw gunaare, didi rbedxa'ni siädnajl_{ni} luj.

²⁴ Dxejcti räjp Jesús lojni:

—Dios baxha_l narä lojtis xpe_n Israel nani agunij_t nen_n dojl.

²⁵ Dxejcti gubig gunaaga, bazuxhijb_{ni} nez loj Jesús, räjp_{ni}:

—Dad, gucnäj narä.

²⁶ Dxejc räjp Jesús lojni:

—Di gac hueen xca' bejn_n xcuxtiil rexi'nni gusäl_nini lo rebä'cw.

²⁷ Dxejc räjp gunaaga lojni:

—Guliini Dad, näjza rebä'cw rajw te la' yätxtiil ni rtejb lo mex xten xpaxhuaanni.

²⁸ Dxejcti räjp Jesús lojni:

—Nane', lacti guroob najc xcäl_ririlajzlu. Sugac si'cni rlajzlu.

Lagajc dxejc biajc xindxa'pni.

Basiajc Jesús xhidal be_n racxhuu

²⁹ Birii Jesús ro'c gudejdni nez ro' nisdoo ni laa Galilee. Huäpgajcni yejc te dajn, ro'c gurejni.

³⁰ Xhidajl bejn_n bidzuj_n cad sobga'ni. Siädnäreni rebe_n ni rajc ni'ni, rebe_n ni najc lotiä'p, rebe_n gop, rebe_n ni xheti naani, näjza xhidalro be_n racxhuu, bidzun_näjrenini nez loj Jesús. Dxejcti basiajc-nireni. ³¹ Ni'cni lacti bidxeloduxh rebe_n xhidajlga che bahuiireni rni regop, riajc reni xheti naani, rsiaj reni rajc ni'ni, ruhuii relotiä'p, dxejc rliä'preni xpala'n Xtios rexpe_n Israel.

Badeed Jesús xhi gudajw tajp mil bejn

(Mr. 8:1-10)

³² Gurejdx Jesús rexpejn_npacni räjp_{ni} lojreni:

—Riaä rebejnre sa'csi agujc chon dxej yunäjreni narä luxh xhet ca'direni gaureni. Di rlazä guxhaläreni jiireni rolijzreni palga gajdreni gau didi guidxajgreni lo nezyuj.

³³ Dxejcti räjp rexpejn_{pacni} lojni:

—¿Xho guidxälnu xhi gau reben_{xhidajlre} nez lo reyubijzre cadro rut rbäjzdi, ä?

³⁴ Räjp Jesús lojreni:

—¿Bal yätxtiil ca'tu?

Räjpreni:

—Gajdztisni, näjza gaii bälbäze'.

³⁵ Sas gunibee Jesús cue rebejn_{lo} yuj. ³⁶ Dxejc cua' Jesús guigajdz yätxtiilga näjza rebäj_l, badeedni xquixtios lo Dios dxejc gula'ni reyätxtiilga näjza rebäj_lga badeednireni loj rexpejn_{pacni}. Dxejcti laareni gudisreni yätxtiilga con rebäj_lga lo rebejn_{xhidajlga}. ³⁷ Guiraareni gudajw, gudxaj xque'reni. Che gulujx gudajwreni, batie'reni reyätxtiil ni bia'nga, gudxaj gajdz dxijm_{ni}. ³⁸ Renani gudajwga najc si'cti tajp mil_{bejn}, niluxh xhet näjdi regunaa niclaza rebiuux bigab. ³⁹ Dxejcti basadiidx Jesús rebejn_{biu'tini} nen barcw te gudejdni lo nisdoo nez región xten Magdala.

16

Reben_{guidoo} ni laa farisee näjza saducee rniabreni te milagwr si'c te seen

(Mr. 8:11-13; Lc. 12:54-56)

¹ Refarisee näjza resaducee bidzujn_{reni} lo Jesús, gunabreni gunni te milagwr, gudeedni te seen ni rien_{xhaguibaali}. Niluxh cagusguesireni, sa'csi

rlajzreni guiga' Jesús. ² Dxejc badzu' Jesús diidxre räjpni lojreni:

—Che rajl gudxej, rniitu: “Saru gac te dxej guixee sa'csi naxniaa xhaguibaa.” ³ Che rajl rsil rniitu: “Etladi gac te dxej nadxej sa'csi naxniaa xhaguibaa niluxh tre' za.” Xhoxh numbeetu xhi säloj reseen ni rien xhaguibaa, luxh ditu gumbee xhi säloj reseen xcuent redxejre, nalajznu recos ni cayajc. ⁴ Reben gujdxre, reben gualajz rniab te senro, te milagwr, luxh dirureni fii stee milagwr; suhuiitisreni xsen Jonás.

Dxejcti basa'n Jesúsreni ro'c, sä'tini.

Levaduur xten refarisee

(Mr. 8:14-21)

⁵ Che gudejd rexpejn pacni stelaad nisdoo biäl-lajzreni ninäreni yätxtiil. ⁶ Dxejcti räjp Jesús lojreni:

—Bacuadiajg, colnati levaduur xten refarisee näjza resaducee.

⁷ Dxejcti bejnreni xhigab nen lastooreni: “Si'c caniini sa'csi dinu niopnä yätxtiil.” ⁸ Luxh gucbee Jesús xhigabga, dxejc räjpni lojreni:

—¿Xhicuent rujntu xhigab xhet yätxtiildi ca'tu, ä? ¿Huinuxh najc xcälrlililajztu! ⁹ ¿La gajdtu gacbee? ¿La diza lajztu guinaj che gudisä gaii yätxtiil gudajw gaii mił bejn, ä? ¿Bal dxijmni batie'tu, ä? ¹⁰ ¿La diza lajztu guizaj che gudisä gajdz yätxtiil gudajw tap mił bejn, ä? ¿Bal dxijmni batie'tu? ¹¹ ¿Xhicuent ditu gacbee et yätxtiildi cagusä'tä cheni caniä lojtu colnati levaduur xten refarisee näjza resaducee?

¹² Dxej cru gucbeereni dini niäj p: “Coḷnati levaduur xten yätxtiil.” Laani caniini: “Coḷnaāti yälrlulii xten refarisee näjza resaducee.”

Bicäj p Pedr Jesús najc Cristpac

(Mr. 8:27-30; Lc. 9:18-21)

¹³ Che bidzuj n Jesús región xten Cesarea xten guedx Filipo, gunabdiidx Jesús loj rexpejn pacni, räj pni:

—¿Chu naj rebejn nacä narä Xi'n Dios ni gujc Niguui?

¹⁴ Laareni räj pni:

—Yu'reni naj luj najclu Juan Bautist; yu'zareni rnii luj najclu Elías, peta sgaiireni rnii luj najclu Jeremías o stee niguui ni rnii xtidx Dios.

¹⁵ Dxejcti räj pni lojreni:

—La'tu, ¿chuni'c rniitu nacä?

¹⁶ Dxejc räj p Simón Pedr:

—Luj najclu Crist, Xi'n Dios nani nabaj n.

¹⁷ Badzu' Jesús diidxre, räj pni:

—Chicbaalu, Simón Pedr, xi'n Jonás, sa'csi xhet bejn di baluii dee lojlu, Xtaätis ni yu' xhaguibaa baluiinini lojlu. ¹⁸ Narä rniä lojlu, luj najclu Pedr, nani säloj: “Te guij.” Sa'csi sibäxtiejlu guidxagsa'za renani rililajz xtidxä, niluxh che guetreni, direni nitloj. ¹⁹ Narä gunidxä yälrnibee lojlu te gulijdxlu rebejn nani ahuiliilajz xtidxä. Xhitis ni gusaanlu gunreni, o xhitis ni dilu gusaan gunreni, susoob Dios xtiidxlu.

²⁰ Dxejcti gunibee Jesús rutlojdi gäb rexpejn pacni laani najc Guejb Crist.

Gunii Jesús xho guetni

(Mr. 8:31-9:1; Lc. 9:22-27)

²¹ Lagajc dxejc gusloj cagusule' Jesús diidx lo rexpejn_{pacni}, guniini lojreni xho nanabpac chääni guedx Jerusalén te ro'c tedni trabajwduxh ladz_{naa} rebengool xten guidoo, ladz_{naa} rebixhojz, näjza rebejn ni najn xleii Moisés. Guniizani sugu'trenini, niluxh ni riojn dxej siba_{sacni} lo rebengut.

²² Dxejcti huinä Pedr Jesús te laad, gusloj cadiln_{ajnini}, räjpni:

—¡Gacnäj Dioslu, Dad! ¡Gurniälojlu gaclu si'c!

²³ Dxejc gubiré Jesús, räjpni lo Pedr:

—¡Gubicaj loä bendxab! Na'c rusiejytislu loä. Luj dilu gun xhigab xten Dios, alga xhigab xten rebenguedxliuj rujnlu.

²⁴ Dxejcti räjp Jesús loj rexpejn_{pacni}:

—Palga yu' chu tejtü r_{lajz} guirinajl narä, sucuälazni lagajc laani, suguuni xcrujz_{ni}, nalajznu tedni trabajw, sujiäd_{najlni} narä. ²⁵ Sa'csi nani r_{lajz} gunni gaan xcäl_{nabaj_{ni}}, sunij_{tnini}. Luxh nani runij_t xcäl_{nabaj_{ni}} por narä, sidxäl_{ni} xcäl_{nabaj_{ni}} par tejpas. ²⁶ Sa'csi ¿xhi gaan gun te bejn palga ga'pni guideb guedxliuj, luxh nit xaimni lo Dios, ä? o ¿la yu' xhi gudeed bejn te siini xaimni? ²⁷ Sa'csi narä Xi'n Dios ni gujc Niguü siälä lo yälrdimbicha' xten X_{tadä} con rexang_{lni}, dxejcti siguixä tebgaj bejn si'ctis ni gujc xtzu_{unni}. ²⁸ Rniliäpac lojtu, loj reni tre' ree naj, yu'reni di guet dxejli ni fixgaareni jäälä narä Xi'n Dios ni gujc Niguü lo xcäl_{rnibeä}.

17

Chuni'c najc guroob
(Mr. 9:2-13; Lc. 9:28-36)

¹ Che gudeed xho'p dxej, huinä Jesús Pedr, Jacoob, con Juan betz Jacoob, xtebreni huijreni jiaa yejc te dajn. ² Dxejcti nez lojreni bidxaa xho rujn lojni. Lojni gusloj rdimbicha' si'c gubijdx; xhajnbi gujc nolbäj si'c te bajl. ³ Dxejc bahuigajcreni loj Moisés näjza loj Elías, cayujyreni diidx con Jesús. ⁴ Dxejcti räjp Pedr loj Jesús:

—Dad, ¡huenduxh suga'nu ree! Palga rlajzlu, sajc jiennu choñ yuguijxh, tejni gac xten guejblu, steeni gac xten Moisés, steeni gac xten Elías.

⁵ Lañi canii Pedr, biäjť te za ni rdimbicha' guideb gabireni; neñ zaga biejn te xse' ni räjp:

—Dee najc xi'nä ni sanälazä, ruspaduxhni lazä, colcuadiajg xtiidxni.

⁶ Che biejn diajg rexpejn_{pac} Jesús diidxga, bazuxhijbreni, basajbreni lojreni lo yuj, bidxebduxhreni. ⁷ Dxejcti gubig Jesús lojreni, batzuubni ñaani yejcreni, räjpni:

—Colchasulii, na'c rdxejbtu.

⁸ Che guläs lojreni, lojtis Jesús bahuiireni, rutru suganäjđini.

⁹ Cheni sayäjťreni yejc dajnga, gunibee Jesús lojreni, räjpni:

—Rutlojđi gäbtu xhini'c bahuiitu dxejli ni guibañsacä narä Xi'n Dios ni gujc Niguui lo rebeñgut.

¹⁰ Dxejcti gunabdiidx rexpejn_{pac}ni lojni:

—¿Xhicuent rnii rebejn ni najn xleii Moisés ganid Elías nanab jiaäd, ä?

¹¹ Badzu' Jesús diidxre, räjpni:

—Guliini siädxgaa Elías, laani gunsa'cni guira'ti,

¹² niluxh narä rniä lojtu, abiääd Elías, di rebejn

nienbeeni, luxh bennäjrenini si'ctis ni rlazjreni, basacsíduxhrenini. Sigajcza gunnäjreni narä Xi'n Dios ni gujc Niguui, susacsíduxhreni narä.

¹³ Dxejcti gucbee rexpejn̄pacni caniini xcuent Juan Bautist.

*Jesús basiajc te biuux ni guyu' xpej beñdxab
(Mr. 9:14-29; Lc. 9:37-43)*

¹⁴ Cheni bidzujn̄reni cadro tre' xhidajl bejn̄, gu-big te bejn̄ lojni bazuxhijbni, dxejc räjpni:

¹⁵ —Dad, balaslajz xinä sa'csi laani cayacx-huuni, rajcni yälguidxbej, rusacsíduxh yälgujdxgani, yu' huält rtejbni lo guiboo yu' huält rtejbni lo nis. ¹⁶ Biädnääni loj rexpejn̄paclu, luxh di niajcdi nusiajcrenini.

¹⁷ Jesús badzu' diidxre lojreni räjpni:

—Ben̄gujdx, bejn̄ ni di chalilajz, ¿gucli yu'ä lojtu? ¿Cati gac gunä huant la'tu? ¡Coltanä biuuxga ree!

¹⁸ Dxejcti gudilnäj Jesús beñdxab ni yu' lastoo biuuxga, gunibeeni biriini, lagajc dxejc biajc biuuxga.

¹⁹ Dxejc guninäj rexpejn̄pacni Jesús te laad, gun-abdiidxreni räjpreni:

—¿Xhicuent di niajcdi nibäänu beñdxab neñ lastoo biuuxga?

²⁰ Jesús räjp lojreni:

—Sa'csi la'tu guxiduxh rililajztu. Rniliä lojtu, paru najc yälrililajz xtentu si'cti te bejdz muxhtas, sajc gäbtu loj dajn rec: “Gubicaj ro'c, gudejd stelaad”, luxh sibicaj dajnga. Palga rililajzpaclu, xhetliidi yu' ni di gacdi guntu. ²¹ Niluxh sa' beñdxabre, dini guirii palga ditu guiniabduxh lo Dios, gucua'nzatu.

*Jesús rusule' stehuält xho guetni
(Mr. 9:30-32; Lc. 9:43-45)*

²² La_lni sasajreni nez región xten Galilee, räjp Jesús:

—Sutedreni narä Xi'n Dios ni gujc Niguui ladz_naa rebe_ndoj_l te gusacsíreni narä. ²³ Niluxh sugu'treni narä, dxejc ni riojn dxej sibansacä lo rebe_ngut.

Che biejn diajgreni diidxga, guc-huinuxh lajzreni.

Gudijxni impuest xten guidoo

²⁴ Che bidzuj_n Jesús näjza rexpejn_npacni guedx Capernaum, biääd rebejn ni rusquijx xcuent guidoo lo Pedr, gunabdiidxreni lojni, räjpreni:

—¿La di xmastrtu quiix impuest xten guidoo?

²⁵ Räjp Pedr:

—Rguijxnini.

Che biu' Pedr ne_n yu', ganid Jesús gunii lojni, räjpni:

—¿Xhi rchalolu, Simón? ¿Chuni'c rusquijx rebejn ni rnibee lo guedxliujre? ¿Chuni'c rguijx reim-puest, recuyo't? ¿Rebe_n lajdxreni o rebe_nzijt?

²⁶ Badzu' Pedr diidxre räjpni:

—Rebe_nzijt.

Räjp Jesús:

—Ni'cni di rexi'nreni quiixni. ²⁷ Luxh te di guidxe'chreni, huij ro' nisdoo, bacuaa ansuel, gulää bäj_l ni guiniazxgaalu. Ro' bäj_lga sidxällu te melpla't ni sajl te chatijxlu impuest xcuentä näjza xcuentlu.

18

¿Chuni'c sajcrú lajdx Dios xhaguibaa?

(Mr. 9:33-37; Lc. 9:46-48)

¹ Laa dxejcní gubí g rexpejn̄pac Jesús lojni te gunabdiidxreni:

—¿Chuni'c sajcrú lajdx Dios xhaguibaa?

² Dxejcti gurejdx Jesús te biuxbáz, bazujnini nez galäiireni, ³ dxejc rájpni:

—Rniliäpac lojtu, palga ditú gusiechlajztu, palga ditú gac nadolajz si'c te biuxbáz, ditú jiu' lajdx Dios xhaguibaa. ⁴ Ni'cni chutis bejn̄ nani gac nadolajz si'c biuxe're, laani gac ni sajcrú lajdx Dios xhaguibaa. ⁵ Chutis ni riu te sa' biuxe're, sa'csi rinälajzni narä, lagajc narä riuni.

Riezw jiajbni nen dojl

(Mr. 9:42-48; Lc. 17:1-2)

⁶ Rájpzani:

—Chutis ni gudzucaj lo xnezyuä te sa' biuxe're ni ahuililajzni xtidxä, maazru huen niliib te guij xten molin dojb yejn̄ni, chatejbni loj nisdoo, palga gunni jiajb tej reni'c lo dojl. ⁷ Proobza guedxliuj sa'csi yuduxh xhigabguijdx lojni. Sa'csi nanabpac chu xhigabguijdx. Gunatiro, bejn̄ ni ruzobloj rexhigabguijdxre, ni rujn riajbza lo dojl reni rililajz xtidxä, ni najc si'c biuxe're.

⁸ Palga ni'lu o ñaalu gun jiajbli lo dojl, batiu'ni. Hueenru jiu'lu lo xcäl̄nabajn̄ Dios nitijnglu o ñatijnglu lacuaa jiilu con guiro'p ni'lu o guiro'p ñaalu lo balduxh ni rejc par tejpas. ⁹ Palga te balojlu rujn riajbli lo dojl, guläáni. Hueenru jiu'lu lo xcäl̄rnibee Dios najclu lotiä'p lacuaa chu guiro'p baloj chazäl̄reni luj lo balduxh ni rejc par tejpas.

*Xcuent xiil ni gunijt**(Lc. 15:3-7)*¹⁰ Räj pza Jesús lojreni:

—Coñatiro, andi cuälaztu rebejn ni najc si'c bi-
 uxbäzre ni sasaj lo xnez Dios, sa'csi rexangl Dios ni
 cahuiireni, guiraatis dxej yu'reni loj Dios. ¹¹ Sa'csi
 Xi'n Dios ni gujc Niguii biääd te guslaani rebejn
 nani agunijt neñ dojl.

¹² Räj pzani:

—¿Xho rhuiitu? Palga rajp te bejn te gayuu xiil,
 dxejc nit tejni, ¿laa dini gusaan stabitzubigaaga
 ni yu' neñ gurajl te chatiilni xile' ni gunijt, ä?
¹³ Luxh palga guidxälni xile'ga, rniliä lojtu, sibalaz-
 duxhruni xcuent xile'ga luxh guxiiru guibanäj la-
 jzni xcuent rexiil nani di ninijt. ¹⁴ Sigajcza Xtadnu
 ni yu' xhaguibaa di rlajz nit lo Dios nicla tej reni
 ahuililajz xtiidxni, ni najc si'c biuxbäzre.

*Xho gunnäjlu bejtzlu**(Lc. 17:3)*¹⁵ Räj pzani:

—Palga gun bejtzlu te cosguijdx lojlu, guninäjni
 xtebtislu, gojs lojni xhi dojl bejn ni lojlu. Palga saru
 gucuadiajgni xtiidxlu, abiäj lajztu. ¹⁶ Palga naad-
 dini gucuadiajgni, dini jiu xtiidxlu, dxejc huinä
 stee o stio'p bejn chaninäjluni, te guiraa ni guiniitu
 jiejn diajg rebejn ga, te arajplu tio'p o chon testiigw.
¹⁷ Palga di bejtzlu gucuadiajg xtidx rebejn ga, luxh
 dizani jiu xtiidxreni, neñ guidoo huile'c xquejlu
 loj rebejn ni ricuadiajg xtidx Dios. Palga dizani jiu
 reben guidoo, sugacni nez lojlu si'c te beñguijdx ni
 di gumbee xtidx Dios o si'c rebejn nani rusquijx loj
 rebejn nani ruto'.

18 'Ni'cni rniliäpac lojtu, guiraa yäl_guxhtis xten bejn ni di gusiechlajz xtoj_lreni ni guntu lo guedxliuj, si'c jia'nni xhaguibaa; guiraa redojl nani gusiäj_l lajztu lo guedxliuj sa'csi basiechlajz beñdojl_ga, si'cza jia'nni xhaguibaa.

19 'Sigajcza rniä lojtu, palga tio'ptu tejsi xhigab guntu xhini'c guiniabtu lo Dios, che guiniabtuni lo Dios, Xtadä ni yu' xhaguibaa suniidxni ni rniabtu lojni. 20 Sa'csi cadrotis nadxagsa' tio'p o choñ bejn sa'csi rinälajzreni narä, anasuga'ä galäii rebejn_ga.

21 Dxejcti gubig Pedr loj Jesús, gunabdiidxni:

—Dad, ¿palga gunijt betzä loä, bal huält nanab gusiäj_l lazä? ¿La sajl gajdzli huält, ä?

22 Badzu' Jesús diidxre lojni räjpni:

—Dina guiniä gajdztis huält, rniä gayoñbidzuu huält, nalajznu si'ctiza huält basiäj_l lajzlu.

Xcuent tio'p bejn ni nazäab meel

23 'Xcäl_rnibee Dios xhaguibaa najc si'c te reii ni rlajz gunni cuent lac nazäab rexmosni lojni.

24 Agusloj cayujnni xcuentni chela bidzunnäjreni te mos ni nazäab balti mil lojni. 25 Luxh

mosre xhet rajpdini te quiixni rexti'nni, ni'c gunibee reii guido'ni si'c sclav, näjza chäälni, näjza rexi'nni, nägajcza guiralii xhixtenni, te gaxh xti'nni. 26 Dxejcti mosga bazuxhijbni loj xlam_ni, gunabduxhni lojni, räjpni: “Guläzsijc tiop-choñ dxej, Dad, te gac quixä xti'nä.” 27 Dxejcti lam_ga balazlajzni xmosni, badzucajni guiraa ni nazäab mosga lojni, baslaanini. 28 Cheni birii mosga rolijz xlam_ni, bidxaagni stee samosni ni nazäab bale'si beex lojni. Gunaaznini, baxhiya'ni yejnni, dxejc räjpni: “Gudijxga ni nazääblu

loä.” ²⁹ Dxejcti ste mosga bazuxhijbni lojni, räjpni: “Guläzsijc. Siguixäca guiraa ni nazäbä lojlu.” ³⁰ Luxh steega naaddini, alga huisäugacni samosni neṇ latzguiib te bejn̄ni gaan gudijxni guiraa ni nazäábni. ³¹ Cheni bahuii sgaii mos xhini'c bejn̄ni, gucnaduxhlajzreni, huiye'tzreni lo xlamreni xhi huiyejn̄ni. ³² Dxejcti gurejdx xlamreni mosga, räjpni lojni: “¡Mos guijdx! Narä badzucaä di'n ni nazääblu loä, sa'csi gunabduxhlu loä. ³³ Si'cza niunnäjlu sa'lu, nulazlajzluni sigajc ni balazlazälu.” ³⁴ Sas lacti bidxechduxh lamga, gunibeeni biäuuni te gudijxni guiragajc ni nazäábni lo xlam̄ni.

³⁵ Baluux Jesús cuentga, räjpni:

—Sigajcza gunnäj Xtadä ni yu' xhaguibaa guiraa rebejn̄ ni di gusiällajzpac guiraa redojl̄ ni rujn resa'ni lojni.

19

Jesús ruluii xcuent yälru'o'n sa'ni
(Mr. 10:1-12; Lc. 16:18)

¹ Che gulujx gunii Jesús recuentre, biunejzni Galilee, huijni lo región xten Judea, stelaad gueu Jordán. ² Xhidajl bejn̄ birinajlni, ro'c basiajcn̄i rebenracxhuu, ³ dxejc gubig refarisee lojni, rlajzreni gusguesireni Jesús ni'c räjpreni lojni:

—¿La sajc guro'n te niguii cháäl̄ni che rlajztisni, ä?

⁴ Badzu' Jesús diidxre lojreni, räjpni:

—¿La gajd̄tu goḷ lo reguijtz nani bacuaa to Moisés cadro caj xho benchee Dios bejn̄ galooli: “Niguii näjza gunaa bencheenireni”? ⁵ Guniiza Moisés: “Ni'cni gusaan niguii xtadni con xnanni te xca'ni

chäälni, dxejc dirureni gac tio'p, tejtis bejn najczeni.” ⁶ Ni'cni dirureni gac tio'p, najczeni tejtis bejn, digacdi guilia' rebejn lo sa'ni nani abachagsa' Dios lo sa'ni.

⁷ Dxejcti gunabdiidxzeni lojni, räjpzeni:

—¿Xhicuent gunibee Moisés gudeed niguii te guijtza lo chäälni te si'c gac guro'nni gunaaga, ä?

⁸ Räjp Jesús lojzeni:

—Sa'csi najc lastootu si'c te guij, ni'c basaan to Moisés baro'n niguii chäälni, niluxh galodoo et si'cti gujzeni. ⁹ Luxh rniä lojtu, niguii nani gusaan chäälni, luxh xhet dojldi bennäj chäälni stee niguii, dxejcti guchnaani ste'ca gunaa, rujnni dojl. Sigajcza niguii ni guchnaa gunaaga ni abaro'n chäälnini, rujnza niguiiga dojl.

¹⁰ Dxejc räjp rexpejn pacni lojni:

—Palga si'c najc xcuent niguii con chäälni, hueenru na'c guchnaani.

¹¹ Jesús räjp lojzeni:

—Xhet guiraadi bejn rajc gacbee rediidxre, rebejntis ni rudeed Dios te xcäriensa'c ni'ctis racbee.

¹² Yu' xhicuent digacdi guchnaa niguii: yu'zeni digacdi guchnaa sa'csi si'c gojlzeni; yu'zeni digacdi guchnaa sa'csi baxhin sabejnzeni; yu'zarenigacdi guchnaareni sa'csi rlajzzeni gunzeni xtzuntis Dios. Nani rajc racbeeni rediidxre, sugacbeenireni.

Biädnäzeni rebiuux loj Jesús

(Mr. 10:13-16; Lc. 18:15-17)

¹³ Dxejcti biädnäzeni rebiuxe' loj Jesús te gudzuubni naani yejzeni, guiniabni lo Dios xcuentzeni.

Luxh rexpejn pacni gudilnäj rebejn ni siädnä rebiuxe'ga. ¹⁴ Dxejc räjp Jesús lojreni:

—Colgusaan guibig rebiuxe' loä, na'c gudxojn-
tureni, sa'csi xcälrnibee Dios xhaguibaa najc xten
reni nadolajz si'c najc rebiuxe're.

¹⁵ Che gulujx badzuubni ñaani yejc rebiuxe', bi-
unejzni ro'c.

Te beñ ni rajp guninäy Jesús

(Mr. 10:17-31; Lc. 18:18-30)

¹⁶ Dxejc biääd te bi'n lo Jesús, gunabdiidxni lojni;
räjpni:

—Mastr sa'c, ¿xhini'c nanab gunä te xca'ä
yälñabajñ lo Dios par tejpas?

¹⁷ Dxejc räjp Jesús lojni:

—¿Xhicuent rniilu mastr sa'c narä? Diostis najc
sa'c. Per par rlajzlu xca'lu yälñabajñ lo Dios,
bazoob rextidx Dios ni caj lo xleii Moisés.

¹⁸ Dxejcti räjp bi'nga lojni:

—¿Xhi rediidxga?

Dxejc räjp Jesús lojni:

—Na'c ju'tlu, na'c guesnäjlü bejn nani di gac
chäällu, na'c cuanlu, na'c guiliäslu didxxhii xcuent
bejn. ¹⁹ Bazoob xtidx xtadlu con xnanlu, huinälajz
sa'lu si'cni sanälajzlu lagajc luj.

²⁰ Dxejcti räjp bi'nga lojni:

—Guiraa rediidxre runä che nacäli biuux.
¿Xhiruxni'c riäädx gunä?

²¹ Dxejc räjp Jesús lojni:

—Palga rlajzlu gaclu beñsa'c lo Dios, huij, bato'
guiraa ni rajplu, dxejc gudisni lo rebeñproob, dxejc
xhaguibaa sapduxhlu xhixtenlu. Dxejcti gudaä te
jiädñajllu narä.

²² Cheni biejn diajg bi'nga rediidxre, guchuinduxh lajzni sa'csi rajpni xhidalduxh xhixtenni.

²³ Sas Jesús räjp loj rexpejn pacni:

—Rniliäpac lojtu, naganduxh jiu' te beñ rajp loj xcälrnibee Dios. ²⁴ Rnisacä lojtu, guyasiru ted te cameii neñ baloj te guux; naganduxhru jiu' te beñ ni rajp lo xcälrnibee Dios.

²⁵ Che biejn diajg rexpejn pacni rediidxre, bidxeloduxhreni, dxejc canabdiidx loj sa'reni:

—¿Chuni'c sajc jiu' lo xcälrnibee Dios?

²⁶ Dxejc bahuidzu'tz Jesús lojreni, räjpni:

—Naganduxh gun rebejn dee, Diostis sajc gun guiraloj.

²⁷ Dxejcti Pedr räjp lojni:

—Nuurnu basa'nnu guiraa xhixtenu te siopnalnulu. ¿Xhini'c jia'pnu ro'c'?

²⁸ Jesús räjp lojreni:

—Rniliäpac lojtu, la'tu ni biädnejltu narä, che guscobä guiraa recos cheni cueä narä, Xi'n Dios ni gujc Niguui, lo yagxhil cadre guinibeä lo guiraa reben guedxliuj, la'tu ni siädnejltu narä sibejzatu lo tzubitio'p yagxhil te guinibeetu loj guitzubitio'p guejdx xten rexpejn Israel. ²⁹ Luxh guiraa rebejn ni basa'n rolijzni o rebejtzni, o rebisiajnni, o xtadni, o xnanni, o chäälni, o xi'nni, o rexhujni, te siädnejlni narä, rebejn ga sajp te gayuu huält locni gojpn, nägajc ga'preni xcäl nabajn Dios par tejpas.

³⁰ Rebejn nani rchalo najcreni beñroru lo sa'reni nez loj Dios, reni'c gac bejn ni guxii sajc nez loj Dios. Rebejn nadolajz ni di guchalo sajcrureni lo sa'reni, reni'c sajcrureni nez loj Dios.

20

Xcuent reni rujn dzuun

¹ Räjpzani:

—Xcäl̄rnibee Dios najc si'c te bejn̄ ni najc baxhuan xten te renchro. Rsildooru biriini te satiilni mos gun dzuun lo xyujni, lo reyaguub. ² Che bidxäl̄ni gaii mos, bachaagni diidx. Bia'nreni diidx quiixnireni te denaar tebdxej cade tej remosga. Dxejc baxhal̄nireni loj xyujni sayujnreni dzuun. ³ Birisacni, satiilni sgaii mos si'cti rcagaa, rsil. Bidxaagni sgaii bejn̄ ni xhet cayujndi, suga'sireni nez lo guii. ⁴ Räj̄pni lojreni: “Näjza la'tu col̄chayujn dzuun lo xyuä. Narä siguixä si'cni riäj̄l̄ xca'tu.” Sä'ti rebejn̄ga lo dzuun. ⁵ Birisac dade' si'cti läiidxej, birisaczani si'cti rcachon̄ gudxej. Bidxaagni sgaii bejn̄, sigajcza räj̄pni loj rebejn̄ga. ⁶ Dxejc si'cti rcagaii birisacni, huijni lo guii. Ro'c bidxäl̄ni sgaii bejn̄ ni xhet cayujndireni, suga'sireni nez lo guii. Dxejc räj̄pni lojreni: “¿Xhicuent suga'tu ree guideb dxej xhet cayujnditu?” ⁷ Dxejc räj̄preni lojni: “Sa'csi rut siäd̄tiildinu te choyennu dzuun.” Dxejcti räj̄pni lojreni: “Näjza la'tu col̄chayejn̄ dzuun lo xyuä. Narä siguixsa'cätu.” ⁸ Che biu' guxhijn̄, räj̄p lam̄ lo mos ni rnibee remos: “Gurejdx remos te quiixlureni. Gudix-xгаа reni biu' gudxejru lo dzuun. Lult gudijx reni biu' ganid lo dzuun.” ⁹ Dxejc ganid biu' remos ni agudxej biu'reni lo dzuun. Cade tejreni cua' te denaar, si'cni rca' ni rujn dzuun guideb dxej. ¹⁰ Cheni biu' reni biu' lo dzuun rsildoo, bejn̄reni xhigab sica'rureni meel, per sigajcza laareni cua'reni te denaar cade tejreni. ¹¹ Che cua'reni xcuentreni

gusloj cadxe'chreni lo baxhuaan xten dzuunga. ¹² Räjpreni: “Redee ni biu' lult lo dzuun pet teb ortis bejnreni dzuun, luxh gudijxlureni sigajcni gudi-jxlu nuurnu, luxh biennu dzuun guideb dxej, luxh biennu dzuun lo yäl_nanlaa.” ¹³ Dxejc räjp lamga lo tejreni: “Xamigwä, xhet cosguijdxdi cayunä lojlu. ¿La xhet bia'ndinu diidx te denaar quixälu tebdxej? ¹⁴ Huij, cua' xmeellu. Narä rlazä quixä bejnre ni biu' lult sigajc ni gudixä lojlu. ¹⁵ ¿La di gacdi gunä si'ctis ni rlazä con xmelä? ¿O rdxechla-jzlu loä sa'csi nacä hueen, ä?” ¹⁶ Ni'cni reni biääd lult sajcreni tebloj con reni biääd ganid, luxh reni biääd ganid sajcreni tebloj con reni biääd lult.

Gunisac Jesús xho guetni

(Mr. 10:32-34; Lc. 18:31-34)

¹⁷ Che sasaj Jesús lo nezyuj sääni Jerusalén, huinäni rexpejn_npacni te laad te räjpni lojreni:

¹⁸ —La'tu ruhuiitu sosaanu nez guedx Jerusalén. Ro'c narä, Xi'n Dios ni gujc Niguii, siabä ladz_naa reni rnibee lo rebixhojz, näjza lo rebejn ni najn leii. Laareni sinibeereni guetä. ¹⁹ Suteedreni narä ladz_naa rebe_nziyt te cubeereni narä quiinreni narä, dxejc gucuaareni narä lo crujuj. Luxh ni riojn dxej, siba_nsacä loj rebe_ngut.

Ni gunab xnan Jacob näjza Juan

(Mr. 10:35-45)

²⁰ Dxejcti gubig xnan Jacob näjza Juan, xi'n Zebedeo loj Jesús. Bazuxhijbni nez loj Jesús, te gunabni lo Jesús. ²¹ Gunabdiidx Jesús lojni:

—¿Xhini'c rlajzlu?

Räjp gunaaga lojni:

—Che jiu'lu lo xcälrnibeelu, gunibelaa cue tej rexi'nä xladbeelu, steeni cue xladbäjgwlu.

²² Dxejc räjp Jesús:

—iDitu gan xhini'c rniabtu! ¿La sajc tedtu yälrsacsí sa'ni tedä? ¿La sajc tedtu trabajwduxh sa'ni nanab tedä?

Dxejc räjpreni:

—Sajc tednuni.

²³ Dxejcti räjp Jesús lojreni:

—Guliipacni. Sidedxgaatu trabajw, sidedxgaazatu yälrsacsí. Et narädi cueä reni cue xladbägwä o xladbeä. Xtaä ni yu' xhaguibaa alaguleni rebejn̄ga.

²⁴ Che biejn diajg stzuu rexpejn̄pac Jesús, bidxe'chreni loj guiro'p rexi'n nane'ga. ²⁵ Dxejc gurejdx Jesús reni, räjpni:

—La'tu najntu xho rujn regubier ni rnibee lo rebenz̄ijt, rnibeereni rebejn̄ga si'c xlam̄reni. Luxh reni najc rebenro lojreni runnäjreni rebejn̄ga si'ctis ni rlajzreni. ²⁶ Et si'cni gunditu la'tu loj rebejn̄. Chutis rlajz gac benro lojtu, nanab gunni dzuun gacnäjni guiraliitu si'c te mos. ²⁷ Luxh chutis tejt̄u ni rlajz guiliä'p xpala'nni, nanab gacni si'c xmos lo guiraliitu. ²⁸ Sigajcza biääd Xi'n Dios ni gujc Niguui. Dini niniab mos chu lojni, alga laani najc xmos bejn̄, badeedzani lagajc yäl̄nabajn̄ xt̄enni te gudijxn̄i baslaani xhidal bejn̄ ni yu' lo dojl̄.

Jesús rusiajc tio'p lotiä'p

(Mr. 10:46-52; Lc. 18:35-43)

²⁹ Che gojl̄ guiriireni guedx Jericó, xhidalduxh bejn̄ sanajlni. ³⁰ Dxejcti sobga' tio'p bejn̄ ni di fii

cuä' nez yuj. Che biejn diajgreni sadejd Jesús ro'c, gusloj cabedxa'reni:

—Dad, Xi'n toDavid, balazlajz nuurnu.

³¹ Gudilnäj rebejnreni, te gusäureni ro'reni. Luxh laareni dipru guredxa'reni:

—¡Dad, Xi'n toDavid, balazlajz nuurnu!

³² Dxejc guzudxi Jesús, gurejdxni reni di fi, räjpni lojreni:

—¿Xhini'c rlajztu gunä?

³³ Räjpreni lojni:

—Dad, rlaaznu guixal balojnu te gac fiinu.

³⁴ Dxejc balazlajz Jesúsreni, gudajnni balojreni. Sas biacgajc balojreni, gujc bahuiireni, sana-jltireni Jesús.

21

Biu' Jesús guedx Jerusalén

(*Mr. 11:1-11; Lc. 19:28-40; Jn. 12:12-19*)

¹ Cheni Siäddzungenajxhrenei guedx Jerusalén, bidzujnreni te guedxbäz ni laa Betfagé, cuä' dajn ni laa Oliib. Baxhal Jesús tio'p xpejn pacni, ² räjpni lojreni:

—Colchäj loj guedxbäzre ni tre' nez lojtu. Ro'c guidxältu te burgunaa caduu näjza teburhuin. Colguxhecni, coltanäni loä. ³ Palga yu' chu naa: “¿Xhini'c rujntu?”, colye'tz lojni: “Dad caquiinnini terate'. Suxhalgajcnini.”

⁴ Luxh guiraa dee gujc te guzobj diidx ni gunii dade' nani bacuaa xtidx Dios agujc xchero, che räjpni:

⁵ Colye'tz loj reni rbäjz guedx Sión, bahuii xreilu siääd lojlu,

nadolajzni bijbni te burbáz, te burbáz, xi'n man ni rujn dzuun, ni ruu cargw.

⁶ Dxejcti huij rexpejn pacni, bejnreni si'c gunibee Jesús gunreni. ⁷ Biädnäreni burga näjza burbáz xi'nni. Gudixhreni xhajbreni detz burbázga, dxejc gubijb Jesús burbázga. ⁸ Xhidalduxh bejn tre' ro'c, luxh yu' reni gudixh xhajbreni lo nez yuj, peta sgaiireni batiu' balajg te gudixhreni rebalajg lo nez yuj cadre ted Jesús. ⁹ Rebejn ni nijd, näjza reni siääd dejtzni gusloj cabedxa'reni, räjpreni:

—¡Xchej guibajn Xi'n toDavid! ¡Chicbaa ni siääd xcuent Gueb Dios! Rliä'pnu xpala'n Guejblu Dios.

¹⁰ Cheni biu' Jesús nen guedx Jerusalén, guiraa reben guejdxga gusloj camojm, yu'reni canabdi-dixreni loj sa'reni:

—¿Chucha najc bejnre?

¹¹ Yu'zaren i räjp:

—Dee najc Jesús, niguii ni rusule' xtidx Dios. Guedx Nazare't xten Galilee siäädni.

Basia Jesús guidoro

(Mr. 11:15-19; Lc. 19:45-48; Jn. 2:13-22)

¹² Dxejc biu' Jesús nen guidoro xten Dios, gulääni guiraa rebejn ni caguto' näjza rebejn ni casii. Barexhätni remex xten reni ruchaa meel xten rebejn, näjza reyagxhil xten reni ruto' repalom.

¹³ Dxejc räjpni lojreni:

—Loj reguijtz ni bacuaa rebengaloo caj: “Siri-laj xquidoä yu' xten yälrbajdx, yälrniab loj Dios.” Niluxh la'tu abejntuni xpiliää gubaan.

¹⁴ Lagajc nen guidooga, gubig loj Jesús gaii bejn ni di fii näjza gaii bejn ni rsiacoj, luxh basiajcnireni. ¹⁵ Cheni bahuü reni rnibee loj rebixhojz,

näjza reni najn leii remilagwr ni bejn Jesús, luxh biejnza diajgreni xho cabedxa' rebixue' caniireni: “Rliä'pnu xpala'nlu Xi'n torei David”, bidxe'ch rebixhojzga. ¹⁶ Dxejc räjpreni loj Jesús:

—¿La riejn diajglu xhi caniireni, ä?

Badzu' Jesús diidxre lojreni räjpni:

—O'n, riejn diagäni. ¿La gattu goļ lo reguijtz ni bacuaa te dade' ni gunii xtidx Dios? Ro'c caj xcuent redee, cadro caj rediidxre:

Abejnlu goļ rebixux näjza rebäznite' dij ni rliäpsa'cpac xpala'n Dios.

¹⁷ Dxejcti basaan Jesúsreni, biunejzni ro'c sääni guedxe' ni laa Betania, ro'c gudejdni yääl.

Te yag iigw ni gubijdz

(Mr. 11:12-14, 20-26)

¹⁸ Cheni bara yääl, rsilru gubisac Jesús guedx Jerusalén. Laļ ni sääni, gusloj calaanni. ¹⁹ Bahuiini loj te yag iigw cuä' nezyuj. Gubigni gajxh ni' yajgga, per xhet ninejxhdi bidxälni, ganaxhtis balajg caj lo yajgga. Dxejc räjp Jesús lo yajg iigwga:

—įNuncru xcaj nicla tej ninejxh lojlu!

Dxejcti gubidzgajc yajgga. ²⁰ Cheni bahuii rexpejn pacni, bidxeloduxhreni, gunabdiidxreni loj Jesús:

—¿Xhi cuent gubidzgajc yajgga?

²¹ Räjp Jesús lojreni:

—Rniliäpac lojtu, palga chalilajzfactu, luxh ditu gun tio'p lajztu, xhet ganaxdi sa' cosre guntu, palga gäbtu lo te dajn: “Gubicaj ro'c, gusuj galäii nisdoo”, si'c gacni. ²² Guiraa ni guiniabtu loj Dios, palga chalilajzfactu, suniidxnini.

*Xcäl̄rnibee Jesús**(Mr. 11:27-33; Lc. 20:1-8)*

²³ Dxejcti biu' Jesús neñ guidoro, dxejc laḷ ni caguluiini rebejn̄ gubig reni rnibee loj rebixhojz nājza rebeṅgool, gunabdiidxreni lojni:

—¿Xhi yäl̄rnibee rajplu ni'cni rajc rujnlu recosre? ¿Chuni'c baniidx yäl̄rnibeere lojlu?

²⁴ Badzu' Jesús diidxre lojreni räjpni:

—Sigajcza narä gunä te yäl̄gunabdiidx lojtu; palga sajc gudzu'tu diidxga loä, dxejc guiniä lojtu chuni'c baniidx yäl̄rnibee te runä recosre.

²⁵ ¿Chuni'c gunibee gutiobnis Juan ni rutiobnis? ¿La Dios o la beṅ guedxliuj?

Dxejc gusloj cayäjp lo sa'reni, palga jie'tznu Dios gunibeeni, dxejc sinajni loonu, ¿xhicuent ditu nililajz xtiidxni? ²⁶ Palga jie'tznu bejn̄ guedxliuj gunibeeni, dxejc sixa't rebejn̄ yejcnu sa'csi guiraareni rililajzreni Juan najc te Dade' ni gunii xtidx Dios. ²⁷ Dxejc räjpreni loj Jesús:

—Dinu guidon.

Dxejc räjp Jesús lojreni:

—Sigajcza narä dina guiniä caro siääd yäl̄rnibee te runä guiraa recosre.

Te dade' ni guyu' tio'p xi'nni

²⁸ Jesús räjp lojreni:

—Guidon xho guichalootu diidxre. Te dade' guyu' tio'p xi'nni. Räjpni loj xingangalojni: “Xi'nä, nadxej chayujnlu dzuun cadre care' uub.” ²⁹ Dxejc badzu' xi'nni diidx lojni, räjpni: “Di rlazädi cha'a.” Luxh che gojl ste ra't, basiejch lajzni säätini sayujni xtzun xtadni. ³⁰ Dxejc räjp dade'ga lo stee xi'nni: “Xi'nä, nadxej chayujnlu dzuun.” Dxejc

badzu' xi'nni diidxre, räjpni: “Mbaj, dad, sia'ä.” Luxh dini nij. ³¹ Loj guiro'preni, ¿chuni'c bejn si'cni rlajz xtadni?

Dxejc räjpreni:

—Xingangalooni.

Dxejcti räjp Jesús lojreni:

—Rniliápac lojtu, reni ruquijx guiraloj, nájza regunabdxab ganidreni jiu'reni lojtu loj xcälrnibee Dios, ³² sa'csi Juan ni rutiobnis biädluini la'tu xho guibajntu, luxh ditu nililajz xtiidxni. Biädla reni ruquijx guiraloj, nájza regunadxab huililaz-duxhreni xtiidxni. Niluxh la'tu bahuiitu guiraa recosga, ditu nusiechlajz te nililajztu xtiidxni.

Xcuent remosgujdx

(Mr. 12:1-12; Lc. 20:9-19)

³³ '¡Colcuadiajg stee cuentre! Guyu' te dade' ni najc baxhuaan xten te renchro, gule'cni yaguub loj xyujni, bateedni bazaa guideb gabi yujga. Gudäänni te gueed te gujcni te tanc te chuchee nisuubga che rxii reuub. Bencheezani te yu' ni najc jiaaro te ro'c cue te ni fii guideb loj xyujni. Badedlaani yujga loj gaii bejn ni rujn dzuun, sä'tini te biaj zijtro. ³⁴ Che agojl guire' cose'ch baxhał baxhuaanga gaii xmosni loj xyujni te chaxiireni cose'ch ni riäjł xca' baxhuaanga. ³⁵ Dxejc reni biannäj yujga gunaazreni remosre, gudijnreni tejni, bagu'treni steeni, bacuaarenı guij yejc steeni. ³⁶ Dxejc baxhałsac baxhuaanga sgaii mos. Niluxh reni biannäj yujga sigajcza bennäjreni remosga.

³⁷ 'Dxejcti bejn baxhuaanga xhigab: “Maazru huen guxhałä xi'nä; sucuadiajgrureni xtiidxni.”

³⁸ Cheni bahuiireni lo xi'n baxhuaan xten yujga, bejnreni xhigab: “Deeni jiannäj yujre; do'o guigu'tnuni te jiannäanu yujre.” ³⁹ Dxejcti gu-naazrenini, guläärenini te laad, dxejc bagu'trenini.

⁴⁰ Dxejc gunabdiidx Jesús räjpni:

—Che jiääd baxhuaan xten yujga, ¿xhi gunnäjni rebejn nani biannäj xyujni?

⁴¹ Dxejc räjpreni loj Jesús:

—Dini gulazlazj rebenguijdxga, sugu'tnireni, sudedlaani xyujni loj ste'ca bejn nani gudeed cose'ch ni riäjł xca'ni che gal guire' cose'chga.

⁴² Dxejcti räjp Jesús lojreni:

—¿La gajdtu goł lo reguijtz nani bacuaa dade' nani gunii xtidx Dios galoo? Rediidxre caj ro'c:

Guij nani gulälaz reni runchee yu',
cua' Dios lagajc guiija gudixhnini squiin yu',
sajcruni loj guiraa reguij.

Dee bejn Gueb Dios, luxh rdxeloduxhnu dzunrore ni bejnni.

⁴³ 'Ni'cni rniä lojtu, sibicaj xcälrnibee Dios lojtu, sidejdni loj rebejn nani gudeed ni riäjł xca' xcälrnibee Dios, nalajznu renani chalilajzpac xtiidxni. ⁴⁴ Luxh xcuent guiija: nani jiajb lo guiija, silia'ni, per nani guitejb guiija yejcnı, li siujynı, gacni däj.

⁴⁵ Che biejn diajg reni rnibee lo rebixhojz näjza refarisee recuent ni canii Jesús, gubeereni cagusä'tni lagajc laareni. ⁴⁶ Rlajzreni niniaazrenini, per bidxejbreni rebejn sa'csi salilajz rebejn najc Jesús bejn ni rnii xtidx Dios.

22

Xcuent yälruçnaa

¹ Guslosac canii Jesús lojreni con recuent, räjpni:

² —Xcälriabee Dios najc si'c te rei ni bejn te sa' te guçnaa xi'nni. ³ Baxhalni rexmosni te saxi-ireni regolnejdx çhääreni sa', niluxh rebejnre di rlaizdireni. ⁴ Dxejc baxhalnacni rexmosni, räjpni: “Colye'tz loj reni abidon, agujc comiid. ¡Abagutä balti gonsa'c, gonguro! Anacchee guira'ti yälrajw. Coltaa.” ⁵ Niluxh reni abidonga di niu xtiidxreni. Tejni sahuu rexyujni, steeni säa lo rexnegosni, ⁶ dxejcti sgaii reni niajc biooz gunaazreni rexmos rei, basacsireni remosga, sas bagu'trenini. ⁷ Che biejn diajg reiiga, bidxe'chduxhni, baxhalni rexsoldaadni te sagu'treni guiraa rebenguijdxga, te saze'czareni guejdx cadre rbäjzreni. ⁸ Dxejcti räjpni loj rexmosni: “Guiraa dee anacchee, di nungäjli jäädru reni abidon. ⁹ Colçhäj, pues, lo resquün lo nezyuj, colcuejdx chutis bejn ni guidxaagtistu.” ¹⁰ Birii rexmosni, sääreni lo nezyuj. Dxejc bachagsa'reni guiraatis bejn ni bidxaagreni, reni najc benguijdx sigajc reni najc benhueen te gudxaj rolijz reiiga.

¹¹ Dxejc biu' rei biädhuiini loj rebiooz. Bahuiini loj te bejn ni sobga' ro'c, luxh xhet xhablanijdini najcwni. ¹² Dxejc räjp rei lojni: “Xamigwä, çxho bejnlu biu'lu ree luxh xhet xhablanijdilu najcwlu?” Dxitis sobga' bejnnga, xhet rniidini. ¹³ Dxejc räjp rei loj rexmosni: “Colguliib ni'ni näjza naani, colsälni detzyu' cadre nacäy te ro'c gonduxhni chubejli reläjyni.” ¹⁴ Sa'csi xhidajl najc reni bidon luxh guxii najc reni bibee.

La sajc quiixni impuest
(Mr. 12:13-17; Lc. 20:20-26)

¹⁵ Dxejcti sii refarisee, bia'nreni diidx siguiilreni xho gunijt Jesús te diidx te guiga'ni. ¹⁶ Ni'c baxhalreni gaāi xpejnreni nājza gaāi bejn ni nadxaag Herodes te rājpreni loj Jesús:

—Mastr, anajnnu rniilu ganax didxlii, ruluiizalu xtiidxpac Dios, luxh dilu jiu xhi rnii rebejn, sa'csi dilu cue bejn ni sajcro lo stee bejn. ¹⁷ Gunii loonu, pues: ¿La laaca najc quiixnu impuest lo César ni rnibee loonu o et laadi?

¹⁸ Dxejc gucbee Jesús xhet laadi xhigab cayujnreni neñ lastooreni, dxejc rājpni lojreni:

—¡Ben̄guijdx! ¿Xhicuent r̄lajztu guquiiltu narä?
¹⁹ Col̄guluii te meel loä.

Dxejc badeedreni te meel ni laa denario. ²⁰ Che bahuii Jesús loj meelga, gunabdiidxni lojreni, rājpni:

—¿Chuni'c caj lo meelre?

²¹ Dxejc rājpreni:

—Loj César.

Dxejc rājp Jesús lojreni:

—Col̄gudeed lo César ni riäj̄l xca' César, col̄gudeedza lo Dios ni riäj̄l xca' Dios.

²² Che biejn diajgreni rediidxre, bidxelo-duxhreni. Dxejc basaanrenini, sä'tireni.

Canabdiidxreni xho gac che guibaṣac rebejn
(Mr. 12:18-27; Lc. 20:27-40)

²³ Lagajc dxejga bidzujn gaāi reni laa saducee, reni di chalilajz sibaṣac bejn loj rebengut. Gubi-greni loj Jesús, gunabdiidxreni, ²⁴ rājpreni:

—Mastr, si'c naj toMoisés, palga yu' te bejn ni abachnaa, luxh ruti xi'nni che guetni, riäj] guchnaa bejtzni biuudga te chu xi'nreni xcuent bejtzni. ²⁵ Mbaj. Loonu yu' gajdz niguii ni najc bejtz sa'reni. Betzgoolga bachnaa, dxejc gujtni, luxh di xi'nni niu'. Basa'nni chäälni lo bejtzni. ²⁶ Sigajcza gusajc ni ro'p bejtzni; sigajcza gusajc ni riojn bejtzni. Si'c huinuu gujc che basa'li guigajdz bejtzga. ²⁷ Sas che gujt guiraareni, näjza gunaaga gujt. ²⁸ Che guibansac rebejnğa lo rebengut, ¿chu tej lo rebejtzga gac chäälpac gunaaga, ni guiraareni bachnaareni gunaaga?

²⁹ Dxejcti badzu' Jesús diidxre lojreni, räjpni:

—Et laadi rujntu xhigab sa'csi ditu gacbee xtidx Dios niclaza xcuent xcälrnibee Dios. ³⁰ Ni che guibajn rebengut, diru yäl_ruchnaa chu, diruza bejn gudeed rexindxa'preni guchnaa. Dxejc sajcreni si'c rexangl Dios ni yu' xhaguibaa. ³¹ Dxejc xcuent yälrbansac loj rebengut, ¿la gajdtu goļ reguijtz ni bacuaa toMoisés che räjp Dios xcuent retoxtad-goldoonu: ³² “Narä nacä Xtios Abram, Xtios Isaac, näjza Xtios Jacob”, ä? Dios di gac Xtios bengut, Xtios tis rebejn ni nabajn najcni.

³³ Che biejn diajg rebejn xtidx Jesús, bidxelo-duxhreni diidx ni ruluiini.

*Diidx ni maazru sajc
(Mr. 12:28-34)*

³⁴ Che gucbee refarisee basäu Jesús ro' resaducee, bidojpreni, bachaagreni diidx. ³⁵ Dxejc tejreni nani najn leii, rlajzni guquuilni Jesús ni'c gunabdiidxni lojni räjpni:

³⁶ —Mastr, ¿xhi diidx ni gunibee Dios saj cru lojreni caj lo leii?

³⁷ Räj p Jesús lojreni:

—Nani rnii scree: “Huinälajz Dad Xtioslu guideb lastoolu, guideb xaimlu, näjza guidebgajc xcäriejnlu.” ³⁸ Diidxre ni gunibee Dios najc ni saj cru, luxh ganidni siädni loj rextidx Dios. ³⁹ Ni ro'pga sigajc za najcni: “Huinälajz resa'lu sigajc ni sanälajzlu lagajc luj.” ⁴⁰ Guiro'p remandamientre nanab te guzoob bejn guiraa rediidx ni bacuaa to Moisés näjza ni bacuaa redade' nani gunii xtidx Dios.

¿Chu xi'n najc Crist?

(Mr. 12:35-37; Lc. 20:41-44)

⁴¹ Lałni tre' refarisee, gunabdiidx Jesús lojreni, räj pni:

⁴² —¿Xhi rujntu xhigab xcuent Crist? ¿Chu xi'n najcni?

Räj preni lojni:

—Laani najc xajg to David.

⁴³ Räj p Jesús lojreni:

—¿Xhicuent räj p David “Xtadä” lojni che basanij Sprit D xan xten Dios lastooni? Ni'c bacuaa to David rediidxre:

⁴⁴ Dad Dios räj p lo Xtadä, gurej xladbeä lał ni gudzugä guiraa reni rdxe'ch lojlu ladzni'lu.

⁴⁵ Palga lagajc David rnii: “Dad” lojni, ¿xho mood najcni xi'nni?

⁴⁶ Dxejc rut gujcdi badzu' nicla te diidx lojni, luxh dxejluga rutru gojpd i xhi diidx niniabdiidx rureni lojni.

23

Rucuaquij Jesús refarisee nājza rebejn nani najn leii

(Mr. 12:38-40; Lc. 11:37-54; 20:45-47)

¹ Dxejc räjp Jesús loj reben̄ xhidaalga nājza loj rexpejn̄pacni:

² —Rebejn̄ ni najn leii nājza refarisee rajp yäl̄najn te gusule'reni xleii Moisés. ³ Ni'cni col̄guzoob guiraa rextiidxreni, na'c guntu sa' recos ni rujnreni, sa'csi laareni rniireni xhini'c guntu, dxejcti lagajc laareni direni gun ni rnibeereni guntu.

⁴ Rnibeereni gun rebejn̄ cos naganduxh ni najc si'c te cargw naduxh ni di gac guu bejn̄, per laareni nicla con te bicueñaareni direni gusniibni.

⁵ Guiraa recos ni rujnreni, rujnrenini te fitis rebejn̄. Rchaglajzreni rcaj lo cuajsreni nājza roxhagwreni recaje' cadro yu' tla' guijt̄z ni caj xtid̄x Dios lojni. Rustioolzaren̄ xi' xhajbreni. ⁶ Rlajzreni ganidreni tedreni lo mex che gal̄ te lanij; rla-jzreni cuer̄eni lo rebancw ni suga' delant̄ neñ̄ reguidobäz. ⁷ Sigajcza rla-jzreni guchagro' bejn̄ ñaareni nez lo guii, guiniiza rebejn̄ “Mastr” lojreni.

⁸ 'Na'c gusaantu guinii rebejn̄ “Mastr” lojtu, sa'csi tejtisni yu' ni najc Mastr, laani najc Crist. Peta la'tu guiraatu najctu tejsi sa'tu. ⁹ Na'c guiniitu “Xtadä” loj te beñ̄ guedxliuj sa'csi yu' tejtis ni najc Xtadtu, ni'c najc Dios ni yu' xhaguibaa. ¹⁰ Na'cza gusaantu guiniireni lojtu “Mastr” sa'csi yu' tejtis Mastr, ni'c najc Crist. ¹¹ Ni yu' si'c mos lojtu ni'c najc beñ̄roru loj resa'ni. ¹² Sa'csi chutis ni rchaloni najcni beñ̄ro lo sa'ni, ni'c sustuiyā lojni, chutis ni najc nadolajz loj Dios, ni'c sunāni beñ̄ro lo sa'ni.

13 'iProobzatu remastr xten leii näjzatu refarisee, najctu benguijdx! Sa'csi rudxojujtu jiu' rebejn loj xcälrnibee Dios. Lagajc la'tu ditu jiu' luxh dizatu gusaan jiu' rebejn ni rlajz jiu'.

14 'iProobzatu remastr xten leii näjzatu refarisee, najctu benguijdx! Sa'csi rudzucajtu rolijz renanbiuud lalsi cabedx canabduxhtu lo Dios, naatu gusgueetu bejn si'c. Sa'csi rujntu scree, siabduxh fis xten Dios yejctu.

15 'iProobzatu remastr xten leii näjzatu refarisee, najctu benguijdx! Zijt rijtu lo renezyuj näjza lo nisdoo te guntu gaan guchaa mase tejtis bejn xmoodni te gan̄ni Dios si'c rajntuni. Luxh che ahuililajz bejn̄ga xtiidxtu, rujntuni tio'p huält maazru te xi'n gabijl loj ni najctu.

16 'iProobzatu, najctu si'c lotiä'p, rlajztu guluiitu nezyuj! La'tu ni rnii palga te bejn guiniliipac xtiidxni guzä'tni guidoro, xhet sajcdi xtiidxni. Palga guiniliipacni guzä'tni oor ni yu' nen̄ guidoo, dxejc sii rniliini dxejc nungäj̄l guzoobni xtiidxni. 17 jBen̄ nayääl, ben̄lotiä'p! ¿Xhini'c sajcrú? ¿La oor la guidoro ni rundxan oorga? 18 Rniizatu: “Palga te bejn̄ guiniliipacni guzä'tni lo bacuug ni yu' nen̄ guidoro, di xcuentdi xtiidxni. Luxh palga yu' chu guiniliipac guzä'tni gojn ni dzuub lo bacuug, dxejc sii rniliipacni dxejc nungäj̄l gusoobni xtiidxni.”

19 jBen̄ nayääl, ben̄ lotiä'p! ¿Xhini'c sajcrú? ¿La gojn o la bacuug nani rundxan gojn̄ga, ä? 20 Nani ruzä't lo bacuug che rniliipacni, et ganaxdi lo bacuug ruzä'tni, näjza guiraa ni tre' lo bacuug ruzä'tni. 21 Ni ruzä't guidoro che rniliipacni, et ganaxdi guidoro ruzä'tni, näjza Dios ni rbäjzza nen̄ guidoro ruzä'tni. 22 Sigajcza ni ruzä't guibaa che

rniliipacni caguzä'tzani yagxhilro xten Dios näjza lagajc Dios ni sobga' ro'c.

²³ 'iProobzatu remastr xten leii näjzatu refarisee, najctu beṅgijdx! Bedzxtiil, anis näjza comiṅ ni rajptu, rudeedtu lo Dios tej tantga yejc cade te tzuu, niluxh ditu jiu ni sajcro lo xtidx Dios, cadre caj xcuent yälṅabaṅya, yälṅulazlajz, näjza yälṅirilajz. Deeza ni riälṅpac guntu laṅ ni cayujnzatu steega. ²⁴ 'iLa'tu, lotiä'p ni rlajz guluii nezyuj! Riutu rediidx ni guxii sajç, niluxh rediidx ni sacduxh ditu jiuni, najctu si'c bejṅ ni rbää te rex lo xpla'tni dxejcro räjmni te cameii.

²⁵ 'iProobzatu remastr xten leii näjzatu refarisee, najctu beṅgijdx! Rusiatu detz bas näjza pla't luxh nenṅni najc-dxuudx. Sigajcza la'tu riuduxhtu recostumbr, luxh lastootu guidxa yälṅubaaṅ näjza yälṅrdxe'chljajz. ²⁶ Farisee ni najc lotiä'p: gudibxgaa nenṅ bas näjza nenṅ pla't, dxejc näj dejtzni sajç nya.

²⁷ 'iProobzatu remastr xten leii näjzatu refarisee, najctu beṅgijdx!, sa'csi najctu si'c rebaa ni nacch-esa'c; nolbäjreni, saru rluuini, luxh nenṅreni guidxa dzujt xte beṅgut näjza bälyudx. ²⁸ Sigajcza najctu la'tu. Saru rujṅ lojtu, rchalo rebejṅ najctu beṅsa'c, niluxh lastootu guidxa yälṅrusguee näjza yälṅguyalajz.

²⁹ 'iProobzatu remastr xten leii näjza refarisee, najctu beṅgijdx! Runcheetu xpaa redade' ni gunii xtidx Dios galoo, rusucheezatu ro' xpaa rebejṅ ni gujç beṅsa'c, ³⁰ dxejc rniitu: “Paru nibajṅnu nenṅ redxej ni gubajṅ retoxtadgoldoonu dinu niacnäj reni bagu't redade' ni gunii xtidx Dios.” ³¹ Lagajc con rediidxre rcäjptu najctu rexajg renani bagu't

redade' nani gunii xtidx Dios. ³² ¡Colguscuääz guntu sa' recos ni guläxtiej retoxtadgoldootu!

³³ ¡La'tu ni najc si'c bäl, la'tu ni najc si'c te bitiaáz guidxa bälñialajz! ¿Xho guntu te na'c chäätu gabijl par tejpas? ³⁴ Ni'cni, guxhalä rexpenä ni guinii xtidxä, näjza beñnajn, näjza maestr. Luxh yu'reni sugu'ttu sucuaatureni lo cruzj; yu'zareni siguijntu neñ reguidobäz, sirinajltureni guejdx por guejdx. ³⁵ Si'cza yejctu jiajb xtiejn guiraa rebeñnadolajz ni bagu't bejn xchejli toAbel ni gujc nadolajz, xchejliza Zacarías, xi'n Berequías, ni bagu'ttu neñ guidoro gajxh lo bacuug. ³⁶ Rniliäpac lojtu, dojl xten guiraa recosga siajb yejc rebejn ni tre' lo guedxliuj naj.

*Jesús biin xcuent guedx Jerusalén
(Lc. 13:34-35)*

³⁷ Räjpa Jesús:

—¡Jerusalén, Jerusalén! Xpejnlu rugu't redade' ni rnii xtidx Dios, rucuaazareni guij yejc rebejn ni ruxhal Dios te gusule'reni xtiidxni lojtu. ¡Balti huält rlazä nutie'ä la'tu si'cni rutie' guidco'c rexquidbäzni neñ xhigani, per ditu nicäjb!

³⁸ Colhuii xho jianxteb xquidootu cuälazrenini.

³⁹ Rnixgää lojtu, naj dirutu fi loä, dxejli che guinitu: “Benle' Dios nani siääd xcuentni.”

24

*Jesús räjp sibijl guidoro
(Mr. 13:1-2; Lc. 21:5-6)*

¹ Birii Jesús neñ guidoro te asiini, dxejc gubig rexpejnpacni lojni, gusloj caguluiireni reyuduxhga lojni. ² Dxejc räjp Jesús lojreni:

—¿La ruhuiitu guiraa reyu're? Rniliäpac nicla tej guij di jia'n yejc sa'ni ree; guiragajc reyu're sibijl.

Cos ni guluiloj gac fis

(*Mr. 13:3-23; Lc. 21:7-24; 17:22-24*)

³ Dxejcti huijreni yejc te dajn ni laa Oliib. Che gurej Jesús ro'c, biääd rexpejn_npacni lojni te xhiga'tz gunabdiidxreni lojni:

—Rlaaznu guiniilu loonu guc gac guiraa re-cosre. ¿Xhi seen guluiloj ameer jääd_ldu näjza che ameer nitloj guedxliuj?

⁴ Dxejc räjp Jesús lojreni:

—¡Colnatiro te rut gusgueedi la'tu! ⁵ Sa'csi su' xhidajl reni jääd, naareni: “Narä nacä Crist”, luxh susgueereni xhidajl bejn. ⁶ Siejn diajgtu xcuent cadro cayajc guer, näjza xcuent cadro rlanj chu guer, na'c guidxejbtu sa'csi si'c nungäj_l gac, niluxh gajd gal_di nitloj guedxliuj. ⁷ Sa'csi siäjs te naciön sidil_nnäjni stee naciön; te yäl_nribee suj_n guer con stee yäl_nribee, luxh su' gubijn, su' yäl_guijdx, su'za xuduxh xhidajl lajt. ⁸ Luxh guiraa redee cuäxtiejtis retrabajwduxh ni churu chu.

⁹ 'Dxejc guteedreni la'tu ladz_naa rebe_ndoj_l te gusacsireni la'tu, te gugu'tzaren_ni la'tu, luxh guiraa rebejn sidxe'ch lojtu sa'csi sanälajztu narä.

¹⁰ Nen redxejga, xhidajlreni sibälaz xcäl_rirililajzreni, sidxe'ch lo sa'reni, suto' sa'reni lo sa'reni. ¹¹ Dxejc siricaj xhidajl bejn ni rusguee, gäbreni xcuent Dios rniireni, luxh susgueereni xhidajl bejn. ¹² Sa'csi lacti suduxh yällatsiaj lo guedxliuj, diru bejn chanälajz sa'ni. ¹³ Dxejcti bejn ni chasanäj xnezyujtis Dios, ni'c sun gaan xca'ni yäl_nabajn

par tejpas. ¹⁴ Luxh sisiule' xtidx Dios guideb lo guedxliuj te gacbee guiraa reben guedxliuj xtiidxni; dxejcru jääd fis xten Dios.

¹⁵ 'Cheni fiitu asobga' te benguidxduxh nen yu' ni najc dxan nen guidoro, si'cni gunixgaa toDaniel ni gunii xtidx Dios gacni, bejn ni gol dee sugacbeeni nani rolni, ¹⁶ dxejc renani rbäjz lo guedx Judea, suguxunreni gucuatzlojreni nen dajn. ¹⁷ Bejn ni niä'p yejc xyu'ni dxejga di galđi jäajtne te chalääni xhixtenni nen xyu'ni; ¹⁸ bejn nani cayujn dzuun lo niaa, na'c guibi'ni niclaza chaxhiini xhajbni. ¹⁹ ¡Proobza regunaa ni nuxi'n, näjza reni cagusiä' báz nen redxejga! ²⁰ Colnabduxh loj Dios xhet nendi redxej ni cayacnalduxhdi nanab guxunditu, niclaza dxej che rusilajz bejn. ²¹ Sa'csi su' trabajwduxh nen redxejga, sa' ni gajd bejn fi dxejli ni guzobloj guedxliuj, luxh che tedni, diru guibi' chuni. ²² Luxh palga di Dios gutiu' yejc redxejga, nicla tej bejn di laa. Luxh suti' Dios yejc redxejga sa'csi rinälajzni reni aguleni.

²³ Nen redxejga palga yu' chu naa lojtu: “Colhuii, aree Crist”, o “Colhuii ani arec”, na'c chalilajztuni. ²⁴ Siääd xhidajl niguii ni rusguee, gäbreni najcreni crist; sidzujnza rebejn ni rusguee ni gäb xtiidxpac Dios rusule'reni; luxh sujnreni remilagwr sujnzareni senro, parsi gusgueerene, susgueduxhrene rebejn, niluxh rlajzrene gusguezareni rebejn ni agule Dios, ni rililajz xtiidxni. ²⁵ Agunixgää lojtu xhini'c gac. ²⁶ Ni'cni palga naareni lojtu: “Bahuii, a crist yu' nez lo reyubijdz”, na'c chäätu; o palga naareni: “A crist suga' nen yu're”, na'c chalilajzturuni. ²⁷ Sa'csi si'cni guideb xhaguibaa rien che

rdinya' ladjiaa näjza ladjiätli, si'cza suhuiitu loä, Xi'n Dios ni gujc Niguui, cheni jiälsacä lo guedxliuj. ²⁸ Ni najntu cadre naga' te mangut, ro'c re' regolbetz.

Cheni jiädsac Xi'n Dios ni gujc Niguui
(Mr. 13:24-37; Lc. 21:25-33; 17:26-30, 34-36)

²⁹ Räjpzani:

—Cuantsi ted guiraa retribajwduxh, sicäy lo gubijdx, diruza bäi gusanij, sitejbza rebajl ni yu' xhaguibaa, sinibduxhza guideb xhaguibaa.

³⁰ Dxejcti suhuiireni xhaguibaa seen xten Xi'n Dios ni gujc Niguui, luxh guiraa rebejn ni rbäjz nejn guiraa reguejdx lo guedxliujre, sonduxhreni suhuiireni siääd Xi'n Niguui lo reza xhaguibaali. Siäädni con yälrnibee näjza yälrdimbichaduxh.

³¹ Dxejc suxhalni rexanglni con te trompet ni guscuedxa'reni dipduxh te guire' guiraa rebejn ni aguleni lo guidajp lajd squiin guedxliuj, guideb lo guedxliuj näjza xhaguibaa.

³² 'iColguisieed ni ruluii yajg iigw! Che naren renaani che cabääni be'n, asiääd bäi curex,

³³ sigajcza cheni fiitu cayajc guiraa recosre, sacbeetu asiädgajxh fis, rolä'li abidzujni.

³⁴ Rniliäpac lojt, guiraa redee sajclal ni nabajn gaii rebejn ni suga' ree naj. ³⁵ Guibaa näjza guedxliuj sinitloj, niluxh xtidxä di nitloj.

³⁶ Rut najndi xhi dxej, xhior gacni, nicla rexangl Dios, niclaza Xi'n Dios; Dad Diostis najn.

³⁷ 'Sigajcni gujc nejn redxej che gubajn toNoé, si'cza gac che jiälä Xi'n Dios ni gujc Niguui.

³⁸ Nejn redxe galoo, cheni gajd nisguiduxhga jiajb, rebejn ni nabajn dxejc cayajwreni,

cayä'reni, caguchṇaareni, cagudeedza bejn xindxa'preni guchṇaa, dxejli cheni biu' Noé neṇ barcwro. ³⁹ Direni niacbee xtiidxni; cheni biäädli nisguiduxh ni sanä guiraareni dxejcru gucbeereni. Sigajcza gacni che jiälsacä narä Xi'n Dios ni gujc Niguii. ⁴⁰ Neṇ redxejga palga cayujn tio'p bejn dzuun lo niaa tejni guibee, steeni sia'n. ⁴¹ Palga cayo't tio'p gunaa xobniil, tejni guibee, steeni sia'n.

⁴² 'Ni'cni colṣusiṇ, sa'csi ditu gan xhi dxej jiääd Dad xtentu. ⁴³ Colḡanchee, paru niacbee baxhuaan xten yu' cor yääl niääd gubaan ni siädlan rolijzni, nisiusiṇni dxejc, dini nusaan niu'ni rolijzni te cuanni. ⁴⁴ Ni'cni colṣusiṇza la'tu, sa'csi siääd Xi'n Dios ni gujc Niguii lagajc or ni ditu gun xhigab jiäädni.

*Xcuent te mossa'c näjza te mosguijdx
(Lc. 12:41-48)*

⁴⁵ '¿Chuni'c najc mossa'c ni ruzoob diidx, ni basannäj xlamni rebejn ni yu' rolijzni te gudeedni xhi gaureni ä? ⁴⁶ Chicbaa mos ni saru cayujn xtzuunni che guidzujṇ xlamni. ⁴⁷ Rniliápac lojtu, lamga susa'nni sa' mosga te fiini guiraa xhixtenni. ⁴⁸ Dxejc palga mosga di gusoob xtidx xlamni, gunni xhigab: “Sacladuxh guibi' xlamä”, ⁴⁹ dxejc guisloj cagusacsíni resamosni, guislojni gaunäjni, yänäjni rebeṅgu. ⁵⁰ Dxejc sidzujṇ xlamni dxej che dini gun xhigab jiäädni, luxh or ni dini gan guidzujṇni. ⁵¹ Dxejc siguinduxhni mosguijdxga, surilaagwnini te guidxagsa'ni sabaṅguijdxni, dxejc sonduxhni, chubejli reläjyeni.

25

Xcuent tzuu gunaa

¹ Räjpa Jesús:

—Pues xcäl̄rnibee Dios najc si'c tzuu gunadxa'p nani cua' xcandilse'treni te huijreni te sa'. ² Gaii regunaaga nasin̄, sgaiireni nayääl. ³ Reni nayäälga sanäreni xcandilreni, niluxh direni nica' sijl se't. ⁴ Niluxh reni nasin̄ga sanäreni sijl se't te guze'creni neñ xcandilreni. ⁵ Sa'csi bi'nga di nidzungaj, gunaaz bacal̄ regunadxa'pga, gudiejstireni. ⁶ Dxejc si'cti garol yääl, biejn te xse' ni räjp: “Bi'n asiäd, colchäj, colchachaglojni.” ⁷ Guiraa regunaare huistieguxun̄reni, dxejc bensa'creni xcandilreni, te cuaguijreni. ⁸ Dxejc guigaii regunayääl räjpreni loj reni nasin̄: “Col̄gunidxlaa te bo'c se't gusanijnu xcandilnu, sa'csi arlajzni jiuini.” ⁹ Dxejcti regunanasin̄ räjp lojreni: “Digacdini, dxejc dini gal̄ nicla par nuurnu nicla par la'tu. Colchäj cadre ruto'reni se't colchazii xse'ttu.” ¹⁰ Lal̄ni sasio guigaii regunaa-nayäälga se't, bidzujñ bi'n. Regunaa-sin̄ ni cabäjz bi'n biunäjrenini lo sa', biäuuti ro lä'. ¹¹ Cheni bidzujñ regunanayäälga, räjpreni: “Dad, Dad, baxhal ro lä'.” ¹² Dxejc räjpni lojreni: “Rniliäpac lojtu, dina gumbeätu.”

¹³ Dxejc Jesús räjp lojreni:

—Col̄susin̄za, sa'csi ditu gan nicla xhi dxej nicla xhi or̄ siäd Xi'n Dios ni gujc Niguii.

Xcuent lam̄ ni badeed meel

¹⁴ Xcäl̄rnibee Dios xhaguibaa najc si'c te bejn ni agojl guirii chääni zijt te biaj. Gurejdxni rexmosni, badeedni meel lojreni.

15 'Lo tejni badeedni si'cti gaii miḷ meel, lo steeni badeedni si'cti tio'p miḷ, dxejc steeni cua' te miḷ. Loj tejgani badeedni si'cti ni rujnni xhigab sajc gunnājreni dzuun, dxejcti biriini xpiajni. 16 Ni cua' gaii miḷ meel bejn te dzunro, bejnni gaan sgaii miḷ meel. 17 Sigajcza ni cua' tio'p miḷ meel, bejnni gaan stio'p miḷ. 18 Dxejcti ni cua' te miḷ meel, huicua'tzni xmeel xlamni neḅ te gueed ni gudäänni lo yuj.

19 'Gudejdti balti bäii, dxejc gubi' xlam remosga, bejnni cuent loj guiraareni. 20 Che bidzujḅ ni cua' gaii miḷ meel, bidzunnäjni sgaii miḷ meel ni bejnni gaan, räjpni loj xlamni: "Dad, baniidx guejblu gaii miḷ loä. Aree sgaii miḷ meel ni benä gaan." 21 Räjp xlamni lojni dxejc: "Hueenca, mos hueen najclu, rusoobzalu xtidxä. Sa'csi gujclu bensa'c con te cos bāz, ḅaj sunidxä guinibeelu xhiroobru. Biu' loä, bibalaznäj narä." 22 Che bidzujḅni ni cua' tio'p miḷ meelga, räjpni loj xlamni: "Baniidx guejblu tio'p miḷ meel loä, aree stio'p miḷ meel ni benä gaan." 23 Räjp xlamni lojni: "Mbaj. Mos hueen najclu rusoobzalu diidx. Sa'csi gujclu bensa'c con te cosbāz, ḅaj sunidxä guinibeelu xhiroobru. Biu' loä, bibalaznäj narä." 24 Che bidzujḅ mos ni cua' te miḷ meel, räjpni lo xlamni: "Dad, ananä najclu te bejḅ ni di gulazlajz; rca'lu cose'ch cadre dilu nibe'c binij, rutojppzalu cadre dilu nutie'ch binij. 25 Ni'cni bidxebä, huicua'tzä xmeellu neḅ yuj. Niluxh axh aree xmeellu." 26 Dxejc räjp xlamni lojni: "iMos guijdx, mos ploj! Najnlu rca'ä cose'ch cadre dina nibe'cä binij, rutopä cadre dina nutie'chä binij. 27 Riäjḷ nisa'nlu xmelä neḅ te bancw te che nibi'ä nicasacä xmelä con xi'nni ni niujni gaan." 28 Dxejc

räjpni loj reni suga' ro'c: “Colgudzucaj te mil meel ni ca'ni colgudeedni loj ni rajp tzuu mil meel. ²⁹ Sa'csi loj ni rajp sudedäru, niluxh ni xhet rajpdi sudzucää tudxe'n nani rajpni.” ³⁰ Dxejc räjpni: “Colca' mosre ni xhet sajcdi, colguzäl'ni lo yäl'nacäy, cadro chu yäl'ronduxh, näjza yäl'rajw reläy bejn.”

Yälguxhtis xten reguejdx

³¹ 'Che jiädsac Xi'n Dios ni gujc Niguii con yäl'rdimbicha' xtenni, siädnäni rexangl Dios. Dxejc sibejni lo tron ni rdimbicha' xtenni te guinibeeni. ³² Dxejc sidojp nez lojni guiraa reben guedxliuj. Dxejc sibeni lojreni, silia'ni sa'reni si'c rujn te baxtoor cheni rbeni rexiil loj redxib, te rlia'reni loj sa'reni. ³³ Suzujni rexiil xladbeeni dxejc redxib xladbäjgwni. ³⁴ Dxejc säjb reii loj reni suga' xladbeeni: “Coltaa, la'tu ni benle' Xtaä. Coljiu' lo yäl'rnibee ni guc-chee cheni guzoblojli guedxliuj. ³⁵ Sa'csi che calanä la'tu baniidx xhi gudauä, che cayolä, la'tu baniidx xhi gu'ä. Che cuanzaä si'c te benzijt, la'tu banidxlaatu cadro bia'nä. ³⁶ Che xheti xhabä, la'tu baniidxni, che gucxhuä, la'tu biädhuiitu narä, che guyu'ä neñ latzguiib, biädhuiitu narä.” ³⁷ Dxejc sinii reni suga' xladbeeni, säjbreni: “Dad, ¿guc bahuiinu gulaanlu, baniidxnu xhi gudajwlu? ¿Guc bahuiinu cayojllu, baniidxnu xhi gu'lu? ³⁸ ¿Guc bahuiinu najclu si'c te benzijt, baniidxnu cadro bianlaalu, o biäädx xhajblu, baniidxnu xhi gojtlu? ³⁹ O ¿guc bahuiinu cayacxhuulu, o yu'lu neñ latzguiib, biophuiinu lojlu?” ⁴⁰ Dxejc reiiga säjb lojreni: “Rniliäpac lojtu, xhitis xhi bejntu loj te rexpenä ni rnii xtidxä mase proobreni, lagajc loä bejntu recosga.”

41 'Dxejc säjpzani loj reni suga' ladbäjägni: "Colguibicaj loä, benguidx, colchäj lo balduxh ni cayejc par tejpas ni cayejc par bendxab ni rnibee näjza rexpēdxabni. 42 Sa'csi gulanä, luxh ditu nuniidx xhi niauä; biolä, per ditu nuniidx xhi niä'ä; 43 cuanzaä si'c te benzijt, luxh ditu nunidxlaa cadre nia'nä, biädxza xhabä, niluxh ditu nuniidx xhi niacwä; gucxhuä, guyu'äza neñ latzguiib, niluxh ditu niädhüi loä." 44 Dxejc laareni säjbreni: "Dad, ¿guc bihuiinu calaanlu, o cayojllu, o canzajlu si'c te benzijt, o cayäädx xhajblu, o cayacxhuulu, o yu'lu neñ latzguiib, luxh dinu niacnäjlu?" 45 Dxejc säjb reiiga lojreni: "Rniliäpac lojtu, loj xhitis ni ditu niacnäj rebejn ni rililajz xtidxä, mase proobreni naräni ditu niacnäj." 46 Dxejcti sij rebejnre lo yälrusacsí par tejpas, per rebejn ni nadolajz, ni agule Dios, sijreni lo xcäl nabajn Dios par tejpas.

26

Bejnreni xhigab xho guiniaazreni Jesús (Mr. 14:1-2; Lc. 22:1-2; Jn. 11:45-53)

1 Che gulujx gunii Jesús rediidxre, räjpni loj rexpējpacni:

2 —Anajntu stio'p dxejtis cayäädx gac lanij ni laa pascw. Luxh suteedreni narä, Xi'n Niguii ladzñaareni gucuua narä lo cruzj.

3 Dxejc bidojp rebejn ni rnibee rebixhojz, näjza remastr xten leii, näjza rebengool lo rexpējn Israel. Lo xle' Caifás, ni rnibee loj rebixhojz, bidojpreni.

4 Ro'c bachaagreni diidx xho guiniaazreni Jesús con yälrusguee, te ju'treni. 5 Luxh räjpreni lo sa'reni:

—Na'c jiennuni nen redxe lanij, te di gun rebejn beiduxh.

Te gunaa ni biädnä perfum
(Mr. 14:3-9; Jn. 12:1-8)

⁶ Che yu' Jesús guedx Betania, rolijz Simón te bejn ni basiajcní che rał tiejxhni, ⁷ ro'c gubig te gunaa lojni, ca'ni te vasguij ni laa onix, guidx-ani te perfum ni sajc melro. Che sobga' Jesús lo mex, bachajni perfum yejc Jesús. ⁸ Che bahuii rexpejn pacni xhi cayujni, bidxe'chreni, gusloj cayäjpreni:

—¿Xhicuent casälxlia'ni perfumga? ⁹ Perfumre niajc nido'ni, nirii xhidajl meel lojni te niacnäjni rebenprob.

¹⁰ Biejn diajg Jesús xhi caniireni, dxejc räjpni lojreni:

—¿Xhicuent cadxe'chnäjtü gunaare? Ni te coshueen najc dee nani bejnni löä. ¹¹ Ni guirasi dxej su' rebejn ni xhet rajpdi lojtu, peta narä guxii dxej su'ä lojtu. ¹² Nani bejn gunaare che bachajni perfumre guideb lagaa tiexhä, najcni par guzucheeni narä te guiga'tzá. ¹³ Rniliäpac lojtu, cadrotis gusule'reni xtidxä lo guideb guedxliuj, sujyreni diidx xcuent ni bennäj gunaare narä, te guinaj lajzreni gunaare.

Judas bato' Jesús
(Mr. 14:10-11; Lc. 22:3-6)

¹⁴ Dxejc lo retzubitio'p rexpen pac Jesús birii tej ni laa Judas Iscariote, huininäjni rebejn ni rnibee loj rebixhojz, ¹⁵ räjpni:

—¿Lac guniidxtü löä te gutedä Jesús ladzñaatu?

Dxejc badeedreni galbitzuu melpla't lojni.
 16 Dxjecli caguuil Judas xho gutedni Jesús lojreni.

Lult xchej xten Jesús

(Mr. 14:12-25; Lc. 22:7-23; Jn. 13:21-30; 1Co. 11:23-26)

17 Primer dxej lanij, dxej ni rajwreni yätxtiil ni di saguij, gubig rexpejn̄pacni loj Jesús, räjpreni lojni:

—¿Caro rlajzlu chozucheenu te gaulu xchej xten lanipascw?

18 Dxejc räjpni lojreni:

—Colchäj lo guejdx rolijz te dade', colye'tz lojni: “Si'c naj Dad mastr: Asiäddzunaḡajxh xoṛni, ni'cni rolijzlu gaunäjni rexpejn̄ni xchej lanipascw.”

19 Bejnti rexpejn̄pacni si'cni gunibee Jesús gac, bazucheereni xchej xten pascw.

20 Che biu' guxhijñ, sobga' Jesús lo mex con retzubitio'p xpejn̄pacni. 21 Lal̄ ni cayajwreni räjpni lojreni:

—Rniliä lojtu, yu' tejtü ni guto' narä.

22 Dxejc guc-huinuxh lajzreni, räjpreni lojni:

—Dad, ¿andi naräni?

23 Dxejcti räjp Jesús lojreni:

—Ni gaunäj narä neñ tejtis pla't, laa ni'cni guto' narä. 24 Xi'n Dios ni gujc Niguii sajc si'ctis ni caj loj guiitz xten Dios, per gunatiro bejn̄ ni guto'ni. Huenru na'c niajl bejn̄ga.

25 Dxejcti gunii Judas, ni caguto' Jesús, räjpni:

—Mastr, ¿andi naräni?

Jesús räjp lojni:

—O'n, lujni.

²⁶ Lal ni sobga'reni cayajwreni, guläs Jesús yätxtiil, badeedni xquixtios lo Dios, dxejcti gula'nini, badeednini loj rexpejn̄pacni, räjpni:

—Cołtajw; dee najc si'c tiexhä.

²⁷ Dxejc guläsni te vas, badeedni xquixtios lo Dios, dxejcti badeednini loj rexpejn̄pacni, räjpni:

—Guiraatu colyá', ²⁸ sa'csi dee najc si'c xtienä; ni'cni riannää la'tu te didxcoob, luxh rejnre sixe'ni xcuent xhidajl bejn̄ te guslaanireni neñ dojl.

²⁹ Luxh rniä lojtu, diruna yä'ä nis nani rii yejc uub, dxejl̄ini yänäsacātu lo xcäl̄rnibee Dios, Xtadä.

Räjp Jesús sibälaz Pedroni

(Mr. 14:26-31; Lc. 22:31-34; Jn. 13:36-38)

³⁰ Che gulujx bilreni te dij, biriireni, sääreni lo dajn ni laa Oliib. ³¹ Dxejc räjp Jesús lojreni:

—Guiragajctu sactio'p lajztu xcuentä, susa'ntu narä naguxhijn̄ sa'csi lo reguijtz xten Dios caj scree: “Sugu'treni baxtoor dxejc sire'ch rexiil.”

³² Dxejc cheni guibañsacä lo rebengut, ganidä cha'ä región Galilee, dxejcti jiädñajltu narä.

³³ Dxejc räjp Pedr loj Jesús:

—Masque guiraareni cuälazlu, narä dina cuälazälu.

³⁴ Dxejc räjp Jesús lojni:

—Rniliäpac lojlu, lagajc guxhijn̄re, nicla gajd guidgäi cuedxa', luxh luj alagulälazlu narä chon huält.

³⁵ Räjp Pedr loj Jesús:

—Masque riäj̄l guetnäälu, dina cuälazälu.

Dxejc sigajcza gunii guiraa rexpejn̄pacni.

Gurejdx-gunab Jesús loj Dios neñ Getsemaní

(Mr. 14:32-42; Lc. 22:39-46)

³⁶ Dxejcti bidzujn Jesús nájza rexpejn_{pacni} te lajt ni laa Getsemaní, ráj_{pni} lojreni:

—Colcuésijc ree la_l ni cuedx-guiniabä lo Dios.

³⁷ Dxejc sanäni Pedr nájza guiro'p xi'n Zebedeo, luxh gusloj cayachuinduxh lajzni, cayu'zani yärsiaduxh. ³⁸ Dxejc ráj_{pni} lojreni:

—Te yälhuinduxh yu' lastoä; astoocanu agojl guetä. Coljia'n ree, coltie'ch bacal_l lojtu.

³⁹ Dxejc guzaj Jesús stla', guzuxhijbni dxejc basajb lojni lo yujli, gusloj cabedx-canabni lo Dios:

—Xtadä, palga saj_{ni}, basanlaa tedcaj trabajw-duxhre ni tedä, te na'c tedäni. Xhet si'cdi ni rlazä gacni; si'cpacni rlanjzlu gac, si'c gacni.

⁴⁰ Dxejcti gubi'ni cadro suga' guichon_n rexpejn_{pacni}, che bidzujn_{ni} ro'c, nagayejsreni. Ráj_{pni} lo Pedr:

—¿La di niajcdi nutie'chtu bacal_l lojtu nicla tebor, ä? ⁴¹ Colguibaj_n, colnab lo Dios te na'c jiajbtu nen_n dojl. Guliipacni, lastootu nadip, niluxh tiejxhtu rdxajg.

⁴² Gubi' Jesús stehuält, gurejdx-gunabni loj Dios, ráj_{pni}:

—Xtadä, palga digacdi tedcaj tedä trabajwre, sugacni si'ctis ni rlanjzlu gacni.

⁴³ Dxejc gubisacni, bidxäl_{ni} rexpejn_{pacni}, nagayejsreni sa'csi yuduxh bacal_l lojreni.

⁴⁴ Basaannireni, dxejc sä_{sacni}, gurejdx-gunabni lo Dios ni riojn_n huält, gunisacni lagajc rediidx ni guniini galoo. ⁴⁵ Dxejc huij_{ni} cadro suga' rexpejn_{pacni}, ráj_{pni} lojreni:

—iNaj sii, colguejs, colgusilajz! Abidzujn_n or ni gut-edreni Xi'n Dios ni gujc Niguü ladz_naa rebendojl.

46 ¡Colchastie, colcho', colhuii! Asiääd nani guted narä ladzṇaa rebendojḷ.

Gunaazreni Jesús sanärenini pres

(Mr. 14:43-50; Lc. 22:47-53; Jn. 18:2-11)

47 Lalni canii Jesús bidzujṇ Judas, nani najc tej retzubitio'p xpejṇpacni. Bidzunṇäjni xhidalduxh bejṇ ni ca' espaad, ni ca' garo't, najcreni xpejṇ reni rnibee rebixhojz, nājza xpejṇ rebengool xten xpejṇ Israel. 48 Judas, ni bato' Jesús, abadedxgaani te seen lojreni räjpni:

—Nani guchagro'ä, ni'c najc laani; colguiniazgajcni.

49 Dxejc gubigni loj Jesús, räjpni:

—Xchan, Dad Mastr.

Dxejc bachagro'ni lojni. 50 Jesús räjp lojni:

—Xamigwä, ¿xhi siäädlu?

Dxejcti gubig rebejṇ lojni, gunaazrenini.

51 Per tej reni suganäj Jesús gulääni te spaad, batiu'ni diajg te mos xten rebixhojz ni rnibee.

52 Dxejc räjp Jesús lojni:

—Guluchee xspaadlu loj xse'ni. Guiraa reni rucuanäj con spaad, lagajc con spaad guetreni.

53 ¿La ditu gan sajczä guiniabä lo Xtadä, luxh laani suxhalgajcni gayoṇbitzubitio'p miḷ xanglni gacnäj narä? 54 Dxejc xho gac soob diidx ni caj lo reguijtz xten Dios ni rnixgaa riäjḷ gac guiraa recosre lagajc si'cni cayajcni.

55 Dxejc räjp Jesús loj rebejṇ xhidajlga:

—¿La siädñätu spaad nājza garo't te guiniaaztu narä astoocanu nacä si'c te gubaan? Ni guirasi dxejgureä galäiitu, baluiätu nenṇ guidoro, luxh ditu niniaaz narä. 56 Niluxh guiraa recosre cayajc te

soob rediidx ni caj lo reguijtz ni bacuaa redade' ni gunii xtidx Dios.

Dxejcti guiraa rexpejn_upacni basanxtebreni Jesús, baxu_ureni lojni.

Jesús nez loj rebixhojz

(Mr. 14:53-65; Lc. 22:54-55, 63-71; Jn. 18:12-14, 19-24)

⁵⁷ Reni gunaaz Jesús huinänini nez loj Caifás, ni rnibee loj guiraa rebixhojz, bidzujn_ureni cadro abidojp guiraa rebejn_u nani ruluii leii näjza rebe_ugool xten xpejn_u Israel. ⁵⁸ Dxejcti zit-zijt biädna_ujl Pedr rebejn_uga, bidzujn_ulireni lole' xten bixhojz ni rnibeega. Ro'c biu'ni, gurenäjni rexquixhajg bixhojzga te ro'c bia'nni te fiini xhini'c gac.

⁵⁹ Reni rnibee rebixhojz, näjza rebe_ugool con guiraa reni rajp yäl_urnibee gusloj caguiilreni xhitis te diidx, masque xhet guliidini, te gucuaquijreni Jesús te guinibeereni guetni. ⁶⁰ Niluxh xhet bidxäldireni, luxh gubig xhidajl bejn_u, guniireni xhidajl didx-xhii xcuent Jesús. Dxejcti bidzujn_u tio'p dade' ni gunii didx-xhii, ⁶¹ räjpreni:

—Niguiire gunii scree: “Narä sajc gutzulä guidoro xten Dios, sajcza gunchesacäni ne_u chon_u dxej.”

⁶² Dxejc gusulii dade' ni rnibee lo rebixhojz, räjpni loj Jesús:

—¿Xhicuent xhet rniidilu, ä? ¿Xhini'c canii reniguiire cagucuaquijreni luj?

⁶³ Niluxh dxitis suga' Jesús. Dxejcti räjp dade' ni rnibee loj rebixhojz lojni:

—Rnibeä guiniliilu, guiniliipaclu con laj Gueb Dios nani nabajn. Gunii don, ¿la luj najc Crist, Xi'n Dios?

⁶⁴ Jesús räjp lojni:

—Lagajc guejblu naj si'c. Niluxh empac rniä lojtu, desde najli suhuiitu cueä narä Xi'n Dios ni gujc Niguii xladbee Dios ni rnibee, suhuiizatu jiälä lo reza ni tre' xhaguibaa.

⁶⁵ Dxejc batiäjs dade' ni rnibee loj rebixhojz xhajbni, räjpni:

—¡Niguiire aguniyajni Dios con xtiidxni! ¿Xhiru testiigw rquiinnu? Abiejn diajgtu didxyaj xtenni.

⁶⁶ ¿Xhi rchalotu?

Dxejc basejcreni diidx:

—¡Abiga'ni! Riäjĵ guetni.

⁶⁷ Dxejc batiobxhejnreni lojni, gudijnrenini. Yu'reni gudajp lojni, ⁶⁸ räjpreni lojni:

—Palga najclu Crist, gunii chuni'c gudijnlu.

Di Pedr nicäjp numbeeni Jesús

(Mr. 14:66-72; Lc. 22:56-62; Jn. 18:15-18, 25-27)

⁶⁹ Laĵ ni cayajc reni'c, Pedr sobga' lole'. Dxejc gubig te dxape' ni rujn dzuun ro'c, räjpni lojni:

—Näjza luj cuansanäjlu Jesús, ni siääd nez Galilee.

⁷⁰ Per di Pedr nicäjp nez loj guiraareni, räjpni:

—Dina ganä xhini'c caniilu loä.

⁷¹ Asii Pedr nez ro' puert, che bidxaagni stee dxape' ni rujn dzuun ro'c. Dxape're räjp loj reni suga' ro'c:

—Näjza dade're cuansanäj Jesús ni siääd Nazare't.

⁷² Dxejc basguee Pedr stehuält, räjpni:

—Rniliäpac dina gumbeä dade'ga.

⁷³ Che gojl sterate', gubig reni suga' ro'c loj Pedr, räjpreni:

—Guliini; näjza luj najclu te xpejñni; huenliisi riejn diidx ni rniilu.

⁷⁴ Dxejcti guslojni cagueni, caguzä'tni Dios, räjpreni:

—Dipacna gumbeä niguiiga.

Guniitisni si'c, chela guredxa' te guidgaili.

⁷⁵ Dxejcru banalajz Pedr rediidx ni gunii Jesús lojni che räjpreni: “Che gajdli guidgaili cuedxa', chon huält alaguniilu dilu gumbee narä.” Dxejc birii Pedr ro'c, gusloj cayonduxhni.

27

Batedreni Jesús loj Pila't

(*Mr. 15:1; Lc. 23:1-2; Jn. 18:28-32*)

¹ Che bianij lo guedxliuj, guiraa reni najc rebixhojz ni rnibee näjza rebengool xten rexpelj Israel bia'nreni diidx xho gunreni ju'treni Jesús.

² Baliibrenini, guläärenini ro'c, huisa'nrenini loj Poncio Pila't, ni najc gubernadoor.

Xho gujt Judas

³ Dxejcti Judas, ni bato' Jesús, che bahuiini bacuaquijreni Jesús, basiejch lajzni, guc-huin lajzni, dxejc huidzu'ni galbitzuu meel pla't loj rebixhojz ni rnibee näjza loj rebengool. ⁴Räjpreni:

—Banitduxhä lo Dios sa'csi bato'ä te bejn ni xhet bejndi.

Dxejc räjpreni lojni:

—Xhixh gunnu. Ni'c najc xcuentlu; luhti najn.

⁵ Dxejc bacuaa Judas meelga lo yuj neñ guidoro, biritini ro'c. Sas huijni, baliibni te duu guejnni, gojlni lo te yajg, ro'cti gujtni.

⁶ Rebixhojz ni rnibee batojpreni meelga, räjpreni:

—Di gac di guizälnu meelre neñ caj gojn sa'csi najcni xcuent xtiejn te bejn.

⁷ Dxejc bia'nreni diidx con meelga siireni te la' yuj xten te dade' ni runchee guejs te ro'c gucua'tzreni rebenzajt. ⁸ Ni'cni najli rniireni yujga: “Yurejn”. ⁹ Si'c gusojb diidx ni gunii Jeremías, dade' ni gunii xtidx Dios galoo che räjpni: “Cua'reni galbitzuu melpla'tga si'cti basoob rexi'n Israel sajc bejnga. ¹⁰ Con meelga guziireni yuj lo bejn ni runchee guejs, sigacni gunibee xtdadnu Dios.”

Gusuj Jesús nez loj Pila't

(Mr. 15:2-5; Lc. 23:3-5; Jn. 18:33-38)

¹¹ Bidzunñäjreni Jesús loj Pila't ni najc gubernadoor. Dxejc gunabdiidxnı, räjpni lo Jesús:

—¿La luj najc reii xten rexpejn Israel, ä?

Räjp Jesús lojni:

—Najcni si'cni najlu.

¹² Lałni cabe'c rebixhojz ni rnibee näjza rebenool rexquej Jesús xhetliidi guniidi Jesús.

¹³ Dxejc räjp Pila't lojni:

—¿La di diajglu jiejn guiraa rediidx ni caniireni cagucuaquijreni luj, ä?

¹⁴ Per xhetliidi diidxdi basejc Jesús, nicla xcuent tejsi diidx ni bacuaquijrenini. Ni'cni bidxeloduxh gubernadoorga.

*Gunibeereni guet Jesús**(Mr. 15:6-20; Lc. 23:13-25; Jn. 18:38-19:16)*

¹⁵ Neñ redxe lanij rajpreni costumbr ruslaa Pila't tej bejn ni cue rebejn loj reni yu' neñ latzguiib.

¹⁶ Neñ redxejga guyu' te bejn ni säab xtiidxni ni laa Barrabás. ¹⁷ Cheni tre' guiraareni ro'c, gunabdiidx Pila't lojreni:

—¿Chuni'c rlajztu guslaä, la suslaä Barrabás o Jesús ni laa Crist?

¹⁸ Sa'csi najn Pila't rdxe'chlajzreni lo Jesús, ni'c bateedrenini lojni.

¹⁹ La_l ni sobga' Pila't lo yajgxhiil cadre rujnni yälguxhtis, baxhal chääl_lni diidx lojni, räjpni:

—Xhet gundilu dade'ga ni xhet bejn_ldi, sa'csi nuchej nadxuudx gunixcalä xcuentni.

²⁰ Niluxh rebixhojz ni rnibee näjza rebengool baquiilreni rebejn te gunabreni laa Barrabás, näjza te guet Jesús. ²¹ Dxejcti gunii gubernadoor stehuält, räjpni lojreni:

—¿Chu tej loj guiro'preni rlajztu guslaä?

Dxejc guredxa'reni, räjpreni:

—¡Barrabás!

²² Gunabdiidx Pila't, räjpni:

—¿Xhi gunnä Jesús ni laaza Crist?

Guiraareni guredxa':

—Bacuaani lo crujz.

²³ Dxejc räjp Pila't lojreni:

—¿Xhi latsiaj bejn_lni?

Niluxh laareni guredxa'rureni, räjpreni:

—¡Bacuaani lo crujz!

24 Che bahuii Pila't xlia'si caniini, alga gusloj rebejn cayujn te bieiduxh, cua'ni nis, gudiibni ñaani nez lojreni, räjpni:

—Dina xcaquiä xtiejn bejnre ni xhet bejndi. La'tu colhuid xho guntu. Xcuenttitu najcni.

25 Dxejc guiraa rebejn ga badzu' diidxre, räjpreni:
—Suxcaquijnu xtiejn ni, nuurnu näjza rexi'nnu.

26 Dxejc baslaa Pila't Barrabás, dxejc gunibeeni gudijnreni Jesús dxejc bateednini ladznāa rebejn te gucuaarenini lo cruzj.

27 Dxejc huinä resoldaad xten gubernadoor Jesús lo pretoor, yu' cadre rujnreni yälguxhtis, ro'c batojpreni guiraa resa'reni. 28 Dxejc gulääreni xhajn, bashuajcwrenini te lad xniaa. 29 Dxejc bencheereni te coron guejch, basälrenini yejcn, basälreni te yabixijl ñaani, xladbeeni, sas bazuxhijbreni nez lojni guslogajc caguxhisnäjrenini, räjpreni:

—¡Collä'p xpala'n reii xten rexpejn Israel!

30 Sas batiobxhejnreni lojni, cua'reni yabixijlga te ni'c batiäjlni yejcn. 31 Che gulujx baxhiznäjrenini, gulääreni lad xniaa ni najcwni. Dxejc bashuacwsacrenini lagajc xhajn, sanätirenini te xcajni lo cruzj.

Bacuaareni Jesús lo cruzj

(Mr. 15:21-32; Lc. 23:26-43; Jn. 19:17-27)

32 Cheni sariireni, bidxaagreni te bejn ni siääd guedx Cirene, laani Simón, basguureni dade'ga xcruz Jesús.

33 Che bidzujnreni te lajt ni laa Gólgota, nani säloj: dan Calabeer, 34 ro'c badeedreni bin nu'ch cuanlaa

te gu' Jesús. Te bocbäztisni gu'ni, dxejc naaddiruni niä'nini.

³⁵ Cheni abacuaareni Jesús lo cruju, gudzujt resoldaad yejc xhajbni, te si'c gudisreni xhajb Jesús cua'reni, te si'c guzojb diidx xten te dade' ni gunii xtidx Dios. ³⁶ Gurejtireni ro'c, gusloj canäjreni Jesús. ³⁷ Yejc crujuza bacuaareni te gujtz con letro. Lo gujtzga rcaj xhini'c najc xtojĵ nani cayejt. Lo gujtzga caj: “Dee najc Jesús reii xten rexpejn Israel.”

³⁸ Näjza tio'p gubaan cuaj lo stio'p cruju con laani. Tejni cuaj lo te cruju xladbee Jesús, steeni cuaj xladbäjgwni. ³⁹ Luxh renani sadejd nejuza guniyajreni Jesús, cagusniibreni yejcreni, ⁴⁰ cayäjpreni lojni:

—Ja'ä! Luj ni nutiexhlu guidoo, luxh choñtis dxej niunchesacluni; palga gulii najclu Xi'n Dios, biäjt loj crujuza.

⁴¹ Näjza rebixhojz ni rnibee, näj remastr xten leii, baxhiznäjrenini räjpreni loj sa'reni:

⁴² —Baslaani xhidajĵ bejn, xhoxh di gacdi guslaani lagajc laani. Palga najcni reii xten rexpejn Israel, sujiäjtne lo cruju nanaj te chalilajznu xtiidxni. ⁴³ Huinälajzni Dios, naj suguslaa Diosni palga sanälajz Diosni; ni najni: “Narä nacä Xi'n Dios.”

⁴⁴ Regubaan ni caj lo recruju sigajcza guniyajreni Jesús.

Che gujt Jesús

(Mr. 15:33-41; Lc. 23:44-49; Jn. 19:28-30)

⁴⁵ Dxejcti bicäjy guideb guedxliuj läidxej hasta rcachon gudxej. ⁴⁶ Si'cti rcachon gudxej guredxa' Jesús dipduxh, räjpni:

—Elí, Elí, ¿lama sabacatani? —dee säloj: Xtiozä, Xtiozä, ¿xhicuent gulälazlu narä?

⁴⁷ Yu' reni suga' ro'c, che biejn diajgreni räjpni si'c, räjpreni:

—Cabejdx Dade're Elías.

⁴⁸ Baxungajc tejreni, huica'ni te sponj, bahua-jdxnini loj binagr, bacuaanini yejc te biquii te badzugni binagra ro' Jesús. ⁴⁹ Dxejc reni tre' ro'c räjp:

—Basaan; guidon la siääd Elías te guslaanini.

⁵⁰ Dxejc guredxaduxh Jesús stehuält, baslaatini xpřitni. ⁵¹ Lagajc orğa biräsya' ladro ni zääb neñ guidoro, gujcnı tio'p la' jiaali hasta lo yuj. Gujc te xuro, sas gusuj bej reguiro. ⁵² Dxejc gubicağ reguij ni niäuu ro' rebaa, luxh gubansac xhidajl xpejn Dios ni gujt aguc xchej. ⁵³ Dxejcti, che huäjs Jesús lo rebeñgut, biriireni neñ baa, baluilojreni lo xhidajl bejn ni rbäjz guedx Jerusalén.

⁵⁴ Dxejc capitán xten resoldaad näjza resoldaad ni canäj Jesús, che bahuiireni xuduxh näjza guiraa recos ni gujc ro'c, bidxejbreni, räjpreni:

—Guliipacni najc dade're Xi'n Dios.

⁵⁵ Zijtru tre' xhidajl regunaa ni biädnağl Jesús che biriini nez Galilee te bahuiirenini. Cadxelojtisreni guiraa ni cayajc ro'c. ⁵⁶ Tej regunaaga najc Marii Magdalen, steeni najc Marii xnan Jacob näjza José, steeni najc xnan rexi'n Zebedeo.

Huicua'tzreni Jesús

(Mr. 15:42-47; Lc. 23:50-56; Jn. 19:38-42)

⁵⁷ Che gojl gudxej, bidzujn te benrajp ni siääd guedx Arimatea; laani José. Näjza dade'ga najc tej reni birinajl Jesús. ⁵⁸ Huij dade'ga loj Pila't, gunabni tiejxh Jesús. Dxejc gunibee Pila't gudee-drenini lojni. ⁵⁹ Cua'ti José tiejxh Jesús, batejb-nini nen te bariadya, ⁶⁰ huitixhnini nen xpaapacni. Nacoob baaga, gojni bidäänni cuä' te guilaj. Dxejc basäuni ro' baaga con guiro, dxejcti siini. ⁶¹ Sobga'za Marii Magdalen näjza stee Marii nez loj baa, bahuiireni biga'tzni.

Xhi räjp resoldaad ni cuanäj xpaä Jesús

⁶² Che gudejd dxej xten ni gulec-cheereni lanij, bara yääl bidojp rebixhojz ni rnibee näjza rebejn ni laa refarisee, bidzujnreni loj Pila't, ⁶³ räjpreni lojni:

—Dad, banaj laaznu xhi räjp bejn ni rusgueere. Räjpni: “Che ted choñ dxej sibansacni loj rebeñgut.” ⁶⁴ Ni'c baxhañ chu chacanäj ro' baaga dxejli guisa' choñ dxej, te di chää rexpejn pacni chaläärenini tiejxhni, dxejc gäbreni loj rebejn: “Agubansacni loj rebeñgut.” Yälrusgueega sajc cuentroru loj ni gujc ganid.

⁶⁵ Räjp Pila't lojreni:

—La'tu rajptu te cuaa soldaad; colchäj, basäutzu'tz ro' baaga si'ctis ni sajc guntu.

⁶⁶ Dxejcti sääreni, basäutzu'tzreni ro' baaga; con resoldaad bacuaareni te seii lojni te rut faldini. Dxejc basa'nreni resoldaad canäj ro'c.

28

Sibansac Jesús loj rebeñgut

(Mr. 16:1-8; Lc. 24:1-12; Jn. 20:1-10)

¹ Che gudejd sabd, dxej ni ruzilajz rexpejn Is-rael, che gusloj cayänij lo guedxliuj te jiu' stee xmaan, bidzujn Marii Magdalen näjza stee Mari-iga, siädhuiireni lo baa. ² Luxh alagujc te xuro ni basniib lo yuj, sa'csi biääd te angl xten Dios xhaguibaali te badzucajni guij ni niäuu ro' baaga, dxejc gurejni yejc guijga. ³ Rdimbichaduxhni si'c najc che rdinya', luxh xhajnbi najc nolbäj si'c najc yejg ni riabj. ⁴ Che bahuii resoldaadni, bicheb-duxhreni, sädiidxreni, gujcreni si'c beṅgut. ⁵ Dxejc räjp guixhajg xte Diosga loj regunaa:

—Na'c guidxejbtu. Ananä caguiiltu Jesús ni cuaj lo cruzj. ⁶ Rutini ree sa'csi agubansacni sigajc ni najni. Coltahuii cadre gojtni. ⁷ Colguxun, colchaye'tz loj rexpejn pacni agubansacni loj rebeṅgut. Luxh naj agunijdni lojtu sääni región xten Galilee. Ro'c suhuiitu lojni. Dee najc diidx ni rniä lojtu.

⁸ Dxejcti rusquenduxh regunaaga, biriireni ro' baaga. Cadxejbreni, cabalazduxhzareni sanäreni diidx loj rexpejn pac Jesús. ⁹ Chela bidxaagreni Jesús lo nejz, räjpni: “Xchan”, lojreni. Sas gubigreni loj Jesús, bazuxhibreni, gudääzreni guenni'ni, gojnrenini. ¹⁰ Dxejc räjpni lojreni:

—Na'c guidxejbtu. Colchanä diidx loj rexpenä, chääreni región Galilee, sa'csi ro'c suhuiireni loä.

Rediidx ni räjp resoldaad

¹¹ Lalni sää regunaaga, bidzujn gaii soldaad ni huicanäj ro' baa lo guejdxga, huisa'nreni diidx lo rebixhojz ni rnibee xcuent guiraa ni guzajc ro' baaga. ¹² Dxejc rebixhojz ni rnibee bachagsa'zareni con rebeṅgool te bia'nreni diidx

gudeedreni xhiroob meel lo resoldaad, ¹³ räjpreni lojreni:

—Scree colye'tz lo rebejn: “La_l ni nagayesnu, canäjnu ro' baa, biääd rexpejn_{pac} Jesús guläxhiga'tzreni tiejxhni.” ¹⁴ Palga jiendiajg gubernadoor dee, siohuinuni te di yu' xhi gunni la'tu.

¹⁵ Dxejcti cua' resoldaad meel, bejnreni si'cni räjp rebixhojz. Luxh si'c bire'ch diidx loj guiraa rexpen Israel. Najli canisijceni si'c.

Baxhal Jesús rexpejn_{pac}ni

(Mr. 16:14-18; Lc. 24:36-49; Jn. 20:19-23)

¹⁶ Dxejcti sää retzubiteeb xpejn_{pac} Jesús lo región Galilee, lo dajn cadro bia'n Jesús diidx guidxaagnireni. ¹⁷ Cheni bahuiireni loj Jesús, bazuxhijbreni, gojnrenini, per yu' reni ractio'p lajzreni. ¹⁸ Dxejc gubig Jesús lojreni, guninäjnireni, räjpni:

—Arapä guiraa yälrnibee xhaguibaa näjza lo guedxliuj. ¹⁹ Ni'cni, colchäj, guideb guedxliuj colchagajn bejn gac xpenä, colgutiobnisreni, con laj Gueb Dios, näj laj Xi'n Dios näjza laj Sprit Dxaan xten Dios. ²⁰ Colguluiireni gusoobreni guiraa redidx ni guinibeä. Luxh lagajc narä suganää la'tu guiraa redxey, dxejli che nitloj guedxliuj. Sugacni si'c.

Xtidxcoob Dios ni biädnä dad Jesucrist
New Testament in Zapotec, Mitla (MX:zaw:Zapotec,
Mitla)

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

Copyright Information

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 22 Feb 2024 from source files
dated 29 Jan 2022

5cff1274-8dc3-5398-a94d-f6033bb363c9